

近代中國史料叢刊第十七輯
沈雲龍主編

戡定新疆記

魏光燾編

文海出版社印行

成 疆 森
成 疆 森
成 疆 森

20/01/02

亥	亥
巳	巳
辰	辰
巳	巳

戡定新疆記序

竊嘗論天下大勢三代以前中國衆建諸侯外國亦各有君長不相統攝渾穆相安自秦皇以天下爲一姓而冒頓亦統一諸胡天地氣運至此一變此後或分或合悉爲敵國而相吞勢成中國防邊之事遂歷數千年而不可稍弛善乎孫樵之論邊事其言將帥卽漢人州郡可任之說其言士卒卽漢人邊縣制敵之說大約邊事之論居多其要領莫能外是也今日新疆底定設立郡縣悉本此意所以綏服異族者在此所以防禦外夷者亦在此其所係顧不重哉按新疆卽古西域漢由渾邪降而得敦煌以內故郡縣直接玉門日逐降而得敦煌以外故都護可治烏壘然而郭舜請辭康居杜欽論絕屬賓皆以爲無益之舉班史亦云天地界絕自爲一區種類衆多不能統一

故建武中西域十八國遣子入侍願得都護天子以中國初定北邊未服一切還其侍子其後班超雖以此立功而叛服不常有明哈密之役徒費經營終無成效迨至我

朝武功卓越遂取而有之不惟隸乎象胥亦且歸於職方蓋今昔事勢各殊天與不取反受其殃故版圖開拓二萬餘里誠應天順人之舉也後雖小有變故旋起旋平至同治初元回逆乘我內難未靖構衅倡亂幾於全疆皆失左文襄奉

命視師劉襄勤副之所向無敵統天山南北以次戡定並奏置行省設郡縣爲經久計今陝西巡撫邵陽

魏公首開藩其地一切規制逐加釐定始臻美備因纂戡定新疆記一書有奏受讀一過乃作而言曰邊疆有必爭之地不可失也唐之

邊臣築三城於河外置烽堠於八百更回紇土蕃之亂朔方長爲中國所有明白英宗以來輟東衛以就延綏遂以此失朔方太祖以大寧爲重鎮成祖以與兀良哈遂使遼東宣府聲援斷絕漢武帝得朔方而棄造陽以北論者猶謂失策王安石議棄雁門外五百里太原之陷無不歸咎焉此可見大局所關尺土必爭非貪地也新疆之役我

高宗排衆論而取之爲西土籌奠安爲

國家計長久當時能喻其遠謀者尙尠何怪文襄督師之日復羣起而倡棄地之議使非文襄抗疏力爭

朝廷知人善任則新疆今日已非我有彼時尙不見其害迺者西夷東島迭起爭衡若兵輪騰於海中虜馬長驅於隴右天下事尙可

問耶識者見機於事先攘臂相爭之日鮮不目爲多事孰知其效竟至旋乾轉坤震耀千古後之人未嘗不嘆當日悠悠之口無當事機然已晚矣古今世局大率類此可勝慨哉今日時事之棘尤甚於昔猶幸前此雄圖實爲自強之本

朝廷得新疆以屏蔽西陲關隴數千里屹然自成要區海氛雖惡一旦乘三秦之衆捲甲東趨真有建瓴莫禦之勢匪僅聊固吾圉以之鞭撻四夷稱雄五大洲不難矣是書成使海內豪傑讀之而奮然興起官斯土者亦得循途守轍藉免隕越之慮是則

中丞之功上與

聖君賢相維持久遠之心若合符節

有彙蓋不勝鼓舞翹企之至云

光緒己亥孟秋陝西布政使司布政使萍鄉李有棻謹序

戡定新疆記自序

光緒紀元之十有四載

皇上經筵清暇瞻念西陲底定已更十禩

廟謨武烈不可靡所紀述

特詔樞臣開館率屬編輯平定回匪方畧以宣示天下越七年甲午書成奏御都三百二十卷自命將征討之畧諸酋擾亂之階絕域飛輓之勞隣敵界畫之議無不隨事纂錄原原本本炳若列眉猗歟休哉誠千古馭邊經武之要則也光緒伏讀再四竊以爲西域控居天下上游爲從古形勝必爭之地自來西羌北狄互爲要結其取道率在葱河蒲海間而九鎮三邊卒以次迭被其害漢開西域都府以斷右臂而匈奴勢孤唐置北庭節鎮以席上腴而突厥形弱逮乎我

朝準夷橫踞北方

聖祖

世宗兩朝宵旰籌邊不遺餘力

高宗純皇帝殲除準回兩部設重藩於伊犁葉爾羌而後諸邊息烽燧之警者幾二百載善乎督師大學士左文襄公之言曰保新疆者所以保蒙部保蒙部者所以衛京師若新疆淪胥蒙族必敗非但陝甘山西諸邊為之不靖即直北關山亦將無宴眠之日老成謀國之衷上與

列聖精心相契是以戡夷大難迅奏膚功語曰不世之勛必待非常之人而後集其謂此歟方咸豐初東南盜起橫流四溢當事者急急於彼而西北控邊之臣失於防制於是新疆逆回金相印勾結安集

延頭目阿古栢同時煽亂關內悍回白彥虎應之雍涼二部千里糜爛迄同治甲子髮逆削平

朝廷特命左公宗棠移得勝之師西向聲討一挫之於金積堡再挫之於肅州草薶禽獮剿撫並用然後秦隴肅清當文襄公初被督師新疆之

命規畫全局洞若觀火而洋款之貸主商借者尼之塞餉之輸輜財賦者阻之至於謂海防爲急謂疆事爲緩當時秉鈞大臣頗建停罷西征之議文襄公慷慨籌策以恢拓全局爲言以收復故地爲志手疏力爭

中朝動色卒能聚天下精兵猛將血戰以奪北疆而南疆亦遂瓦解國家故所失地旬歲之間果如所述挈還職方屈計古昔班耿之於

漢蕭赫之於唐老謀壯事蓋有不可相提並論者嗚呼何其盛哉夫古君子之相天下也弗汲汲於智名勇功而嘗舉國家天下之故審度始事之何以成與終事之何以善方其進軍西域也數十百營之舉懸釜待炊苟使糧糗不供則譁潰決裂事不可備而文襄所以經營而儲峙之者固靡不周也及夫全疆唾手而得獨北陸一隅地爲鄰族攘蹠弗肯善讓設不善解事者處此將示弱示強百無一當矣而文襄所以維持而抵禦之者又靡不審也至若開建行省創自古非常之局而終

先皇未竟之志觀其前後條奏無不鏤心怵肝出之卒能假手後賢克底成績迄今遐眺烏壘山河清夷牛馬遠牧邊城宴然垂二十載聖主倚任之隆賢輔薦達之美用能振起人傑以勵相

國家此亦天時人事蔚我

中興而非區區智力所能企及者已

光緒

曩在甘藩任內商楊石泉

宮保集僚屬共成平定關隴紀畧一書既已刊行嗣移藩新疆復商

劉襄勤公屬畧迪化府知府黃丙焜候補知州徐鼎藩候補知縣李

徵煦等稽考新疆事實賡續纂輯草創甫就

光緒得

告歸里旋以東西援剿積苦兵間未暇討論也迨甲午歲持節秦中

乃取舊稿屬長安縣知縣楊調元重事編摩釐爲八卷前四卷武功

記紀兵事首尾後四卷因事命篇備述轉餉置省分界善後諸事期

于詳畧相輔名曰戡定新疆記俾與前編相繼適蒙

恩旨頒賜方畧全帙

謨烈宏遠足耀百世日月既出燭火何光第念先族祖默深先生嘗

戡定新疆記

自序

三

取中秘所藏

方畧統志諸書輯要行世承學使之傳刻勿替是編所擷得

方畧之十二是猶昔賢之志也於是序而刻之嗟乎今日疆事蓋彌棘矣自哈屯河帕米爾諸役以來日朧月創殆不可問有心者瀏覽斯編而因以上繹

聖武親征之志要終原始思患豫防講求古昔形勝所必爭而宅中以圖大是則一二蒐輯之微意也夫

光緒己亥孟秋邵陽魏光燾譔于西安節署

凡例

一是書繼平定關隴紀畧而作記新疆之亂迄於平定中間

廟堂指揮將帥謀畧官民節義凡有關繫莫不具載至於披荆棘設郡縣尤千古未有之奇蹟者更與

聖武記蕩平回準諸篇參觀則一方掌故瞭然可睹矣

一逆回叛亂前後十年官軍以三載克之建設行省勞徠安集又八年而後定經營締造不遺餘力是書於戡定始末用紀事本末例爲爲武功記以述之年經事緯秩然可尋至於絕塞餽師力籌轉運強鄰竊踞卒返舊疆以至置省善後諸大端略之則掌故攸關詳之則頭緒至蹟茲以一事爲一篇事經年緯首尾畢具與武功記相輔而行亦庶幾史家書志之遺意也

長沙耆老言
一紀載之文務在徵實是篇自左文襄公視師而後章奏公牘確有據依惟是同治三年以後光緒二年以前全疆淪沒文報幾絕迨至收復而故府遺文銷沈劫火南北兩路檔冊僅存者獨一巴里坤而已是編所錄或據零編散牘互證參稽或訪于遺耆民咨求故實其有未喻則守闕文之義不敢憑虛臆斷以故各城起事緣由淪陷日月戰守情形未能悉著且有達官烈士效命隕身或存姓軼名或名姓俱軼非敢畧也惟其慎也觀者諒之

一塞外地名人名往往音同字異且有人同地同而展轉傳訛致音字兩異者雖奏報亦然自非親歷周知幾疑爲兩人兩地是書於音與字前後歧異者悉釐而正之以歸畫一改設郡邑亦將舊名詳載庶可考知沿革

一新疆事蹟自

欽定平定回匪方略告成煌煌

制作鉅細靡遺豈容末學更爲編錄第念

天錄寶冊下士罕得仰窺而甘陝連疆風通道會治具張弛息息相
關卽方聞綴學之儒亦未便窮幽遠而失於眉睫用是竊附先族祖
默深先生

聖武記之例付之剞劂傳示闕隴非敢冀風行海內也

一是編紀錄近事據實直書黨伐愛憎不敢稍涉惟是蒐採之未盡
體例之未純愧非史才在所不免宏博君子幸爲是正竊有厚望焉

戡定新疆記目錄

卷一

武功記一

卷二

武功記二

卷三

武功記三

卷四

武功記四

卷五

糧餉篇

卷六

歸地篇

分界通商附

卷七

遷省篇

卷八

善後篇

戡定新疆記卷一

武功記一

西域自前世多故矣恃其險遠叛服不常我

高宗純皇帝長駕遠馭舉準回兩部氈裘城郭之衆悉隸職方然後邊徼之患息神京之衛固厥後雖有烏什昌吉張格爾之亂遐方萬里等於潢池天戈所揮指顧即定斯亦建元永平以來未有之局已咸豐之末中原多事髮捻匪相繼西竄回亦乘衅煽亂阻兵玉門以西久淪異域會中夏救平

朝廷特簡重臣出關誅討風馳霆擊山空谷靜遂乃分置郡縣列爲行省化榛狉爲耕鑿易鱗介而冠裳威德所加情乎無外消烽灌燧六合一家盛矣哉謹撰次戡亂始末爲武功記凡四卷

同治三年夏四月庫車土回馬澂等潛結外匪田拉滿蘇拉滿謀爲亂已亥率黨反焚庫城五月壬寅辦事大臣薩凌阿英吉沙爾領隊大臣文藝葉爾羌帮辦大臣武仁布死之家屬皆殉扎薩克郡王愛瑪特被脅不屈亦遇害阿克蘇辦事大臣富珠哩飛檄徵伊犁兵未至阿城旋陷富珠哩舉家自焚東四城相繼陷喀喇沙爾辦事大臣依奇哩死之烏魯木齊都統平瑞聞警發兵往至蘇巴什盡殲于賊而烏垣亦亂提標叅將索煥章者故甘肅提督索文子也久蓄異志與河州回阿渾安得璘同惡相濟始得璘假星命遊金積河隍間比寇興竊三婦人出關抵烏魯木齊客煥章所煥章師事之相與謀亂提督業布冲額不爲備癸亥回衆集南關禮拜寺明炬議事戈矛森然爲遣犯朱小貴所偵以告提督令索往訶反曰無之斬朱小貴以

徇城中大譁六月辛巳夜安索兩逆噉南關回衆入城大掠業布冲額匿索宅中八日仰藥死烏垣自援兵南行精壯幾盡僅存屯勇數百平瑞坐守滿城而已是日昌吉變起知縣恩錦亡去典史秦某罵賊死閩門俱殉南路逆回亦竄擾吐魯番領隊大臣榮慶守禦十餘日會纏回皆變城遂陷奇古以東騷然矣先是奇台縣故有陋規官下車派照糧去任派帮糧戶以石計縣令恆頤初蒞任欲豫責帮糧民大譟頤以民變上並窮治首者民遂闖堂縣胥數百人皆土回也以彈壓爲名張甚關隴客民咸不平刼木壘河營庫軍械與戰頤不直客民反翼土回土回勢益橫遂焚掠奇台屠古城竄阜康八月癸未阜康陷縣令裕厚逃居民盡屠時恩錦方合餘燼轉粟以濟鞏甯甲午賊劫輜重城中援絕九月辛丑遂陷平瑞自焚護鎮迪道伊昌

阿投井死協領榮慶以下殉難者百數十員兵民逾萬攝迪化州孔昭恒托故先逃伊犁援兵二千至聞城陷遽奔還死傷積半瑪納斯漢回反綏來縣令段桂齡死之西路自鞏寧既失上游已無完區而南路喀什噶爾回目金相印亦糾徒衆勾結布魯特叛回思的克同叛連陷葉爾羌和闐各城葉爾羌參贊大臣覺羅奎棟中營遊擊德祥左營遊擊常順等十三員回官十有六和闐領隊大臣慶英回務主事都林布等七員回官二十有一同時殉難番戍弁兵更無噍類矣東路哈密爲新疆南北門戶而巴里坤則北路咽喉也哈密回思亂已久至是焚燬廂關戕把總高萬清城幾不守扎薩克郡王伯錫爾率纏回奮擊賊始西竄丁巳巴里坤遊擊何瑄搜殺首逆馬天保駢戮者千餘人瑄於是設城防練民勇城內肅然會逆目馬陞率大

股東下古城戒嚴領隊大臣保恒檄蒙古兵四千來援奏調惠慶爲統帶慶至而濟木薩破縣丞陶珩棄印逃有

旨與裕厚孔昭恒均嚴拏正法新疆局勢以伊犁爲總滙事權統於將軍將軍駐惠遠城北關地廣人稠爲容奸藪十月戊寅惠軍回亂惠遠繼之旂丁根老八博徒也糾痞黨千餘斬關出乘勢剽掠所在盪起應之悉赴惠軍纏回漢回聯爲一氣辛巳領隊佗某戰死賊竄寧遠乙未察哈爾領隊錫某赴援敗績我兵死傷千餘人十一月明緒代常清爲將軍癸丑賊陷古城漢城游擊以下俱戰歿復圍攻滿城保恒病篤惠慶代領其隊誓死守時

上授文祺爲烏魯木齊提督督辦西路軍務以扎克當阿爲哈密辦事大臣伯錫爾爲幫辦文祺奏派文麟赴奇台籌餉奇屬兵民五千

餘人亦以麟統之自率官兵纏回二百餘人從哈密西上是月中旬卒於巴里坤巴城領隊色普詩新代理提督印務甲午參贊榮某領隊額某同援寧遠復敗於告車台陣亡二千有奇塔爾巴哈台地在伊犁東北即土爾扈特及輝特原治之雅爾準部滅後駐滿漢防兵各千人咸豐四年以餉絀各裁三百塔城游擊護副將回逆米慶與阿渾伊瑪木等陰圖倡亂參贊大臣錫霖領隊博爾果蘇心知其謀推誠開導不能止

四年春正月丁酉朔匪黨二百餘乘我不備蠶擁入城錫霖等急麾兵拒出失軍器大半回目有以受撫之說進者參贊領隊慨然率從官往庚子與米慶議事於城外之禮拜寺窗隙一矛刺入博爾果蘇手格之矛折米慶失色博爾果蘇知事變持半矛瞪目大罵連刺慶

洞胸殫回衆大噪錫霖博爾果蘇理事通判音登額主事富勒斐圖
暨弁兵僕御俱殉難寺中時新授參贊武隆額聞變閉關賊攻之不
下四散殺掠二道橋商民千餘悉屠戮無遺塔屬鑛總劉姓鄉約滕
姓集五金廠夫役數百人馳解城圍至三工地遇趙把總爲所遮留
詰日回逆偵知要道阻擊夫役無紀律又少兵械傷潰者大半庚戌
伊犁賊陷惠寧圍城殉難二萬人領隊穆克發額死之古城被圍日
久賊數發地雷轟城惠慶悉力拒守勢岌岌危甚色普詩新本任古
城協領眷屬在圍城中急於應援自巴里坤率滿漢兵二百並護解
軍火辛酉抵富家坨遇賊千餘敗之遂安營鎮標把總高吉官將家
子頗知兵策大股必至謂我軍宜乘勝造城下賊不測多少圍可解
也否必危繼以泣諫不聽壬戌天曙賊大至力戰五六時鎗礮箭皆

熱子藥垂盡文麟練軍千五百騎距戰地二十里不敢逼皆作壁上
觀賊前隊忽蛇行呼乞降高吉官叱不顧滿兵稍懈賊乘隙入色普
薛新高吉官佐領惠斌協領功訥布悉戰死官兵脫者不及十人賊
亦陣斃千餘其畏憚巴里坤兵威實自此戰始二月乙亥陷滿城惠
慶以下死者七千餘人是日賊聞迪化勇目徐學功率團練急攻烏
垣即悉衆回救議者謂古城緩須臾無陷則一城全矣豈非天乎馬
陞之東竄也安逆署爲僞翼長至是與馬泰馬仲馬明馬官皆晉爲
大元帥餘妄竊名號者不可勝數馬陞等旋尊安得璘爲清真王專
制西南路金相印等復勾安集延酋怕夏竄西四城安集延者敖罕
八城之一與喀什噶爾隣俄羅斯滅敖罕踞其塔什干都城安集延
獨免其酋阿古柏狡黠能用衆收諸部餘燼自稱和碩伯克吐魯番

關展以西土回皆應之號爲怕夏怕夏者伯克轉語也部衆旣盛復購西洋鎗礮遂保安集延而王三月辛亥怕夏陷英吉沙爾領隊大臣托克托布回務章京穆圖善伊明阿城守都司常順筆帖式文秀均死之四月塔屬鐵廠復集夫役千餘人赴城防守回迎戰未能下又賄哈薩克逆衆助攻官兵擊退之未幾棍噶扎拉參呼圖克圖率喇嘛僧衆及十蘇木蒙古共二千餘人援塔戰少利詰旦賊大至恃勝輕敵各弛鞍下馬徒步而前我軍靜伏以待相距數武麾衆突起棍噶扎拉參首先陷陣殲悍賊數名蒙古兵繼進武隆額出隊夾攻賊遂披靡哈逆跨馬先逃斬獲無算餘敗入禮拜寺棍噶扎拉參請卽合兵犁其巢武隆額不從賊旋深溝高壘攻之不克衆咸咎其失機伊犁派索倫領隊和布德錫伯領隊圖庫爾率營赴援途爲賊困

至塔巴是殘軍武隆額攻二道橋不克陣亡營官穆隆阿筆帖式哈蘇和綳額等棍噶扎拉參屢戰不勝移駐南湖四月壬申伊犁賊來攻惠遠盡焚北關祠屋五月丙午攻綏定急領隊塔某游擊沈某馳援殺賊數百閏五月己卯西六城兵合惠遠大兵進剿惠寧復敗於地窩堡亡三千餘人塔某死之是時伊塔一隅已成鼎沸而烏垣賊復東犯哈密分竄奇台自古城既陷賊悉歸巢文麟駐守奇台猶勉爲堵拄適巴里坤領隊訥爾濟帶解文麟軍餉五萬從草地抵奇與賊遇麟遣練勇拒敵自與訥爾濟委棄輜重飛奔巴里坤遂失奇台戶民隨逃者二萬人巴城官兵拒不納文麟令戶民棲止郭外買羊爲食而自輕騎入城旋聞哈密台吉怕他諾什煽誘纏回首先從賊衆萬餘已攻陷漢城扎克當阿陣亡巴里坤糧運斷絕文麟率官兵

數百並練勇進屯松樹塘爲規復計六月戊申哈密大股迎戰詐敗我兵中伏駭散文麟退走巴城之三塘湖前隊官兵苦戰竟日亦傷十之七癸丑賊長驅至城東之大泉何瑄率衆登陴拒甚力乙卯賊進逼城南山坡戈戟如林城人皆股慄瑄誓衆爲背城計衆壯之嚮晚賊中炊煙徧起瑄突出精騎千餘人奮擊賊蜂擁而來鎗礮對舉馬賊數千亦向南馳撲南城放大礮兩及之賊改驅城東意在夾攻適滿營協領伊勒屯驍騎校金連福等出大礮連轟皆中賊遂大奔城上譟呼悉出城助勢有不及由城門者縋而下乘勢追逐勇氣百倍掩獲軍械糧畜無數訥爾濟瑄飛章奏聞出力員弁俱得旨優獎惟文麟以規避故不與並勅鏘五級亡何鎮標千總傅國相帶隊赴阜康練營保護糧運爲賊所襲潰國相突圍得出官兵存者

無幾西路益危南路惟喀什噶爾漢城困守年餘援兵不至七月甲戌怕夏攻陷之辦事大臣奎英妾王氏子育俊孫靈景幫辦大臣福珠凌阿妻鈕氏子英俊英敏英志三女一媳均赴火自焚旂員十有七回官十有三並死難八月乙未哈密賊萬餘人復竄三十里堡圍攻巴城丙申黎明何瑄分三路迎敵自辰至午俘斬無數追奔九十里賊仍遁哈密奏入得

旨獎叙是月己革知縣恆頤率奇台勇目張和赴阜康與孔才會剿妥得璘令馬陞迎禦九月戊寅兵敗恆頤棄營跳張和奔巴里坤請于訥爾濟收集戶民壯丁二千人以救奇台許之時妥逆在烏垣城外築城建王府復晉馬升爲統兵總元帥索煥章首謀背叛自爲僞元帥其母屢責詈之趣反正賊覺降煥章爲散目令守吐魯番旋病

死免刑誅衆皆惜之

五年春正月壬午伊犁賊陷惠遠城明緒闔門殉兵民死者數萬前將軍常清被虜旋死二月棍噶扎拉參軍大疫自南湖退駐頭台武隆額派兵夜送公文爲賊獲盡知我虛實戊申賊攻破南湖營棍噶扎拉參退至青裕爾河戊午賊陷綏靖城武隆額率存兵百餘巷戰手刃數賊力竭死之領隊郭勒那佐領斐音當阿蒙庫拜防禦德克吉布達三泰驍騎校瑪克塔春筆帖式吉勒圖堪智麟查隆泰懷塔布柯什巴圖柯們布綠營把總趙榮悉殉難千總甘湧不屈賊釘其手足於門數日乃死妻女皆仰藥殉博爾果蘇之妻及其長子驍騎校蒙庫那遜次子騎都尉察克都爾扎普與兵民百餘同日遇害額魯特蒙衆陸續逃入布隆托海棍噶扎拉參領至阿勒泰山借科屬

烏梁海地安插游牧約萬餘人漢民逃往者亦七八十戶是日伊犁
綏定廣仁瞻德塔爾奇四城相繼降於賊惟拱宸堅守四月糧盡而
陷兵民被屠自是伊犁轄境無一寸乾淨土矣五月乙未朔哈密賊
竄踞巴城東六十里之三鄉湖焚掠民庄辛酉徑來攻城訥爾濟三
音布何瑄擊卻之癸亥天未曙賊列隊滿城迤東數里往來窺伺訥
爾濟飭放大礮斃賊數十始退旋移居高家湖分掠東路丙寅四鼓
馬賊萬餘復列陣五里外直撲滿城勢張甚東南角樓飛丸雨注防
禦阿里屯胸右中鎗幸不死訥爾濟被擊中帽礮彈摩頂過仍督兵
奮擊旋調何瑄督綠營兵勇合滿兵兩路攻勦追擊四十餘里復斃
賊數百餘悉東奔賊雖受創然城中飢甚晝夜苦戰人給糧僅半斤
皆出自有食家至宰牛馬供食亦盡適伯錫爾有供糧合勦之請衆

始欣然先是四月中東山纏回蘇拉滿赴坤稱郡王願協力征討賊之圍城也復有纏回齋伯錫爾公文纏城入以賊中消息告至是復派伯克夏斯林請兵稱郡王已飭部衆並北山鎗手準備助戰爲巴城開道通糧官兵東來途中先給軍食何瑄即飭游擊凌祥將馬隊千二百千總芮林將步隊八百裹四日糧六月己丑由坤啓行次松樹塘忽大雪糧垂罄又接濟之旋得伯錫爾以青稞羊隻犒師益信請兵非詐凌祥率馬隊先進丙申抵南山口偵知馬賊四千餘在南河沿列陣即麾衆馳擊賊大敗殲斃八十餘奪器械駝馬無算丁酉追至哈密迤西二十里連大捷殺賊數百人毀營五衆益奮隨會夏斯林進攻回城又搜斬數百漢城賊望風逃逸立復哈密兩城何瑄馳奏凌祥擢副將賞持勇巴圖魯旋署哈密協瑄又爲伯錫爾陳請

免罪兵勇駐哈伯錫爾月給餉糧復饋糧數千石濟巴里坤飢軍未
幾

上授文麟爲哈密辦事大臣時麟萬涼州募勇瑄請

勅與烏魯木齊提督成祿迅速出關併力剿辦初孔才張和收撫木
壘河民勇萬餘圖恢復訥爾濟派佐領百喜率官兵五十人入營教
練陶玥思立功贖罪亦集民勇復濟木薩就撥軍糧才等從奇台進
屯阜康戰屢勝賊憚其威是月烏垣馬步賊七八千竄至與孔才議
和而陰於密林設伏丙辰賊挑戰孔才爲所中軍遂覆百喜兵亦亡
其半賊欲甘心孔才追過濟木薩才以善騎得脫先是陶玥啓商百
喜請暫攝奇台縣事期呼應靈通至此濟城兵潰不知存亡爾濟奏
玥帶印逃應仍照

前旨拏獲正法百喜擅自委署兼失律敗奔應革職留營効力陣亡
驍騎校都訥恩委前鋒校喜成暨民勇馬步懇一併

賜卹均如所請冬十月西路回謀大舉東犯時哈密駐兵及新調安
敦玉兵千餘均歸凌祥節制伯錫爾請祥急進瞭墩以扼要害祥未
即行十一月己未賊首馬陞蘇虔蓋率烏垣吐魯番回騎六七千徑
入五堡凌祥倉猝出師伯錫爾亦撥纏回馬步數千助剿辛酉至三
堡戰小勝凌祥意頗自矜次日被誘至柳樹泉伏賊四起纏回及安
敦玉兵皆潰凌祥跳巴里坤兵勇九百餘鏖戰二日夜力竭亦覆都
司趙英傑從間道遁巴城是日伯錫爾聞前敵失利謂福晉邁哩巴
鈕曰敵子買哈賣提足疾不能去可飭衆伯克保護侄孫帕仔爾台
吉齎金銀印信速往巴里坤請兵我年近八旬死亦何懼即親率纏

回二千赴援遇賊頭堡陣亡七百餘伯錫爾被執帕仔爾亦爲虜事
聞凌祥趙英傑均革職擊問

上喜伯錫爾好義急公臨敵忠奮令何瑄查明具奏巴里坤哈密本
唇齒相連哈密復陷巴城兵食并乏危如壘卵瑄數請成祿文麟迅
赴哈密塔爾巴哈台參贊李雲麟速統蒙古兵援坤迄不應遂飛檄
召孔才張和備調遣未幾張和率數十騎至孔才有衆三千雲麟復
調以自益挑留精壯五百餘悉罷遣衆無所隸遂屯博里岡隨在劫
掠雲麟遽奏孔才反有

旨嚴拏正法才畏罪不敢投坤十二月乙巳馬賊二千餘自哈密攻
漢城瑄以大礮轟退丙午繼至瑄飭游擊陳升恒芮林勇目張和趙
璞分率兵民東西迫擊伊勒屯率滿兵爲後應至二道河與賊交綏

三時許賊始敗竄衆以枵腹不能追詰早偵之悉東遁矣請爾濟病目不能視師奏請以伊勒屯攝領隊

詔許之

六年春正月伊勒屯奏巴城產糧素少全賴安敦哈密救濟自哈密再失東道不通巴素難民殘食人肉計自去冬至今滿營兵丁男婦餓斃二百餘傷心慘目然去臘賊來猶攘臂奮呼擊退劇寇同仇之志至死不哀若不急救過此數月闔城皆爲餓殍即賊不攻城城亦危矣李雲麟所部定西民勇合棍噶扎拉參蒙兵數千共十二營力能赴援而徘徊不至萬一巴城失守新疆大局尙可問乎前得李雲麟函稱欲與棍噶扎拉參遣兵古城規復烏垣哈密漢回自當西竄不救巴而巴圍自解不知漢回西竄之言亦屬臆度卽西竄而纏回

之踞哈密自若也雲麟又何術以制之近聞奇台難民散漫以人食
人有軍無糧何以濟事不急合巴城兵力共克哈密與成祿聯爲一
氣而必進無兵無糧之古城未見其得計也况遣兵古城言難必踐
卽如其言以烏合之蒙兵民勇攻烏垣深根固蒂之強寇孤軍深入
後無援兵其勢必敗請

飭李雲麟根噶扎拉參先赴巴城攻哈密西成祿分兵數千攻哈密
東東西夾攻可一鼓而下再圖規復烏垣不難矣得

旨嚴催而雲麟咨稱烏科兩城蒙兵散盡根噶扎拉參兵雖較得力
烏科倚爲屏障宜先顧北路完區昨至烏籠蓋河運西見土爾扈特
數十旗方爲賊逼哈薩克十餘萬勢將內遷若北兵援巴賊犯烏科
何以能禦於是伊勒屯瑄復奏雲麟自去年六月招集蒙兵志圖規

復烏垣遠近聞之以爲柱石之臣新疆有賴乃一聞奇台古民勇潰散逗遛蒙地畏葸不前始定八九月繼定十一月進兵皆成虛語既爾哈密復陷巴城受困謂雲麟必星夜席捲赴援而愈不敢動迨蒙民半潰藉口有辭又以哈薩克內犯爲恫喝之言若然棍噶扎拉參駐兵塔城豈能毫無聞見何以前後公牘並未言及且有來援之意可見雲麟非固守完區直坐視不救耳已既不救復把持棍噶扎拉參俾不得獨前揆其居心無非藉招集蒙兵規復烏垣爲名藉以虛糜餉項而已

上諭倘巴城有失惟李雲麟是問而延宕如故初賊執伯錫爾監禁之伯克阿布都拉巴海斯底克均爲所殺是月丙子賊鞠伯錫爾何以赴坤請兵伯錫爾大罵曰吾七世受

國恩豈從逆者請兵欲盡滅狗彘耳即手奪長矛刺斃二賊隨被害其妾回女也亦罵賊死馬踐尸骨如泥復割夏斯林耳鼻數日始殺之碎骨颺風何瑄查悉以告

上追封伯錫爾親王爵照札薩克親王例

賜卹

賜一等祭品於哈密建立專祠阿布都拉巴海斯底克夏斯林一併入祀王之福晉飭地方官隨時撫卹王妾照例

旌表嗣福晉呈請以長子邁哈默特承襲親王爵得

旨允行賊踞哈密時窺巴城何瑄飭芮林與千總趙萬海往剿二月己酉復哈城餘逆竄屯五堡追破之令張和率勇駐紮以杜賊踪奏入

上嘉何瑄調度有方以提督記名簡放回逆馬萬倍與纏逆蘇爾坦有隙暗招烏垣賊助攻之被纏回殺斃三千餘蘇爾坦遂雄長伊犁三月孔才率衆自首何瑄爲奏准帶罪自効飭移駐哈密三堡與張和犄角

七年春二月西路回復犯哈密張和死之何瑄伊勒屯飛飭革弁趙其傑勇目田樹青趙璞馳往會剿癸卯戰於城迤西五里適孔才率馬隊至橫衝賊陣大敗之甲辰復至協領達三布副將芮林游擊趙萬海孔才合擊賊敗去文麟飭守備魏忠義率兩營先進塔爾納沁城攝理都司兼辦屯墾沁城地荒城圯民鮮安居忠義至次第整理稍稍完集前此潰勇二營悉歸孔才統帶七月文麟自敦煌進駐哈密東路防軍始有起色是時安逆雖僭偽號事皆決于馬陞安逆忌

其專嗾綏來僞元帥馬官縛陞至斫斃之並殺其黨及僞翼長十餘
賊勢漸衰十一月成祿委都司梅振清守備莊義慶陳兆魁偕回目
蘇海林至西路招撫至吐魯番爲賊所得文麟復委烏仁泰田福柴
福往賊逮八烏垣皆不知所終

八年秋八月哈密幫辦大臣景廉抵任甲寅西路回數百騎竄至五
堡文麟飛檄孔才與營官張忻蔣富山率馬步五營馳赴之斃賊百
餘擒匪首科有冲乙卯騎賊三四千復來撲營孔才等分頭迎擊賊
敗退九月甲戌賊來攻二堡乙亥孔才督李琦李生元姚鳳林率馬
步三營出東門張忻蔣富山分督諸將出南北門三面夾擊斃賊甚
衆猶相持不下適文麟委員恒齡楊澄瀾會魏忠義等以六營押糧
至設伏草湖仍分隊助戰孔才率敢死士八百大呼突陣殺賊三百

餘伏兵起又聚殲之賊大敗潰去是夜復合衆襲營不克而退忠義以賊不得逞知必再至丁巳密派馬隊兩營炮隊百人南北分伏未幾賊至忠義等督馬步八營令張炳趙萬海率礮隊左右轟擊戰酣伏兵齊出賊狼狽奔竄會風雨暴作羣賊自相踐踏死者不可勝計我軍亦亡營官姚鳳林弁勇數十戊午忠義等進搗賊巢抵柳樹泉擊賊六百餘壬戌賊來斂屍復敗之賊犯哈密數矣而痛鉅創深蓋未有若此之甚者

九年春二月賊大股西竄奇台一帶時有賊踪勇目鄧生玉馬進福張著均集有民勇駐防賊不敢逞三月安逆令僞元帥馬仲馬秦趙生才南擊安集延至阿爾城界爲怕夏所敗追入吐魯番圍攻其城是月俄羅斯有盜馬逃匿伊犁者追問不獲遣兵與纏逆戰敗去五

月復益兵來戰遂破拱宸城繼逆敗績戊寅破瞻德已卯降綏定庚辰惠遠亦降於是各城靡然悉爲俄人佔踞矣其時西路惟徐學功民勇屯迪化之南山學功者少喜技擊勇畧冠一時值寇起結健兒衛鄉里掠回莊貲以自贍遇漢民則保護之有衆五千人雖怕夏亦畏其強嘗伺便擊賊殺逆目馬環古里牙及馬伏成奴爾馬等何珣旄奏給軍功十月馬寨舉吐魯番降怕夏怕夏卽令導纏回安逆來取烏垣土回多被殺戮執馬泰送南疆逆不能敵亦舉城降怕夏卽削安逆僞號銷僞印以馬仲爲阿奇木總管各事使回漢皆雍辭易服光頂圓領效其所爲閏十月乙亥馬進福率定西中營截剿竄回戰四晝夜死文麟卽以其弟進有接帶張著爲幫辦時綏來縣民趨與體團練殺賊有功科布多參贊大臣奎昌疏陳其事

特賞花翎守備銜

十年夏四月徐學功至迪化擒馬仲新之俄人既踞伊犁復聲言欲代收烏垣意圖蠶食

上念伊犁已陷若再收烏垣則更難措手

勅景廉即率兵規復旋

授爲烏魯木齊都統進駐巴里坤初馬仲子與妥逆積不相能馬陞子亦以父仇思復冬十月遂率帕夏圍攻僞王城妥逆夜遁怕夏貪兩殘土回不堪其虐爭迎徐學功十一年春正月學功進駐烏魯木齊漢城以圖怕夏時妥逆既遁怕夏則據其巢學功攻之未下會怕夏亦調大股至達坂城五月丙戌馬金貴拒怕夏於達坂學功助之不利金貴敗死學功弟學第驍勇善戰怕夏深憚之丁亥戰南城外

中嚴陣亡回逆懼有欲縛獻學功以乞和者學功覺已丑夜與綏來
勇目沈廷秀拔赴沙山子駐紮怕夏入烏垣大殺回漢居民而遷其
餘於南疆諸回多逃出自歸馬明率其黨踞古縣與怕夏相持先是
馬明兄馬元爲怕夏所殺明銜之遂與景廉委員桂洪元深相結大
出芻糧供軍共圖怕夏古城統領張玉春率二百餘騎先進學功兵
未卽至六月壬申玉春戰敗營官唐漢雲馬興業沈廷秀等皆死玉
春亦重傷馬明救之得返景廉旋遣使持諭招撫馬明明方困於安
逆請官兵赴救時孔才駐兵濟城欲令送家屬爲質乃援之遂不果
降八月哈密番辦大臣錫倫至巴里坤言於景廉曰烏垣賊勢非兩
路夾攻使腹背受敵未易得手也西路團勇無大員董率難萃易渙
策全遠在塔城兵力旣單軍火亦缺刻難進兵布隆托海難民甚多

半皆棍噶札拉參遣撤兵勇若招集成旅佐以官兵會合沙山子民兵扼駐既可夾擊烏垣亦杜俄人東犯景廉偉其言卽商令擇要駐軍且屯且戰復請塔城參贊大臣富和派撥蒙古兵千人隨錫倫進安逆聞佯致書馬明以問之又差悍逆馬進才入關召援俱爲我軍搜殺安逆旋斷古牧地汲道襲破其城徙馬明南路以他回目及僞官駐之定西營幫辦孔兆華偵知烏垣回逆欲乘機襲古城新渠孔才亦以回民貿古濟者多奸宄恐爲變十一月庚子孔才殺回商二百餘人復帶馬隊探防紫泥泉擒斬烏垣及古牧地瑪納斯各賊目奪戰馬百餘哨弁徐有被俘

十二年春二月景廉奏關外全局以先復烏垣爲要圖新任烏垣領隊錫倫至布隆托海訓集蒙古喇嘛及布魯特官兵與趙興體團勇

聯駐沙山子榮全所部吉林索倫兵宜與錫倫併取瑪玳斯漸分賊勢俟後路大兵雲集夾攻烏垣惟各路徵兵到者無幾成祿一軍會奉

勅先撥李天和三營而迄無出關之意祿自

簡授烏垣提督連年賊窺巴哈何瑄訥爾濟伊勒屯前後疏請馳援無慮十數上

廷旨嚴催相望於道卒逗遛高台肅州飾詞規避至是傳

旨拏問被逮入都夏四月景廉進軍古城各扼要分布旋調徐學功面詢西路賊勢學功輕騎往留十餘日遣歸而安逆乘間襲之屠其家輜重並盡學功告急於古城景廉飛派黑龍江營總伊勒和布定西營統領田錫禮各率勁騎三百赴援力戰數日斬獲過當怕夏遁

還吐魯番是月陝逆白彥虎率大股自西甯出竄圍攻玉門安西燉煌副都統明春督健銳軍剿辦三州縣解嚴閏六月辛丑彥虎竄哈密沁城劫掠各屯旋踞大泉黃蘆岡七月辛亥傾巢來犯魏忠義率各營禦之大橋迤西中伏營官劉珍郭天保王復興田樹青陣亡忠義與張忻李琦李生元皆不知所在哈密瀕危景廉派吉爾洪額沙克都林扎布孔才分督援兵二千自古城馳往八月乙未行近哈密整旅而前文麟亦出兵迎剿慶戰移時殲賊四五百是夜賊陷回城俘福晉去辛丑我軍由城西攻入賊棄城奔南湖乙巳大破賊營白彥虎竄西山繞道而北分股向吐魯番奏入文麟賞副都統銜餘皆獎敘明春旋擢哈密幫辦大臣率健銳九營駐守未幾賊騎數千犯沙山子伊勒和布徐學功馳擊於沙棗園斃百餘而遁十月陝逆竄

三道廠學功誘敗之亡何白彥虎復勾烏垣回竄入瑪納斯並分優
坤屬紅柳峽古城戒嚴景廉馳奏

詔錫倫會屯沙灣與副都統孝順痛殲醜類毋任蔓延

十二年二月濟木薩三台回逆分股滋擾景廉令統領孔才興祿往
勦辛卯遇騎賊於紫泥泉壬辰抵西泉擒斬逆目蘇保沅馬得和馬
兆魯李遠王元皆白逆悍黨也三月正白旂漢軍都統金順涼州副
都統額爾慶額及桂錫楨各率馬步隊前後出關廣東陸路提督張
曜率馬步十四營進屯哈密大興水利墾荒地二萬畝歲獲粟數千
石以濟軍五月賊竄西湖辛亥徐學功截剿於綏來縣境癸亥賊劫
馬橋商貨營官焦生有追及奪還六月庚辰西路賊犯三台二工河
孔才率五百騎伏擊頗有斬獲賊復以四千餘人夜犯城關我軍堵

禦黎明而退景廉聞警飭興祿金永清倪敬修分率馬步二千往援壬午抵二工河遇賊擊走之癸未賊復屠至孔才會田錫禮倪敬修率馬隊爲兩翼左右包抄興祿金永清率步隊居中策應游朝勝以馬隊繞道靜伏各營列陣柳樹河麋戰至午殺賊五百有奇我軍失營總常明甲申回逆百餘向沙山北竄焦生有伏馬隊林中令哨弁白彥存誘戰殲其大半哨弁李萬隆力戰死逆目于小虎在綏屬甘溝設台輓糧巳亥營官徐讓馳往攻斃回酋拜林陣斬五十餘級七月丙午呼圖里克賊騎東竄哨弁羅讓陳正基以馬隊伏敗垣賊過衝出擒斬逆目金尙保乙未昌吉回騎竄蹏芟芴槽營官姚百福飭哨弁陳秀高彥才率隊追勦斬馘亦多逆目黑寶才中礮傷遁八月授景廉爲欽差大臣督辦新疆軍務九月關內肅清

詔金順迅赴古城會景廉規復烏魯木齊穆圖善自涇州赴安敦玉以壯聲援張曜宋慶馳赴哈密會文麟明春剿賊各軍糧餉左宗棠源源接濟勿任缺乏十月順至玉門四道溝進巴里坤時景廉擬三路規取烏垣自與金順由古城趨古牧地張曜由天山趨吐魯番錫倫由河山直薄瑪納斯同時並舉使賊不及互援其籌議如此

戡定新疆記卷一終

戡定新疆記卷二

武功記二

光緒元年春二月

欽差大臣大學士陝甘總督左宗棠奉

密旨垂詢西域情形並及用兵調度是時朝議紛紜謂西域不能久守宜

飭各統帥駐守現有邊界移西餉以助海防或又謂不復烏魯木齊俄人必浸淫蠶食泰西各國亦且視我強弱以爲進退且關外藩籬一撤回氛復熾雖欲閉關自守勢有不能

上命宗棠籌議以聞宗棠奏言泰西諸國其志專在通商取利非必別有好謀緣其國用取給於征商故所歷各國豈以占埠頭爭海口

爲事而不利土地人民自通商定議埠頭口岸已成各國久以爲利
知敗約必防國用也商賈計日求贏知敗約必礙生計也非甚不得
已何敢輒發難端論者乃欲撤出塞之兵以益海防之餉臣且就海
防應籌之餉言之始事所需如購造輪船購造鎗炮購造守具修建
炮臺是也經常之費如水陸標營練兵增餉及養船之費是也閩局
造船漸有頭緒由此推廣精進成船漸多購船之費可省其僱船之
費可改爲養船之費此始事所需與經常所需無待別籌者也海防
之應籌者水陸練軍最爲急務沿海各口風氣剛勁商漁水手取才
非難陸路則各省就精兵處募補如粵之廣惠潮嘉閩之泉漳興永
浙之台處甯波兩江之淮徐鳳泗穎亳諸處皆可訓練成軍較之召
募勇丁費節而可以持久現在浙江辦法餉不外增兵有實用台防

慶漸之開銷獨少似非一無可恃者比也海防應籌止此論者擬
停撤出關兵餉無論烏魯木齊未復無撤兵之理即烏魯木齊已復
定議畫地而守以征兵作戍兵爲固圉計而乘障防秋星羅碁布地
可縮而兵不能減兵既增而餉不能缺非合東南財賦通融括注何
以重邊鎮而嚴內外之防此塞防因時制宜而兵餉仍難遽言裁減
也今若畫地自守不規復烏垣則無總要可扼即烏垣速復駐守有
地而烏垣南之巴里坤哈密北之塔爾巴哈台各路均應增置重兵
以張犄角精選良將興辦兵屯民屯招客土以實邊塞然後兵漸停
撤而餉可議節矣彼時戶部按其實需經費酌撥各省協餉嚴立程
限一復道光年間舊制則關內外或可相庇以安若此時即擬停兵
節餉自撤藩籬則我退寸而寇進尺不獨隴右堪虞即北路科布多

烏里雅蘇臺等處恐亦未能晏然是停兵節餉於海防未必有益於邊塞則大有所妨利害攸分亟宜熟思審處者也論者又以海疆各國觀西陲之成敗以爲動靜宜以全力注重西征俄人不能逞志於西北各國必不至構衅於東南其於海防情勢言之甚明而邊塞情勢則容有未審者俄人之竊踞伊犁乘我兵勢紛繁未遑遠畧因藉口代守圖攫其財利以自肥其肇事伊犁亦觀其土沃泉甘川原平衍物產豐饒夙號腴區又距其國南界稍近伸縮得以自如也自肅回盡殲安西州縣收復官軍疊進哈密巴里坤濟木薩爾內外聲息漸通中間僅烏魯木齊爲逸賊白彥虎所踞尙稽

天討黑子着面何足重輕俄羅斯北方名邦非如尋常無教之國謂將越烏桓挾逆回與我爲難冒不韙而爭此不可必得之瘠壤揆之

情事必不其然至土耳其即都魯機國於五印度之西距伊犁喀什
噶爾萬數千里而遙印度爲古佛國在唐稱身毒痕度音轉而訛不
知何時奉天方回教遂忘其舊地奧而腴廣產鴉片英人據其東南
孟邁孟加喇爲利藪轉市中國道光間東印度盡淪於英吉利厥後
俄人又侵其北境西境土耳其其國勢分崩離析非夫寰宇中央之舊
矣喀什噶爾回酋之叛附土耳其其與俄英兩國通商聞海口已列入
新聞紙此間尙無聞見果如新聞紙所言喀什噶爾附其同教之士
耳其與俄英通商我既兼顧不遑無從問及則將來恢復後復能否久
守原可姑置勿論但就守局而言亦須俟烏魯木齊克復察看情形
詳爲籌畫始能定議若此時先將已經出塞及尙未出塞各軍概議
停撤則實無此辦法也

諭旨謂關外一撤藩籬難保回匪不復嘯聚劫擾近關一帶關外賊氛既熾雖欲閉關自守勢有不能於邊塞情形瞭如指掌臣本毋庸再贅一詞特以事關時務大局又身在事中不備細陳明必貽後悔至規復烏魯木齊非勦撫兼施不可非糧運兼籌不可按陝逆白彥虎由西甯大通竄遁關外時除老弱婦女外能戰之賊至多不過數千人所共見即被裹出關各回由安玉哈密逃歸就撫者其說不同前敵所報或多或少未足爲憑其言賊勢或旺或衰亦非確論據實而言白逆悍鷙不如陝回諸目而狡詐過之計白逆自陝至甘未嘗佔據城池每遇勁軍未嘗戀戰往往給諸逆目斷後自挈黨夥先逃所犯之處未嘗久留觀其過肅城不赴馬四之招現踞紅廟子不踞烏垣亦可概見賊智長於用伏官軍計畫稍疏輒爲所陷臣前接關

外諸軍緘牘言賊可取狀會告以勿論賊勢強弱且自問官軍真強與否賊之以弱示形須防其羸師誘我此賊如敗必乘機竄逸要須陣前殪斃乃爲了局此爲言勦者策也南路闢展吐魯番至哈克蘇地狹民貧土回闇弱近爲敖罕屬部安集延所制安集延踞吐魯番之頭人怕夏能以詐力制伏回衆與白逆通善持兩端此時踰伏未動且貌爲馴順以示無他如遽加以兵則滅後勁之軍增前路之賊非計之得也漢趙充國之討羌急先零而釋罕开厥後先零平而罕开自服效猶可觀現之屯軍哈密修水利興屯田一爲鳩集哈回以固藩衛一爲置子中央杜賊勾結而取芻糧節輓輸猶其小者此爲言撫者策也三月宗棠復密陳景廉方正有學承平廻翔台閣足式羣僚惟泥古太過任用非人其奏請仿古徙民實邊欲調取關內戶

口赴古濟耕墾爲寓兵於農起見不料其經歷有年若不知農之不可爲兵游勇之不足恃也金順爲人和平寬緩然平時粥粥無能臨陣尙能奮勉臣於景廉而知古所稱殷浩房琯終不失爲清流於金順而知古所稱宮之奇董安于終不失爲智士也若以金順所任京秩改畀景廉而以景廉之任畀金順令得節制各城辦事領隊大臣似於前敵事宜較易措手關外兵力本不爲薄惟勝兵少而冗食多以致曠日稽時難觀成效非嚴加汰遣不可臣前在肅州與金順定議先將舊部挑汰資遣足成十二營外挑留明春所帶成祿舊部併成三營合爲十五營金順又請調臣部馮桂增馬隊一營炮隊一起以勇丁五百夫二百爲一營計算已近萬人金順又廣收投効將弁勇丁遂至營數漸增多至二十營有奇如果一律精實則此二十營

已足敷攻剿之用不須續調矣自嘉峪至哈密臣已漸有布置並擬辦理巴里坤事宜惟該管鎮迪道例歸督臣統轄而烏魯木齊都統久視爲專屬不樂其別有稟承以致關外事體不相聞問應請

飭下烏魯木齊都統仍遵舊制凡鎮迪道所有公事隨時稟報督臣遇事盡心贊畫或可稍資裨助否則閫闈之內畛域攸分督臣無從過問何能借箸代籌疏上有

詔景廉補授正白旗漢軍都統與侍郎袁保恆回京供職左宗棠以欽差大臣督辦軍務金順爲烏魯木齊都統副之陝西巡撫譚鍾麟督西征餉事布政使裕寬陝安道沈應奎兼綰精臺四月宗棠奏起前署陝西巡撫劉興赴蘭州

詔劉興以三品京堂候補幫辦陝甘軍務時景廉頓兵古濟銳意屯

塞飭孔才等六營墾種三台營官李發桂以三十騎馳驗渠道二月
甲申賊突出圍攻相持至暮發桂右脇中鎗猶麾士卒搏戰孔才馳
救乃退發桂旋以傷殞事聞

優卹如例金順進軍巴里坤慮糧運難繼派副將方春發步隊兩營
先赴奇台就食自率馬步八營抵古城以濟木薩僅屯有提督劉宏
發禮字等營兵力尙單即督軍進紮而奇台縣屬西集爾近接南山
賊易出沒留馬步數營分駐防剿復與景廉會奏烏魯木齊爲逆回
老巢古牧地昌吉呼圖璧瑪納斯等城均爲賊黨分屯南路吐魯番
則有安夷盤踞伺釁而動與回逆時合時離情形叵測大兵進剿勢
必互援或由南路捷徑窺我後路以圖牽制請檄調烏里雅蘇臺駐
防黑龍江馬隊西紮沙攷蓋台並徙蒙古游牧內地以避其鋒

上飭宗棠金順會商機宜妥籌調度宗棠旋疏陳兩事一廣籌軍糧
請在糧餉篇一整理兵事曰西事久無成效由冗食多而戰事少耳
旗綠諸營久不足額就近各省無勁兵應調於是取土著兵民及各
處就食兵民授地耕墾一備軍食一備戰守無事則驅其盡力隴畝
有事則調其效命鋒鏑謂之且耕且戰事非不勞謂之即兵即農名
非不美然調赴期會則彼此觀望數日不能取齊麾令前驅則勇怯
雜糅氣勢不能完整其何以戰且既挂名伍藉又令其從事耕耘譬
猶左畫圖右畫方兩者相兼必致一無所就是且戰之民不能戰且
耕之民不暇耕也茲畫兵農爲二擇其精壯有膽者爲兵宜馬者馬
宜步者步束以營制一如內地軍營其會者戰績如徐學功輩用爲
管帶督帶其才能辦事如孔才輩用爲幫辦凡督帶管帶以及所部

哨官什長酌給薪水散人給餉與糧按照客軍營制減給其愿弱不任戰者罷爲農指餘荒地畝令其承墾酌給子種農器耕牛收穫後繳本歸倉不取息其所穫糧石由官照時價收買庶簡其精壯營伍可得而實散其愿弱屯墾可得而增兩利之道也關外各城所駐大臣有辦事領隊幫辦之分所駐之兵有錫伯索倫達呼爾察哈爾蒙古厄魯特沙畢納及綠營攜眷兵換防番戍兵之分亂後舊制不可復按而辦事幫辦領隊大臣於本營存兵外兼帶馬步各營各請專餉所稱馬隊步隊旣罕能戰之兵而辦事幫辦領隊各員又非盡知兵之選徒糜餉糧無濟實用都統及各大臣因慮產糧未極其豐增饑更形其絀力主盡地自守閉關謝客之議以護官私屯糧不顧兵事利鈍金順進駐古城張曜進屯哈密遲回不前而後隊尙屯遼原

防者以此現巴里坤古城已辦採運哈密已開營屯金順張曜兩軍留後之隊應即陸續開拔兵力既增則屯丁可減竊惟此時必分別兵農責兵以戰課農以耕而後餉事可節兵事可精也哈密巴里坤古城所駐各大臣就現在所存旗營核定糧餉如缺額過多准照舊額馬步就地招募丁壯補數但責其保守城隘不必責以戰事脫屯丁伍藉散之歸農則盡力隴畝民樂耕其野而官屯私屯地畝收穫餘糧准照時價發糶民益得其饒不但分駐各軍可資接濟卽調發續進馬步沿途就地採購毋須裹糧以趨於兵事更覺順利較之現在辦法兵農兩荒不猶愈乎應請

飭下金順文麟遵照辦理庶於時局有裨得

旨嘉獎如所議行七月乙未朔景廉回京移交馬部三十七營人數

參差復多冗弱金順挑留精壯併爲馬勇十營步隊九營各營屯卒亦汰弱留強以資防護時新糧將登關內轉運漸集

飭後路副都統托雲佈率留安肅各營分起前進秋八月宗棠奏三品卿銜署西甯道劉錦棠英銳果敏才氣無雙近察其志慮忠純尤堪重任令率其房部老湘全軍從征並委總理行營事務時賊以大兵未齊乘機竄掠九月丁酉賊三百餘人夜犯小橋屯莊掠牲畜統領杜生萬率諸將追擊戍戍及之於石窰四面圍攻斬獲甚衆盡復所掠牛羊金順以濟木薩西起沙山子而紫泥泉爲赴沙山子要徑飭孔才以定西馬隊五營健銳一營進駐之副將王洪順以靖邊步隊三營自三台進駐二道河方春發以英字三營會同總兵桂錫楨扼守三台九月辛酉烏垣昌綏逆回合安集延大股徑犯沙棗園下

六戶地營官趙文斌沈廷輝迎擊徐學讓繼之張文英先伏步隊于旁三路奮擊營官馮魁亦委叅領壽凌副將和振興分率馬隊助戰自辰至午趙文斌手刺回酋武觀擒之並殺回酋武犁兒賊衆敗潰武觀傷重尋斃是時烏垣以西賊騎四出瑪納斯上游奎屯河烏蘭烏蘇庫爾喀喇烏蘇被擾尤甚西路官軍時時截擊之未能大懲艾也署伊犁將軍榮全進駐塔城往時伊犁官兵陷賊者陸續投出上飭榮全督飭孝順等確探賊踪乘機兜勦與金順等聯絡聲勢十月至十一月托雲布薩凌阿先後到濟提督馬玉崑亦抵巴里坤以隆冬不能築壘未卽進而馬橋沙山子居瑪納斯迄北人民析處逼近賊巢迤西沙灣地方徑通布倫托海上年白逆分股石澗塔即由此竄入檄總兵馮桂增統西征捷勇三營駐沙灣與額爾慶額徐學

功等相首尾

二年春二月幫辦陝甘軍務三品京堂劉典至蘭州宗棠以善後事悉付之癸未禮旗啟行飭前部二十四營會于肅州其前路進止機宜悉委總統湘軍劉錦棠相機酌度巴里坤有數徑可達安西不復盡由哈密飭提督徐占彪帶馬步四營駐之又飭張曜率馬步十二營宋慶留勇八百人扼守哈密遏土魯番蹙逆東犯之路宗棠奏言烏城之賊土回居多白彥虎復挈陝甘悍回分踞紅廟古牧瑪納斯與相聯而皆南與安酋怕夏通自怕夏踞喀什噶爾各城土魯番關展以西土回皆附之怕夏能以詐力制其衆又從印度多購西洋鎗炮勢益猖獗土回纏頭皆倚之爲重然不敢顯與俄人較俄人亦頗言其狡悍異諸賊今官軍出塞自宜先勦北路烏垣等處而後加兵

南路當北路進兵時安集延或悉其醜類與白彥虎合勢死拒當有數大惡戰如天之福事機順利白逆殲除安集延悍賊亦多就戮由此而下兵南路其勢較易是致力於北面收功於南也若賊情專圖自固但作守局以老我師則曠日持久亦在意中外間議論或以爲事可緩圖或以爲功可速就或主撤兵節餉或言難得易失皆因裨益洋務起見豈眞由衷之言哉臣一介書生高位顯爵爲平生夢想所不到豈思立功邊城覬望

恩施況年已六十有五日暮途長乃不自忖量妄引邊荒艱鉅爲己任雖至愚亦不出此而事固有萬不容己者烏魯木齊各城不克無總要可以安兵今伊犁爲俄人所踞喀什噶爾爲安集延所踞若此時置之不問後患環生必有日蹙百里之勢此區區愚忱不能不盡

者也其後攻北路而南路遂平竟如所策三月乙巳宗棠次肅州劉錦棠先率軍駐城北肅州至哈密中隔戈壁水泉不能供千人宗棠令諸軍抵西安後分起遞進漢中鎮譚上連鎮所部先進甯夏鎮譚拔萃繼之陝安鎮余虎恩又繼之四月錦棠親率大軍啓行分命諸軍前駐哈密侯古城糧運畢集卽長驅大進直搗賊巢先是統領吉江馬隊額爾慶額聞白逆將糾瑪納斯南北兩城踞回窺擾獲運因與馮桂增會商徐學功約以正月丁卯合攻瑪納城丙寅額馮兩軍搃大河廠待徐軍未至遂先進夜半逕薄北城桂增改騎爲步由西北踰城入殺守者開門納官軍城賊驚起拒敵桂增率所部巷戰額爾慶額麾軍繼進斃賊數百並陳斬翟老四噶一兩逆目餘賊退伏東南乘明賊麴至連施大礮官軍却爲賊所擠桂增縱橫濼決得出

圍復裏創尋額爾慶額再入再出力竭被擒罵賊死兩軍陣亡弁勇二百餘徐學功未至城聞敗却回宗棠奏襲攻堅城本難得手馬隊黑夜撲城尤爲希見額馮冒險貪功咎由自取徐學功不即麾軍馳救咎亦難辭惟原約丁卯會攻並未明定時刻兩營先進非學功所能預知經金順先搦頂翎免其再議額爾慶額旋左遷古城領隊馮桂增交部議卹瑪納斯賊復欲赴草地掠駝馬並擾布倫托海金順飭孔才會徐學功嚴扼沙山子東西賊知歸路被截回竄古城東北紅柳峽已復由北路小紅柳峽竄出統領唐得勝依勒和布勦之賊乃越嶺逃歸烏垣老巢金順飭唐得勝彭桂清興祿等與依勒和布分駐木壘河三角泉大石頭上下護運巡防時俄國解送古城軍糧二百餘馱行抵布倫托海迤西疊崙山被劫榮全派隊扼霍博克河

迎護之咨金順撥營接替順奏自瑪納斯迤北沙山子之西由沙灣入草地必先至烏魯木湖烏魯木湖東北爲布倫托海西北則塔爾巴哈台由布倫托海而東經烏梁海軍台至科布多迤南之沙札蓋台東西千餘里南爲沙山北爲阿勒泰山其中別無歧路由沙札蓋台北達科布多東接烏里雅蘇台所屬部落東南可通巴里坤紅柳峽等處僻徑南達古城皆以沙札蓋爲分道之所烏魯木湖爲塔城轄境沙札蓋爲科布多轄境由沙札蓋而東則接烏里雅蘇台邊界今塔城有索倫兵額魯特兵科布多有大同兵蒙古兵烏里雅蘇台有黑龍江察哈爾各兵若塔城以索倫兵扼烏魯木湖科布多以蒙古兵扼布倫托海或烏梁海適中地烏里雅蘇台以黑龍江兵扼沙札蓋一轉移間防勦均有裨益

上救榮全額勒和布車林多爾濟杜嘎爾托倫布保英其廉酌度情形分撥扼紮備各城兵勇無多兼顧爲難著左宗棠金順酌撥勁旅以杜分竄榮全旋奏烏梁海等處關係糧路所部官軍以前敵緊要未能分布後路仍須額勒和布等派隊前赴察庫爾泰等處扼紮額勒和布等亦奏烏城存兵現祇察哈爾及吉林黑龍江馬隊共一千五百餘名僅數分布城防難勻撥他處

上令金順懷遵前

旨即與左宗棠會商迅速派隊扼紮宗棠覆奏前奉

諭旨揀派勁旅扼紮北路要地已行知金順劉錫棠熟察地形妥爲布置一面咨委烏魯木齊領隊大臣錫綸赴沙山一帶豫籌截勦飭總兵桂錫楨都司馮以和所部並咨金順派撥吉林黑龍江馬隊合

成千騎均歸統帶又調徐學功馬隊三營步隊一營歸錫綸調遣復
飭劉錦棠選將領率步隊佐之錫綸兵力已不單薄錫綸生長邊陲
熟悉蒙部情形能通蒙文蒙語聞其爲人亦甚個儻近時俄糧續由
沙山一帶運送百萬餘斤即係錫綸運護茲令防勦竄匪更爲得宜
至金順所請將塔爾巴哈台索倫等隊扼烏魯木湖蒙古科布多等
隊扼布倫托海或烏梁海適中之地烏里雅蘇台黑龍江等隊扼沙
札蓋原因賊騎驟忽北路平沙廣漠防不勝防慮難一處聚殲故爲
此節節邀截之計陝甘逆回被白彥虎迫脅出關者非盡屬其死黨
若白逆等復劫其各棄眷屬北竄遐荒似非所願至關外土回狡悍
嗜亂者無多白逆縱糾其北竄亦必無繼之者如大軍進逼環攻諭
以勦擒兼施釋脅從而急樂魁解散必衆逆賊如從寧康境內竄出

劉錦棠金順所部截之如從瑪納斯竄出近則孔才各營稍遠則錫綸新統各營截之均有餘力而塔爾巴哈台後路又阻其前英廉所部雖單榮全應挑撥勁旅歸其調遣或扼之烏魯木湖或就近擇要截擊皆可確操勝算科烏兩城僅爲邊城要地如慮兵力單薄糧運惟艱則

諭調精兵於科烏擇要扼防或卽由兩城領兵大員就近添調防兵遏奔衝固封守給以薪水口分俾其壹意布置務保無虞懇

申諭榮全等實力籌維共襄茲舉孔才旣扼沙山之衝賊旋旁犯馬橋及六戶地才令參將杜生萬拒戰縱馬隊左右鈔擊斃賊數十追至距瑪納斯三十里五月甲寅孔才與統領黑龍江馬隊協領克希克圖進紮距瑪納斯城四十里之四佛廟夜四鼓杜生萬率精兵二

百趨城下孔才克希克圖以大隊繼之乙巳黎明南城突出賊騎數百直犯我軍孔才等迎擊殺獲甚衆丁未副將和振興把總馮魁由六戶來會進紫瑪納斯城西北十里墩憑險築壘賊日出挑戰我兵不應癸丑孔才克希克圖伏步卒于西路葦湖騎兵于城北樹林殷紹祿邊生有列陣大隊口誘之賊大至伏兵四起圍擊孔才等橫衝入陣短兵接轟斃執旗賊酋一陣斬數十百人餘潰走是月譚上連暫屯巴里坤有馬賊由布倫托海竄出紅柳峽過古城上連急追之賊騎二百餘已由南山向吐魯番遁卽分部扼紫芟芟台色畢口大石頭三角泉等處護運自率兩營前進錦棠旋亦抵巴里坤飭繼進各軍就哈密取糧短運踰天山赴坤再由坤遞運古城限閏五月取齊候進止時土回安夷結壘古牧地烏魯木齊在其西南宗棠奏官

軍必先攻古牧地撒烏垣紅廟之藩籬乃可犁巢搗穴濟木薩距賊
尙遠不能扼賊吭劉錦棠會師進勦必先據要地儲糧屯師阜康地
當賊衝從前馬賊之犯科布多聞卽由此駛出錦棠注意於此一爲
進攻古牧地一爲遏賊奔冲也閏五月庚午錦棠進屯古城輕騎覘
形勢六月辛酉與金順由濟木薩拔隊而西壬戌抵紫泥泉積潦縱
橫飛橋以渡丁卯抵阜康阜康失陷十餘年榛莽叢雜命諸軍芟翦
以利礮車城西距古牧地九十里出城濟河卽戈壁直上黑溝山無
寸草古牧地在其西悍賊悉屯於此層築柵壘以拒官軍金順派總
兵胡飛鵬助孔才等屯瑪納斯約東西齊舉使賊不得互救錦棠進
駐九營街白彥虎聞官軍大出自紅廟子移踞古牧地糾土回迎敵
安集延亦遣繆回助戰時屯地乏水軍渴甚錦棠詢土人知黑溝驛

上黃田有積泉賊嚴守以困我已西錦棠金順令軍士赴戈壁佯掘
智井以懈賊庚戌潛師夜起進襲黃田黎明至賊驚覺錦棠督所部
由左金順右俱進左路余虎恩黃萬鵬將騎譚拔萃等步隊繼之右
路薩凌阿沙克都林札布將騎劉宏發等步隊繼之譚和義等擁開
花大礮而前軍容甚整賊望之始懼錦棠金順先踞山崗余虎恩黃
萬鵬等自山馳下賊迎戰而敗旋合步賊來拒我軍箕張而進夾擊
之譚拔萃譚上連董福祥以步隊衝其中堅賊不能支遂大潰卡賊
亦棄輜重相與狂奔兩軍窮追徑抵古牧地賊欲入城不及遶城走
官軍方奪門入城內突出大股迎拒劉宏發等乘銳擊之賊敗入城
錦棠金順遂收駐黃田是日斬獲無算訊擒賊言白逆先派古牧地
回酋馬明因踞黃田後疑其與官軍通逮回南路以王治金中萬率

衆萬餘代之其黃衣騎賊則安集延及南路各纒回也壬子錦棠金順進圍古牧錦棠部東北金順部東南癸丑怕夏遣夷目阿托愛將騎數千來援錦棠令余虎恩率馬隊赴山前嚴陣以待分遣步兵攻南關及山壘昇開花大礮迭轟之城堞多圯譚上連以親兵徑擣山壘前馬隊繞出其後立奪其壘我軍勇氣百倍冒鎗礮徑進遂拔城關諸軍進據之金順所部薩凌阿等擊斬黃衣賊酋一阿托愛徒蹤遁官軍奪其馬追至卡子溝平毀賊堡十餘錦棠金順視古牧守備嚴築壘守之增建礮臺高出城堞丈餘乙卯北城西城圯丙辰東城圯均各四五丈城內拒守不得入錦棠金順部分諸將譚拔萃劉長發等囊土壤壕自缺口進攻余虎恩陣于山岡張春發陣于平川堵截竄賊仍調集諸火器環轟勿斷丁巳南城復大圯賊洶洶欲潰錦

棠所部自東南金順自西北同擁入城盡殲賊黨陝回頭目馬十娃
爲禹中海舊識擒斬之並斬王治金中萬及安夷賊帥綳塞奇玉只
巴什夷兵三百亦盡白逆本踞紅廟時往來卡子溝以未入城倖免
錦棠入城見存火藥硝磺尙數千斤拾回漢文各一通則烏城逆首
阿奇木蒼王治書也書言烏城精壯已悉數遣來三城防守乏人南
疆兵不速至阿奇木者怕夏僞官甘回馬人得也管轄古牧地烏垣
紅廟子瑪納斯及僞王城回兵所稱三城蓋指烏魯木齊迪化州及
安得璘所築之王城南疆則指安集延也錦棠知烏垣空虛戊午復
進金順繼之賊黨紛竄沿路不絕抵迪化州城北見賊千餘已出城
里許南向奔逸錦棠飭余虎恩譚拔萃黃萬鵬譚上連追擊之譚慎
典湯秀齋張俊自北城入誅悍賊百餘未持械者釋勿誅復分隊入

僞王城及烏魯木齊金順所部入鞏甯城同時克復初馬人得與白彥虎議先遣婦女輜重南竄留精壯駐守嗣見官軍驟至遂相率同奔兩軍追十餘里賊回拒復擊破之拔出城中難民及避匿山谷者均設法安撫檄袁堯齡暫攝迪化州事宗棠咨商金順錫綸布置各城堡要隘籌辦善後並咨調張曜徐占彪會師進規南路時北路各城踞逆先後南竄怕夏遣援四五千騎亦至達板而返怕夏之降安逆也掠其資並括漢回金帛輸南路實其窟穴驅丁壯守烏垣各城以爲屏蔽白彥虎自陝甘西竄自知勢力不敵倚爲聲援凡怕夏所欲不敢違也故怕夏日富而土回益貧及聞大軍來白逆亦薙髮易服竊附於安集延給死黨與土回堅拒官軍自觀成敗伺間脫逃宗棠謂不得烏魯木齊則無駐軍之所賊如分竄無以制之不僅陝甘

之憂即燕晉內外蒙古將無息肩之日若停軍巴古以東瘠區兵少無以扼奔衝兵多徒以耗軍餉無論非時局所堪卽四海晏安軍儲贍裕亦斷難爲持久之計茲幸旬日間連下堅城固非始願所及奏入

詔賞錦棠騎都尉世職譚拔萃譚上連余虎恩譚和義席大成均賞雲騎尉世職黃萬鵬蕭元亨均賞穿黃馬褂其餘各將士以次進秩陣亡各員弁陳百順富全凌萬準等

優卹如例七月己未朔金順師至昌吉城外見竄賊如梭摻殺無數餘匪西竄呼圖壁庚申劉宏發方春發追至蘆草溝賊奔東南山谷金順追及賊騎千餘車駝絡繹令沙克都林札布繞出賊前穆通阿龍得勝躡其後王寬薩凌阿分兩旁抄之賊分股拒戰沙克都林札

布等鎗矢齊發順喜突前奮擊諸軍繼之斬馘數百賊酋馬元駛逃
穆通阿以洋鎗追洞其馬腹而墮驍騎校雙喜擒之龍得勝錢鳳鳴
銀亮薩克新圖追至頭屯河賊爭渡踐溺聚而殲之盡得其車駝器
械佐領永林沒於陣辛酉劉宏發距呼圖壁十里而軍壬戌賊酋楊
大成出其輜重眷屬潛遁南山自率馬步千餘拒敵宏發揮軍前進
陣斃百餘不少却復以馬隊潛出賊後始繞城逃追奔二十餘里立
復景化城錦棠下令搽山七月甲子譚和義陶生林自七道灣赴東
山黃萬鵬余虎恩譚拔萃譚上連經大小鹽池墩東南至柴窩堡各
有斬獲擒賊供賊眷輜重悉已南徙壯丁屠集達板城白彥虎等踞
南山小東溝口喉各賊赴大小西溝板房溝一帶收禾稼備行糧俟
官軍向南路進攻卽繞出古牧地阜康擾我後路錦棠飛檄東路防

營嚴備之飭余虎恩譚拔萃仍扼鹽池柴窩堡防賊橫竄戊辰錦棠急趨小東溝口追斬四十餘騎賊家屬先一日徙金口峽官軍速進惟見老弱奔逃白逆已率黨竄投托克遜安夷賊巢矣遂令各營收穫遺糧畢仍返駐烏垣先是榮全所部廣州副都統福珠哩自六月進兵薄瑪納斯城與孔才徐學功連營扼紮久不下是月丁巳福珠哩築礮臺于北關以開花大礮轟城賊洵懼壬午夜北城逆首于小虎護衆眷潛開東門南遁七月己未朔南城逆目黑寶才亦南向竄遂克瑪納斯城福珠哩追于逆不及俘其婦幼孔才進駐北城西土爾扈特郡王貝子亦派蒙古兵來助癸酉金順進攻南城以後膛大礮轟圮東城諸軍蟻附而上賊乘高抗拒礮石如雨總兵李大洪熊佑林叅將陸輝光中鎗殞方春發繼進亦傷八月庚寅馬玉崑潛自

西北樓登殺守賊十餘賊覺不得前明日復上迭迭進擊賊甚多
適樓儲火藥爲礮火引發木石橫飛士卒多死玉崑亦傷劉宏發亟
搶築三卡高出城表以陵之而賊守愈嚴城上繫柴灌油夜明如晝
蘆席裹土填缺口沿城屋頂築女牆排油鎗爲死守計官軍亦憤怒
迭攻賊漸不支己丑有竄逸者諸將截擊斬獲數十劉宏發中鎗斷
一指馬玉崑繼進與諸將肉薄環攻顛而復上卒不克游擊胡耀羣
營官張大發杜生萬司世道邵芝揚占魁均死城下乙巳劉錦棠遣
羅長祐譚拔萃蔭福祥等率步騎來會與金軍分掘長塹甲寅戌九
月戊午朔方春發爲地道轟城城圯僞元帥韓刑臆督衆堵禦不得
上我軍以大礮殪之己巳地道復發羅長祐馬玉崑等自南北缺呼
噪而入大風起咫尺不相見提督楊必耀中鎗殞賊旋乘夜越濠湘

軍營官湯秀齋先於濠外備鈎索伺之掌斬甚衆獲墮濠三賊訊之言海晏代韓刑臆城守糧盡令我探虛實丙子夜海晏赴徐學功營乞撫金順諭繳馬械獻逆目戊寅賊于西門出三千餘人婦幼居中左右夾護金順知其詐飭諸軍嚴陣以待徐學功往受降忽鎗礮驟發徐學功策馬急進擒僞元帥何碌於陣斬之諸軍四面蹂躪悉殲其衆僞元帥黑崧以洋鎗自轟死錦棠金順入城搽捕餘孽湯秀齋生擒僞元帥馬有才金順所部亦擒海晏王奇玉馬受以獻皆磔之戮韓刑臆黑崧安得璘尸於市是時怕夏踞托克遜三城白彥虎於小虎以敗往待之甚倨令率其衆傍三城而居宗棠檄張曜嵩武軍道奇克騰木嚮闢展徐占彪蜀軍出木壘河與張曜夾攻吐魯番撥副將武朝聘馬隊一營益張曜秦玉盛一營益占彪增調總兵章洪

勝方友升桂錫楨等歸錦棠調遣張曜徐占彪防所距吐魯番遠近險夷不一令各計程途爲啓行先後張曜西行後以總兵劉鳳清豫軍八百移駐七克騰木護運道占彪防所以總兵徐萬福三營提督范銘一營代之錦棠自烏魯木齊進師以錫綸各營代守後路是時大雪封山諸軍不能踰嶺而南期來歲春融大舉規復南路南路自乾隆二十四年平定後建城凡八曰喀什噶爾曰英吉沙爾曰葉爾羌曰和闐曰阿克蘇曰烏什曰庫車曰喀喇沙爾世呼爲南八城而吐魯番別爲一部不在八城之列以其城在南山之南爲南八城門戶官吏兵民商賈赴回疆者必取道於此故志西域者附列之進勦之師錦棠自北而南張曜徐占彪自東而西宗棠念大軍前進攻克城堡駐守不可無軍師行日遠防兵日增戰兵日減勢有固然昔張

格爾之變僅踞南路西四城其時張清先扼阿克蘇擊退逆衆然後東四城無敢蠢動長齡楊遇春乃得據無賊之地以擊賊餉豐運速卒成底定之功此次兵由烏魯木齊進局勢依然而吐魯番達板城托克遜皆爲賊踞其致力難易固已判然因奏調記名提督金運昌皖軍馬步五千由包頭西行歸錦棠調遣

戡定新疆記卷三

武功記三

三年春宗棠令諸軍三道並進三月丁巳朔劉錦棠由烏魯木齊踰嶺趨達坂徐占彪由穆家地溝張曜由哈密並趨吐魯番錦棠亦分軍會之曜飭孫金彪以五營先進與占彪會鹽池七克騰木者吐魯番門戶也賊築壘拒守議先攻之壬戌占彪飭何玉超宋賢羣黃祖福率馬步三營夜抵張家卡去七克騰木二十里賊方酣眠步勇踰北壘入內外齊發賊驚逃邀殺甚夥癸亥何玉超等進攻七克騰木甲子占彪金彪軍皆會四面凌城賊奪門出占彪所部鎗斃紅衣賊目一羣賊奔關展追斬百餘乙丑乘勝攻關展賊望風遁兩軍追之金彪擒斬安集延賊目才米牙斯等安逆聞敗招集關展一帶賊衆

據魯克沁勝金臺諸處欲併吐魯番守賊致死一戰戊辰占彪進軍魯克沁賊黨迎戰擊敗之金彪至連沁臺壘賊分竄躡追至勝金臺悍賊數百出土城抗拒金彪縱兵奮擊擒斬安集延賊二十三兩軍會哈拉和卓城東守賊亦倉皇遁已巳師至吐魯番城外十餘里賊列陣拒守占彪金彪張兩翼大呼突陣賊殊死鬪乃麾馬隊抄襲賊潰竄追至吐魯番城下賊傾巢出門敗賊亦回戈抗拒適劉錦棠遣羅長祜譚拔萃領湘軍自北路至合攻之弊賊無算餘黨西奔怕夏僞官阿奇木馬人得乞降遂會克滿漢兩城釋本城纏回萬餘令復業先是科布多差員松秀解官駝赴金順軍行抵札哈沁鄂隆布拉克台騎賊百餘持鎗劫之去並掠台馬參贊大臣保英奏之詔問此股賊匪究由何處竄出宗棠附奏天山自烏魯木齊盤折起

伏至古城巴里坤哈密一帶山左爲回部右爲準部沿山一千數百里逕路紛雜零騎伏伺山梁其乘間劫掠實有防不勝防者雖分營扼布護運道則不能兼顧營壘顧營壘則不能兼護運道官商車馱因而失事者有之嗣增調捷中捷左兩旗步隊新練精騎兩起馬隊屯巴古之交劉錦棠派馬步各營分駐古城迤西然後運道漸暢按賊竄北路以南路之達坂托克遜爲總要賊竄東路以西路之闕展七克騰木鹽池爲總要張曜前以東西兩鹽池有營扼紮則巴古中間防務漸可解嚴先飭孫金彪帶馬步四營駐之劉錦棠張曜徐占彪三路進規南疆均排搜而前原爲斷賊來徑現復飭提督鄒今柄率捷中旗總兵陳國珍率捷左旗提督范銘率白馬營二步隊提督丁桂智副將王玉林率精騎兩馬隊防護巴古運道古城迤西至烏

魯木齊飭金運昌率卓勝全軍分撥延紮似此防剿並籌布置益密回逆游勇之患當可無虞前敵各軍亦無憂後顧矣三月己未錦棠率諸軍抵柴窩舖留營守之是夜銜枚疾趨達坂期五鼓會城下立合鎖圍杜賊竄逸中途遇賊諜皆斬之近城十里擒兩賊言達坂城賊謂官軍猶屯紅廟也城外草湖淤泥深及馬腹蓋賊所引欲以阻陷官軍余虎恩陶生林夏辛酉率馬隊掠過深淖列城左山岡譚上連譚和義戴宏勝陳廣發率步隊列城後山阿黃萬鵬崔偉畢大才馬正國禹中海等各以馬隊環聯兩軍而陣天明賊瞥見官軍環列則擎洋鎗指擊並發開花大炮我軍傷亡十餘人屹立如故自卯至午城中鎗不絕錦棠策馬巡城壕誘賊出擊所至子下如雨從騎有傷者錦棠所乘馬亦斃易馬而前飭各營築壘掘壕以斷援賊辛酉

譚拔萃以開花大炮至相地築台山後有賊五六百騎來援即飭馬隊迎剿賊殊死鬥余虎恩令長矛攢刺賊應手而倒陶生林夏辛酉復率隊夾擊之賊潰逃道遇騎賊千餘告以敗狀因合股奔竄時怕夏次子海古拉守托克遜前後援騎皆所遣也錦棠以援兵既敗賊必突圍求出議諸軍嚴備之列燧通宵照耀如晝壬戌炮台成侯名貴莊偉以大炮三環轟不斷城中炮台傾圮城身及月城亦缺數口最後轟入城中子藥房屋瓦磚石皆飛風起燄張延燒賊儲藥彈及開花子砰訇震撼賊中人馬碎裂羣回奪門走官軍遏之不得出錦棠使人傳呼縛獻異裝者有賞大小頭目悉致麾下無一脫漏遂克達板城是役砲斃賊二千餘俘獲亦相當並禽其大通哈愛伊德爾呼里大通哈者猶華言大總管也胖色提六一愛什邁特一宜牙子

邁特一毛刺阿邁特一他亦爾呼羅一愛里邁特一邁買地里胖色提者猶華言營官也安集延玉子巴什三十六南八城玉子巴什二十二玉子巴什猶華言哨官也其餘夷職尙多則華稱管理執事什長之類于是大通哈及諸胖色提同聲代怕夏乞款願縛送白彥虎繳回南八城以贖死錦棠聽其致書招怕夏羈大通哈等隨軍釋安集延南八城纏頭及土爾扈特種人勿誅悉給衣糧縱歸前此潛逃烏垣求撫土回三百餘給牛種令就達坂舊城耕墾復業夷回大歡丁卯錦棠自建坂西南進搗託克遜戊辰抵小草湖纏回報安酋聞達坂已失驚懼圖竄白彥虎喉死黨四出劫掠人畜焚燒村堡脅衆隨奔錦棠飭馬隊先發步隊繼之未至城見火光四起隱隱聞鎗炮聲知賊正圍攻莊堡黃萬鵬率馬隊急進賊大隊自路旁空莊突出

四面環攻勢張甚黃萬鵬崔偉畢大才禹益長禹中海李金良左右
礮突適錦棠以大隊至與諸將三路長驅而進將抵城鳴鼓噪呼賊
衆驚潰自焚存糧火藥棄城走諸軍追擊黃萬鵬等復自後乘之賊
尸枕藉天明遙見餘賊千騎西向而逃錦棠飭譚上連董福祥率馬
步窮追遂復托克遜城纏頭及吐魯番哈密迪化陝甘各回被裹脅
者約二萬餘乞降錦棠受之令繳馬械聽候安插初怕夏聞北路已
平知官軍必下南路與白逆移達坂新城于兩山間堅厚倍常以大
通哈守之又以次子海古拉據守托克遜扼南路總隘亦築兩城相
犄角而自居喀喇沙爾左右策應以距官軍吐魯番舊有滿漢兩城
尙完固海古拉又日役萬夫堅築王府固自謂有恃無恐也乃官軍
一鼓而下達坂乘勝進攻自度不支白彥虎卽棄吐魯番海古拉卽

棄托克遜蒼黃西遁莫敢支吾宗棠以南入城門戶洞開應卽振旆
長征符綏進急戰之議怕夏如知去逆效順縛白彥虎獻南八城固
可不重煩兵力否則深溝高壘先據形勢圖老我師則官軍分道長
驅集糧轉饋事不容已飭錦棠速謀進取咨張曜同赴前行令孫金
彪徐占彪留吐魯番加意拊循吐魯番同知巡檢各官均刊木質鈔
印邊員攝理奏入得

旨允行宗棠金順復會奏張曜徐占彪兩軍與劉錦棠別部同時會
克吐魯番滿漢兩城以戰事言似未若達坂托克遜之神奇而破敵
之果赴機之速非將士踴躍用命其效固不臻此

詔劉錦棠賞戴雙眼花翎張曜賞一等輕車都尉仍兼雲騎尉世職
徐占彪孫金彪均賞頭品頂戴餘獎賚有差陣亡總兵譚聲俊等四

十二員均予

優卹夏五月

上諭關外軍情順利吐魯番等處收復南八城門戶洞開自當乘勝底定新疆殲除醜類以竟全功惟計貴出於萬全事必要諸可久吐魯番固爲南路要隘此外各城如阿克蘇等處尙有可據之形勢否回酋報知怕夏縛獻白彥虎繳回南八城之說是否可恃喀什噶爾逆首依附彼族尤易枝節橫生伊犁變亂多年前此未遑兼顧此時如能通盤籌畫一氣呵成於大局方爲有裨該大臣親總師于自以滅此朝食爲念而如何進取如何布置諒早胸有成竹爲朝廷紓西顧之憂其卽統籌全局直抒所見密速奏聞宗棠復陳伊古以來中國邊患西北恒劇於東南蓋東南以大海爲界形格勢禁尙易爲功

西北則廣莫無垠專恃兵力爲強弱兵少固啟戎心兵多又耗國用以言防無天險可限戎馬之足以言戰無舟楫可省轉饋之煩非若東南之險阻可憑集事較易也周秦至今惟漢唐爲得中策及其衰也舉邊要而捐之國勢遂益以不振往代陳蹟可覆按矣顧祖禹地理最稱淹貫其論方輿形勢視列朝建都之地爲重輕我

朝定鼎燕都蒙部環衛北方百數十年無烽燧之警由科布多烏里雅蘇台以達張家口皆分屯列戍斥堠遙通而後畿甸晏然蓋開新疆立軍府之所留貽也是故重新疆所以保蒙古保蒙古所以衛京師西北指臂相連形勢完整外患自無隙可乘若新疆不固則蒙古不安匪特陝甘山西各邊時虞侵軼防不勝防卽直北關山亦將無晏眠之日而況今昔攸殊俄人拓境日廣由西而東萬餘里與我北

境相連僅有蒙部爲之遮闕徙薪宜遠曲突宜先尤不可不預爲綢繆

高宗平定新疆拓地周一萬里一時帷幄諸臣不無耗中事西之疑聖意堅定不搖者擴舊戍之瘠土置新定之腴區邊軍仍舊餉不外加疆宇益增鞏固可謂長久計耳方今北路已復烏魯木齊全境祇伊犁尙未收回南路已復吐魯番全境祇白彥虎率其餘黨偷息開都河西岸喀什噶爾尙有叛弁逃軍終煩兵力此外各城則方去虎口而投慈母之懷自無更抗顏行者新秋採運足供餘糧栖畝鼓行而西宣布

朝廷威德且勦且撫無難速復舊疆此外如安集延布魯特諸部落則等諸邱索之外聽其翔泳故區可矣英人爲安集延說者慮俄之

蠶食其地於英有所不利俄方爭土耳其與英相持我收復舊疆兵以義動彼將何以難之設有意外爭辯枝節橫生在我仗義執言亦決無所撓屈至新疆全境向稱水草豐饒牲畜充牣者北路除伊犁外奇台古城濟木薩至烏魯木齊昌吉綏來等處回亂以來漢回死喪流亡地皆荒蕪近惟奇台古城濟木薩商民散勇土著民人聚集開墾收穫甚饒官軍高價收取足省運費自餘地方必須經理得宜始有復元之望南路各處以吐魯番爲腴區八城除喀喇沙爾所屬地多磽瘠餘雖廣衍不及北路而饒沃或過之官軍已復烏魯木齊吐魯番雖有駐軍之所而所得腴地尙不及三分之一若全境收復經畫得人軍食可就地採運餉需可就近取資不至如前此之拮据憂煩張皇靡措也區區愚忱實因地不可棄兵不可停而餉事實絕

計非速復腴疆無從著手局勢所迫未敢玩愒相將奏入稱

旨是月戊辰哈密回目和木牙斯等至托克遜行營訴稱哈密回王邁哈默特之母前被回逆裏魯南行會三赴南路一入吐魯番境訪尋均被怕夏監押上年聞官軍破古牧地紅廟子今年破達板城逆衆震懼

天威釋放纏頭九百餘怕夏復殺數十人餘多羈押各城纏回愈不受其約束怕夏憂懼已服毒死其子海古拉沉尸于水三日裏以香牛皮嗾其死黨畀行庫庫纏回又擒海古拉去殺之半途張曜得吐魯番纏回報亦同接怕夏自稱畢調勒特汗有子六人長哎哥卽伯克胡里非所愛也次哎都魯股魯急呼則海古拉次引上胡里次邁底胡里第五子曾充阿克蘇伯克與第六子均不知名海古拉旣誅

伯克胡里仍自王南境回夷推白彥虎守庫爾勒彥虎自踞開都河西岸覬入俄羅斯留其黨何某統兵三千守喀什噶爾何某者本中國叛弁以其女改名色哩瑪罕妻怕夏故得任用此外有安集延兵數千漢人五六千纏回萬餘均薙辮回裝以自別安集延在浩罕各部中最爲強悍怕夏以兇狡之性憑險遠之資久踞南疆狡焉思啓不恆夜郎自大已也自大軍之西紀律嚴明逃賊而來及被賊裏脇者錦棠張曜盡心撫卹前後送歸烏魯木齊者二千七八百口送歸哈密者二千五六百口皆給以牛種俾各安業宗棠具以奏聞得旨逆酋怕夏偪脅回衆佔踞南路各城肆其荼毒罪惡貫盈今既窮蹙自斃餘衆勢必渙散惟白彥虎尙踞開都河西岸該逆稔惡已久罪不容誅喀什噶爾爲叛弁何姓所踞自應乘此聲威速籌殄滅左

宗棠擬俟新秋採運足供鼓行而西刻下已屆秋令著卽檄飭各軍
尅日進兵節節掃盪各城回衆素受逆酋脅制非盡甘心從逆此時
大軍西行咸知效順自當分別良莠勦撫兼施以安衆心白彥虎素
稱狡猾務當設法就地擒斬毋任再行遠竄怕夏之子除海古拉外
尙有數人現在竄匿何處並著查明具奏宗棠以白彥虎一股偷息
開都河西岸一聞官軍進逼自必鼠竄其竄路凡三一西竄庫車阿
克蘇一帶一迤西而北竄伊犁一東南竄羅布淖爾取道吐魯番界
東竄敦煌以就海藏之路就三路而言如西竄庫車阿克蘇是官軍
追賊必出之途無庸別籌布置如旁竄羅布淖爾地僻人稀逆衆盤
旋山澤間難冀兔脫狡謀或不出此惟翻山而竄伊犁邊界以出昌
吉綏來則地勢平行道路紛歧非預爲堵勦不可密飭錦棠張曜就

近攔截渴賊奔衝免分兵力如其回竄而南張曜所部及留後各營當相機截擊巴里坤哈密安西等處防營節節布置尙可無虞所宜預籌者北竄一著請

勅北路各大臣一體嚴防以昭周密

上諭金順英翰榮全額勒和布車林多爾濟杜嘎爾保英其廉督飭各營勤探嚴防實力堵勦毋任竄逸秋八月金順自瑪納斯接任伊犁將軍派步隊八營馬隊一營分紮庫爾喀喇烏蘇及八十四湖一帶餘仍留屯瑪納斯石河子沙灣等處備白逆北竄而北科屬上冬會被賊擾本年正月鄂隆布拉克台復有騎賊殺傷差員劫掠軍裝駝馬之事

上仍飭宗棠金順迅卽認真搜剿務盡根株金順旋奏科布多境內

鄂隆布拉克台因距古城爲遠中隔數百里戈壁沙磧無垠匪踪飄忽朝夕靡定聞信追勦往往後時派隊扼守又苦水草艱缺上年四月會請科布多派兵扼紮沙札蓋杜賊北竄之路後以托倫布奏稱科城兵少而止請將吉爾洪額帶赴科屬博通齊河之黑龍江馬隊二百餘名撥歸保英調遣由是科境漸安錦棠既克托克遜卽進規南城時方溽暑駐兵須涼忽使臣郭嵩燾自英吉利奏英人照會調處喀什噶爾事宜

詔宗棠體察情形斟酌核辦宗棠奏言自陝回肇亂甘回繼起關內外遍地賊氛而新疆遂因之瓦解亂北路者安索兩逆賊黨均陝甘客回也亂南路者浩罕所部之安集延酋怕夏賊黨皆其部人南八城吐魯番纏回及舊土爾扈特等種人概爲怕夏所劫不特回疆之

民望風而靡卽換防弁兵亦叛附之迨北路賊首妥得璘爲其所敗降於安集延於是怕夏闌入北路而新疆幾成異域安集延本浩罕四部之一浩罕爲俄人所併安集延遂諂附英人怕夏侵佔回部十餘年英人陰庇之亦十餘年明知爲

國家必討之賊從無一語及之者蓋坐觀成敗陰持兩端之故智也上年官軍克復北路數城英人乃爲居間請許其降而於繳回各城縛獻叛逆緊要節目一字不及經總理衙門向其辨斥乃止茲德爾比威妥瑪復以此絮聒於郭嵩燾彼意以護持安集延爲詞以保護立國爲義其隱情則恐安集延之爲俄人所有臣維安集延係我喀什噶爾境外部落英俄均我與國英人護安集延以拒俄我不必預聞也英人欲護安集延而駐兵於安集延境我亦可不預聞至保護

立國雖是西洋通法然安集延非無立足之處何待英人別爲立國
卽欲別爲立國則割英地與之或卽割印度與之可也何乃索我腴
地以市私恩茲雖奉中國以建置小國之權實則侵佔中國爲蠶食
之計且喀什噶爾卽古之疏勒國漢代已隸中華固我舊土也喀什
譯義爲各色噶爾譯義爲磚房因其地富庶多磚房故名爲喀什噶
爾南八城之富庶素以喀什噶爾與和闐葉爾羌爲最此固中外所
共知者英人以保護安集延爲詞圖佔我邊方名城直以喀什噶爾
爲怕夏固有之地其意何居從前恃其船礮橫行海上猶謂祇索埠
頭不取土地今則并索及疆土矣彼陰圖爲印度增一屏障竟公然
向我商議欲於回疆撤一屏障此何可許臣奉職邊方才疏德薄致
辱遠人輕視之心無所逃罪惟以局勢言之我愈示弱彼愈逞強勢

將伊於胡底亦惟有勉竭駑鈍不顧目前成敗利鈍圖之而已現在南路之師劉錦棠所部三十二營八月中旬分起西進張曜擬九月初旬繼發臣前調徐占彪所部蜀軍移駐巴古之間茲委記名提督蕭安徽壽春鎮總兵易開俊率馬步數營進駐吐魯番以資鎮撫與郭嵩燾片奏乘阿古柏冥殛之時席捲掃盪一語尙無不合前聞英人有遺淑性赴安集延之說已馳告劉錦棠張曜善爲看待如論及回疆事則以我奉令討侵佔疆宇之賊以復我舊土爲事他非所聞如欲議論別事請赴肅州大營彼來臣自有以折之

上嘉其奏如所議行是時錦棠已於七月派提督湯仁和進駐蘇巴什阿哈布拉八月癸未朔復飭董福祥張俊由阿哈布拉進屯岷惠張春發由伊拉湖小道與張俊會兵均負草濬泉接程以俟大隊癸

卯錦棠分各步隊由大路進自率馬隊由小路進戊申師次曲惠已酉飭余虎恩黃萬鵬等率馬步十四營取道烏沙塔拉傍博斯騰淖爾西行出庫爾勒之背爲奇兵辛亥錦棠率隊由大路向開都河進爲正兵開都河源自天山之麓匯而南趨貫庫爾勒喀喇沙爾之中下注博斯騰淖爾古所謂勃澤也白逆過開都河西岸卽壅河水阻官軍瀰漫百餘里深者滅頂淺及馬背我軍循鹹地斜行六七十里一溪前橫深可丈餘令將士泅水而渡造浮橋修車道九月癸丑朔錦棠收復喀喇沙爾城中水深數尺官署民舍蕩然無存纏回均被白逆脅隨存者匿山谷不敢出諭和碩特台吉札布德勒克遷蒙民百戶實之甲寅輕騎亂流而渡乙卯逾哈爾噶阿滿溝騎賊百餘斜掠而過追斬十餘級生擒兩賊皆安夷裝束訊之則陝回也斬之而

進是日余虎恩等亦從間道馳至同收復庫爾勒城空無人食盡掘得窖粟數千石濟軍錦棠偵白逆方脅纏回走布告爾乃揀健卒千五百精騎千親率以行疾馳四百里壬戌至洋薩爾見村堡被焚火光猶熾知賊去未遠令後隊救火前鋒及之布告爾賊騎可千餘黃萬鵬譚拔萃與戰破走之甲子追四十里復及賊瞭望回衆尙數萬持鎗矛者僅千人餘皆難民被脅錦棠令曰持械者斬餘勿問亟進軍迫之賊委難民狂奔悉遣歸復業仍以精騎追賊乙丑至脫和奈白逆已竄庫車纏回萬餘伏地號呼復慰遣之夜四鼓行近庫車聞鎗礮聲蓋白逆驅纏回西走纏回不從方以火器嚇之也黃萬鵬章洪勝分道馳擊羅長祐以馬隊橫躍入陣轟傷賊目馬由布幾擒之賊大潰追奔四十里僵尸相望遂復庫車纏回言賊動止必以回衆

隨行者一使官軍無所資藉難以窮追一欲至喀什噶爾獻之伯克胡里爲結納計也丙寅錦棠抵和色爾仍亟進拜城以指阿克蘇窮賊所往宗棠奏此次擒斬悍賊雖不過千數自名而自庫爾勒啓行躡蹤奮擊六日夜馳九百里收復哈喇沙爾庫車兩城其餘城堡回莊無數拔出被裹回衆以十萬計將士踴躍前驅不辭艱瘁奉

旨存記彙獎陣亡提督王慶福等十一員均照官階議卹九月丁卯錦棠進至拜城城門閉通事告以官軍至乃繼數人出言白逆昨經此與安集延酋脅纏回俱竄頭目阿克奈木匣不從見殺城回懼閉城自守白逆攻未下巳率黨西竄矣錦棠諭以威德頭目買賣提託呼達乃開城乞撫錦棠令諸將蓐食急進時霜凍凝積人馬趨行手足皸瘃戊辰抵銅廠賊方擁眷口渡河以騎賊數百監押纏回約二

萬餘屬集河岸官軍薄之見騎賊卽殺尸壅河流被裹纏回悉散遣復業時賊勢窮蹙顧官軍追之急念不一死鬥不足以固衆心于是白逆由左安逆右迎拒於上銅廠鎗礮環轟連珠不絕官軍亦張兩翼包之有貂衣賊乘駿馬左右指揮夏辛酉突入擒之賊衆駭愕諸將并力夾擊斃賊無算提訊貂衣賊乃安集延分踞阿克蘇胖色提要路打什也庚午我軍至阿克蘇城頭鎗矛林立西南飛塵蔽天謀報城內頭目阿布都勒滿謀率衆投誠被各胖色提縛之西去白逆亦率黨同遁城內纏回十餘萬則皆守待官軍者錦棠召回月至皆膜拜乞撫遂復阿克蘇復遣譚慎典等敗逃竄之衆于胡瑪納克河緘出哈密纏回男婦數百邁哈默特之母在焉以歸哈密賊眷二千餘送庫車安插時白逆自竄烏什噉安夷竄葉爾羌冀分兵力以緩

死也錦棠乃舍安夷勿追而專討白逆令黃萬鵬張俊趨烏什譚慎
典夏辛酉出正西會之辛未踐冰渡胡瑪納克河擒斬賊目馬有才
等壬申抵烏什城東二十里前有賊屯諸將擊破之皆潰走遂復烏
什癸酉至阿他伯什彌望戈壁杳無人蹤土回言此徼外荒地不隸
版圖間有黑利黑斯插帳游牧于此黑利黑斯者布魯特種人類生
番與新疆不通聲息白逆竄此蓋無從踪跡云錦棠深以大憝漏逸
爲己咎乞免甄錄宗棠謂連復東四城實錦棠及所部將士之力仍
奏請

獎叙陣亡總兵朱成其等十二員均從優議卹並奉

詔以白彥虎現經西竄必須設法擒拏毋任釜底遊魂再行漏網並
宜乘此兵威將西四城次第攻克以竟全功初官軍克達坂城獲庫

車迤南沙雅爾回目麻木爾釋歸故巢麻木爾曾充安集延玉子巴什既歸復煽誘土客回叛附安集延所設庫車胖色提爲之用官軍克庫車麻木爾望黨數百潛竄哈番哈番在阿克蘇城南迤西四百四十里十月丙戌有竄匪六七百與麻木爾合謀襲官軍錦棠回師勦捕庚寅抵甯河滑躡辛卯抵巴河賊已竄哈番西五十里之屈烏克拱拜河流深闊船筏盡爲賊匿錦棠飭纏回迂迴探淺策馬先進諸軍亂流而渡麻木爾嗾衆鏖門鎗礮環施譚慎典席大成戴宏勝潘長清等直前奮擊賊不能支軍士有舊識麻木爾者測準開鎗中面頰子穿耳出其黨挾之以竄遂大潰追斬三百餘級老幼婦女牲畜散匿林中壬辰捕獲眷口五百餘令回目帶歸沙雅爾當是時伯克胡里猶保西三城而和闐受撫回目呢牙斯聞官軍西進率衆進

圍葉爾羌遙與官軍相應伯克胡里閩之留頭目阿里達什守喀什噶爾身率五千騎擊呢牙斯敗之呢牙斯走歸於我伯克胡里遂併踞和闐適前喀什噶爾守備何步雲率滿漢弁兵陷賊中者數百人共據漢城遣使迎官軍阿里達什保回城以攻漢城且約白彥虎助攻伯克胡里乃棄和闐走英吉沙爾併入回城錦棠計西四城用兵應先取葉爾羌惟喀什噶爾兵民反正已據漢城機未可失遂飭余虎恩桂錫楨由阿克蘇黃萬鵬由烏什分道並進期十一月乙丑同抵喀什噶爾兩軍均受節制于虎恩錦棠進駐巴爾楚克瑪納巴什扼和闐葉爾羌之衝據形勢備策應十一月壬子錦棠至阿郎格爾遇安集延騎賊百餘斬之甲寅抵葉爾羌賊已先遁錦棠入居安夷新城飭羅長祐譚拔萃搜除餘逆安撫纏回適余虎恩馳報甲子夜

已復喀什噶爾辛丑錦棠飭董福祥徇和闐自率馬步倍道向英吉沙爾比至賊已隨伯克胡里竄喀城惟纏回二千餘戶乞降撫之而進癸酉抵喀城虎恩亦至方兩路之分馳也黃萬鵬以甲子次喀城北虎恩次城東相距六十里以賊攻漢城急議馳救之未至賊候騎馳歸呼曰大軍至矣纏回皆駭潰伯克胡里白彥虎不能禁則分路竄逸留其黨守回城以綴我軍夜三鼓兩軍抵城下城回縱火燒廬舍以騎賊拒戰虎恩身率諸軍如牆而進賊畏其整也棄壘而逸白逆所署副元帥王元林率千餘騎自固獨不動諸軍合圍刺元林墜馬斬其首餘賊不得出駢誅之黃萬鵬等亦圍他股數千于城西北虎恩既梟王元林馳往助勦何步雲等憑漢城呼譟以助其勢賊洶懼開西城出竄與外賊合奔時天色猶未明也乙丑留張俊守喀城

萬鵬出西北追白逆虎恩出正西追伯克胡里及于小虎丙寅虎恩及賊于明要洛令桂錫楨夏辛酉等由捷徑斷其去路自督蕭元亨戴宏勝前後夾擊賊勢披靡陣擒于小虎並斬哈密叛回藍得全餘賊盡殄適布魯特回報伯克胡里於昨日過此計程當抵過路峽距俄國窩什不遠俄早派兵在彼迎候矣虎恩念白逆西北竄必取道恰哈瑪由明要洛馳三百餘里可以橫截其前遂舍伯克胡里而與黃萬鵬合追白逆丁卯萬鵬至岌岌槽與賊後隊相值陣擒偽元帥馬元斬其副白彥龍萬鵬蕭元亨復先後窮追忽山澗出五六百騎裝束稍異探知爲俄屬布魯特部衆黑利黑斯也稱頭目遣來放卡知中國有人過此頭起去已遠矣告以去者爲逆賊白彥虎來者追賊官軍荅地屬俄界非先知照不得過如肅捕賊當由頭目緝送問

頭目何在答在納林河距此尙數十站蕭元亨遂轉報虎恩收隊而還庚辰董福祥定和闐擒安夷頭目達的罕條連和洛巴什俄波士回僞元帥常世和王孝友等羅長祐道經葉爾羌漏匪麻木爾糾黨二百餘人與和闐逸賊圖竄出南口長祐飭陶生林追捕十一月丁丑擒斬麻木爾等葉爾羌亦定俘故怕夏妻女及其子引上胡里邁底胡里並兩少子三孫按律治之磔于小虎馬元麻木爾金相印于市其軍民捕獻安夷陝逆大小頭目訊明正法者共千一百六十六名西四城悉平

欽定新疆記卷三終

戡定新疆記卷四

武功記四

四年春正月欽差大臣大學士左宗棠以全疆底定紅旗奏捷

詔曰溯自同治三年布魯特叛酋肇亂逆回金相印等攻陷喀什噶爾羅食南八城而吐魯番烏魯木齊等城相繼淪陷於今十有餘年朝廷恭行天討特命左宗棠以欽差大臣督辦新疆軍務該大臣勦撫兼籌議定先規北路首服烏魯木齊以扼其總要旋克瑪納斯數道並進規復吐魯番等城力爭南路要隘然後整旅西行勢如破竹現在南八城一律收復此皆仰賴

昊天眷佑

列聖垂庥兩宮

皇太后宵旰焦勞知人善任內外一心將士用命成此大功上慰
穆宗教皇帝在天之靈下孚薄海臣民之望欣幸實深該領兵大臣
等櫛風沐雨艱苦倍常允宜特沛殊恩用酬勞動左宗棠籌兵籌餉
備歷艱辛卒能謀出萬全膚功迅奏著由一等伯晉二等侯三品京
堂劉錦棠智勇深沉出奇制勝用能功宣絕域著由騎都尉世職晉
二等男余虎恩譚拔萃羅長赫黃萬鵬蕭元亨戴宏勝陶生林席大
成董福祥張俊夏辛酉等優獎有差陣亡提督鍾興發等十九員均
從優議卹安夷之圍漢城也守備何步雲楊世統把總惠良和等十
五人均隨奎英福珠凌阿堅守踰年城陷被執聞官軍將至共據漢
城反正伯克胡里白彥虎攻之彌月不下宗棠請俱革職免罪奎英
福珠凌阿及當時南疆殉難員弁均察明建祠請卹是時官軍搜捕

餘匪於葉爾羌和闐獲英吉利商官一人隨從商賈九人乳爾教頭二人商三人阿刺伯三人溫都斯坦三十餘人鄂勒推把二十餘人克什米爾七百餘人拔達克山三千餘人巴耳替一千餘人科斯普一百五十餘人哈隆普二百五十餘人乳目國紀載無所考教頭自言在俄美兩國之西素工礮火怕夏聘教洋操與諸種人均求給文回國錦棠悉宥勿誅宗棠以爲西四城地處極邊從前西方各部落往來貿易間出其途然不過偶爾假道無流寓雜處者自阿古柏招致通商種人日增遂皆視爲東道主若任其久與回部錯處異時呼朋引類邊衅易開請分別辦理願歸故土者仍卽放歸願留中土者准於關內安插以杜其勾結之萌四城舊有卡倫皆附近數十里百數十里內安設卡倫外爲布魯特十九部落錯雜而居在喀城西北

者五部落蘇勒圖察哈爾薩雅克巴斯奇斯薩爾巴噶什其名也不知何時投附俄羅斯其冲巴噶什布察克提依錦圖爾額依格爾岳百什額勒德訥色勒庫爾奇里克胡什齊諾依古特薩爾特奈曼哈爾提錦蒙額勒德十四部落向附安集延其頭目來謁錦棠願仍歸中國宗棠以喀城形勢介葱嶺支幹之中安集延布魯特地居西偏踰山而東乃達喀城本中外天然界畫請南自英吉沙爾北至布魯特界按照卡倫地趾改築邊牆於衝要間以礮堡則形勢完固界畫分明均奉

會旨初白彥虎伯克胡里兩逆竄入俄境俄人遮阻官軍遂至脫漏錦棠與諸將士願仍分道窮追務期罪人斯得宗棠奏奉

諭旨飭總理各國事務王大臣向俄國使臣理論令其告知本國縛

獻元凶恭親王等與駐京俄使布策據照俄約第八款辨詰再三布策稱此事本國能查約照辦但有交涉案件未能辦結仍須左大臣照會圖爾齊斯坦總督等語夏四月宗棠遵

旨行文而錦棠先於正月間已照會阿里木台俄官接其回文不甚明瞭大意謂此項人衆五千均係難民本國不知爲叛賊故暫留養活欲求

皇上賞還銀糧意似多索養費金順議應與圖索取宗棠謂中俄接界中間向隔哈薩克布魯特各部落所稱伊犁之連界阿爾瑪圖卽哈薩克部亂後歸俄者察哈爾卽喀城西北俄屬布魯特五部中之一其特穆爾泊卽特穆爾圖淖爾地在伊犁西南鄂爾果珠勒卡倫外四百餘里鄂爾果珠勒距特穆爾里克卡倫五百八十里特穆爾

里克距伊犁尙十數站金順駐庫爾喀喇烏蘇逾伊犁到特穆爾淖爾已三千數百里至托胡瑪克當在四千里內外伊犁現未交還未能越厄魯特布魯特哈薩克各游牧而擒白逆若由喀什噶爾烏什阿克蘇往則須踰葱嶺兩大重支山程途逾遠險阻尤甚難輕議舉兵也屬金順差員向伊犁俄官議取伊犁並及白逆五月金順派提督殷華廷直隸州知州李滋森游擊介洪亮等至俄國古鏡台與阿爾瑪總理固必納吐爾喀爾怕科斯克依相見言伊犁事語在收還伊犁篇次及白彥虎俄使云非故違約特不忍置之死地殷華廷折以兩國和好遵照約章尋常逃犯尙應拏送何況此等要逆俄使佯爲不解言我總督與左中堂早有公文毋庸再議華廷等見其理屈詞窮恐致決裂姑與委蛇而返譯其來文率藉詞俄官波塔爾烏拉

索付迭被喇嘛欺凌各案總署奏取

朝旨命新授塔爾巴哈台參贊大臣錫綸查據得其侵擾我吐爾扈特部落劫掠喇嘛廟佛像俘囚小喇嘛益足克數事所言烏拉索付迭被欺凌則烏拉索付充俄使時傲慢大言爲守備朱澍抗論所屈歸而飾詞誣訴者也錫綸以其廉未能早圖弭衅請交部查議棍噶札拉參不能約束喇嘛請罰俸朱澍褫職悉如議行而俄人仍底白逆不交縱其黨勾結土回四出劫掠伊犁各城尤爲匪藪於是沙泉子托多克台沙窩大河沿諸處官餉商貨被劫無虛日戕官弁殺行客掠台馬其徒或數十或百餘防軍時時追勦之不能絕也防禦滿成阿披甲長春等前後皆以追賊陣亡逆燄愈張浸及南路矣金順軍擒賊呢牙斯常石清丁哈春供賊著名者孫義合白老虎金山皆

白逆餘黨劉錦棠派提督楊金龍等率隊掩捕又念賊踪剽忽見官軍躡之不敢東犯必繞由喀什噶爾取道拜代里克以入俄境復飭羅長祐夏辛西各營會纒回布魯特馬隊赴邊隘邀之九月壬子長祐等至阿爾圖什知賊已由索封口竄逸卽長驅四百餘里先抵冲壳罕據險以待甲寅賊至我軍設伏山前後瑪木特出隊誘之賊易其少直前搏戰伏發圍之數重短兵接斬賊目賽屹塔黑振江餘衆幾盡金山跳免旋爲布魯特擒獻訊之言白逆饑困詐領俄票貿易鴨爾湖遂與馬壯孫義合劉士林馬良會分路犯邊錦棠磔以徇頤之馬良會孫義合均爲孫金彪所獲伏誅宗棠奏狀請以所獲俄票知照俄使備案十月己丑安逆阿里達什糾衆入寇先是阿里達什敗竄俄境潛與其黨奉迭位什罕爲條勒勾結布魯特頭目阿布都

勒哈瑪及其子買賣提斯拉木等謀襲踞喀什噶爾辛亥至玉都巴什使其徒赴塔什密里克糾衆亦分兵入烏怕爾之瑪雜爾誦經散食瑪雜爾者亦稱拱拜回衆之祖墓也錦棠聞警飭張俊進兵塔什密里克而自將趨烏怕爾壬辰至賊返走玉都巴什合大股以抗官軍錦棠追及之麾軍疾戰勢如風雨賊密施槍礮殊死鬥夏辛酉怒馬陷陣斬執旗賊目一人奪其旗而舞諸軍喜呼譟乘之斬獲數百賊潰竄追至布魯特遊牧地不見賊蹤知己入南山乃還時葉爾羌卡倫外布魯特已陰受錦棠檄隨機勦截甲辰阿里達什至左曼回目庫彌什拒之方戰伏起聚而殲焉並獲阿里達什所佩玉印以獻惟阿布都拉哈瑪父子得脫入俄俄人處之阿來之境張俊至塔什密里諸回受誘脅者三百餘人俊悉誅之宗棠具奏並言俄人任阿

逆入寇甚非友邦睦誼請飭總署仍知照俄使備案安集延酋愛克木汗條勒者故叛酋張格爾弟玉素普之孫也與其弟阿希木汗條勒並狡悍有部衆阿布都勒哈瑪既敗入俄思再舉力不能乃詭說愛克木汗兄弟及咬買提和卓令與阿古柏復仇和卓條勒皆回部尊其教祖後裔之稱也阿逆又詐言南路有衆數萬許爲助愛克木汗信之率其屬千餘脅誘布魯特各部千八百人自烏魯克恰提取道卡浪圭內卡以入明要洛官軍扼守不得進十二月癸卯繞竄畢勒套格依

五年春正月乙巳溯復折而南趨博斯塘特勒克踞之其地左右高山中爲廣谷饒水草出谷而東南爲烏魯阿提外卡有徑通色勒庫爾再東卽塔什密里克出谷正東爲烏帕爾稍南卽玉都巴什地皆

戈壁谷之西北爲阿依阿提再四三百餘里爲俄屬接壤之黑子里
拉提達板賊利其四通莫盡脅希布察克各野回以厚其勢也錦棠
謂戈壁無障警易爲賊窺不如設伏山谷以待之乃陰縱內卡布魯
特爲間入賊中言官軍無多誘之深入辛亥賊遊騎至烏帕拉特近
邊偵知後隊約二千餘騎錦棠飭張俊胡登花以步兵趨烏魯阿提
董福祥等以騎兵抵胡素魯克有便則進逼畢勒套格依扼其旁竄
回竄之路皆偃旗臥鼓以行癸丑錦棠率諸將自喀什噶爾漢城而
進賊欲夜襲烏帕爾營謀者以告錦棠念南路地平不能扼其吭也
飭羅長祐由北路徑搗其巢至則賊方眠長祐悉誅殺守者五百餘
人奪其巢而據之賊前隊去已遠不知也方都署其衆分伏烏帕爾
戈壁天明百餘騎徑來犯營劉必勝何俊禦之逐北數里賊伏騎自

西南谷出圍陣內嚮環圍我軍鎗礮如雨何俊傷賊圍益急段伯溪張復良以援軍大至賊乃退追斬數十百人賊反投其營遂收隊而止甲寅賊近博斯塘谷口羅長祐設伏谷中令譚慎典等於谷外布陣賊瞥見大驚然業已相值則抵死定拒分其騎爲四五十團團可四十騎更番迭進戰良久互有傷亡長祐率馬隊持長矛衝入所至披靡譚慎典斬買賣提斯拉木於陣楊金龍方友升復左右蹙之無不一當百賊敗竄入谷伏兵起斬其騎千餘買賣提和卓阿希木汗條勒皆死餘五百騎繞谷外西竄欲出阿依阿提長祐遣將追之約至俄界而止丙辰及之阿依阿提斬獲甚衆愛克木汗條勒阿布都勒哈瑪竟以百餘騎遁入俄境是役也擒斬胖色提十有七曰買木特甘吉曰塔什巴易曰他什伯克曰開里木曰土魯普曰太呢胡呢

曰卜根胡里曰塔什買提曰買賣提胡里曰赤目瑪儀曰遙子買賣
提曰呼土魯克曰沙底克曰沙悟的曰哈生木曰滿素爾曰其祥比
皆阿古柏舊人玉子巴什六十有奇安集延布魯特賊二千有奇董
福祥張俊所誅旁竄者又數百人我兵亦失總兵李青雲等十八員
兵勇百餘人奏入

上嘉劉錦棠決策制勝頒賞珍物將弁獎敘有差李青雲以下從優
議卹亡何愛克木汗條勒阿布都勒哈瑪爲俄官驅逐由阿來竄出
欲盜踞邊城暫延喘息哀懇安集延布魯特各回爲助展轉誘煽從
者漸多六月乙未竄至烏魯克恰提渡河而南招致諸部錦棠與諸
將議烏魯克恰提距喀什噶爾七百里中隔戈壁賊由此南竄必出
烏帕爾西南竄必出色勒庫爾以兩地饒芻糧故也遂遣羅長祐赴

烏帕爾築堅壘扼之飭西南沿邊各布魯特徙帳內地以避賊而自
按兵喀什噶爾伺賊所向阿布都勒哈瑪旋踰嶺南竄色勒庫爾愛
克木汗濟河南會之七月丁亥色勒庫爾阿奇木阿布都勒哈山等
聞賊將至出屯蘇巴什之南留伯克夏素唐居守賊知要隘已扼辛
卯繞道薄城下衆約三千餘人丁酉夏素唐詐降誘賊阿布都勒哈
瑪信之親詣城下夏素唐預選死士豁罕等二十餘人自隨甫相見
王子巴什蘇乃滿突前挽其韁酋大驚斫蘇乃滿斷其指而逸豁罕
以鎗殪之斬其首復入城守賊忿甚攻圍益急時錦棠以阿奇木等
出屯慮城民驚怖自將馳赴之八月甲辰至勤的克賊解圍北竄乙
巳踰卡拉塔什達板至秦爾里安癸卯至布倫可西南距色勒庫爾
四日程錦棠以賊蹤漸遠非繞路捷追勢難相及丙午飭董福祥兼

程夜進自與營務處袁堯齡繼之丁未福祥抵察哈爾良聞賊已先過戊申至空台根滿斯有賊數十騎奔竄木吉福祥察賊所食牛羊血猶殷地知大股不遠念軍士兩日一夜馳三百餘里已疲極而勢不可止乃挑健卒乘驪隨馬隊窮追及於木吉賊列隊河南分騎爲數十團依山傍河排次甚整張俊夏辛酉直前渡河左右抄之戰方酣有綠衣賊酋執紅旗指揮出入數四勢悍甚我軍以鎗擊之顛賊遂潰追奔里許復鳴角返旆拒戰甚力夏辛酉分兵繞出其背自率馬隊直貫其陣賊見去路將斷遂大奔張俊隨而擊之數十里間賊尸枕藉庚戌至黑子拉提達坂賊率餘衆數十踰嶺入俄界乃止凡陣斬胖色提等六十三尤著者曰買賣賽亦提曰買賣提巴巴曰阿子曰亦薩克曰白奇巴圖魯曰阿里必曰開拜克拉八和洛曰毛拉

和買提曰邁提恰力克曰可坎乎完提曰托乎大曰克力恰克買賣
賽亦提阿古柏派充喀喇沙爾大通哈買賣提巴巴亦所署烏什大
通哈也蓋至是阿逆餘黨幾盡矣宗棠以聞且言師行所至率皆荒
匱阻絕之區石壁氷梯上插霄漢鳥道陡絕蹂附而升俯視幽壑冥
不見底士卒染瘴及糧駝戰馬之傷斃者不可勝計蓋自出關以來
艱阻勞瘁以是役爲最云是時巨寇已平邊圉晏然流亡漸復惟俄
人議歸我伊犁久不決侍郎崇厚以全權大臣出使與俄人定新約
償兵費二百八十萬而劃伊犁西界數百里予俄又割南界數百里
跨天山以隔南八城其他侵佔口岸尤多崇厚已赴黑海畫諾矣
上怒其輕率褻職逮問有

詔令疆臣策萬全宗棠奏此時惟有先之以議論委婉而用機次之

以戰陣堅忍而求勝語具收還伊犁篇

上壯其言宗棠因自請出屯哈密規復伊犁

六年春正月

詔劉錦棠幫辦軍務二月宗棠分兵進取伊犁奏以精河一帶爲東路伊犁將軍金順主之所部馬步萬人檄卓勝軍二萬人爲之助自阿克蘇沿特勒克斯河爲中路廣東提督張曜主之所部馬步五千人增募皖勇千人士爾扈特馬隊數百人復檄湘軍二千五百人爲之助自烏什經布魯特游牧爲西路幫辦軍務劉錦棠主之所部馬步萬餘人而分遣譚上連步兵二千餘人屯喀什噶爾譚拔萃等二千餘人屯阿克蘇陶鼎金玉福田等二千餘人屯哈密爲後路聲援塔爾巴哈台與俄偪處參贊大臣錫綸兵不足募徐學功孔才舊部

二千界之四月乙卯宗棠發肅州輿觀以行五月乙亥抵哈密俄人聞

王師大出增兵守伊犁納林河而以兵船翔海上冀震撼京師於是天津奉天山東皆警七月

詔左宗棠入京備顧問劉錦棠署

欽差大臣張曜幫辦軍務楊昌濬署陝甘總督山西巡撫曾國荃督辦京東軍務屯山海關提督鮑超屯樂亭直隸總督李鴻章整飭天津海防八月劉錦棠軍至哈密十月張曜移住喀什噶爾總西四城邊防分嵩武軍屯英吉沙爾移董福祥等屯和闐葉爾羌羅長祜等屯阿克蘇瑪納爾巴什譚上連屯葉和西城余虎恩屯烏什譚和義屯吐魯番譚拔萃屯庫車哈喇沙爾左宗棠道甘陝山西赴京令知

府王詩正率旌善馬隊親軍步隊行草地赴張家口備調遣

七年春正月和議成海防諸軍皆罷二月左宗棠至京授軍機大臣曾國荃擢陝甘總督乞病還湘以譚鍾麟代之時毅勇侯曾紀澤與俄人更定約章

詔金順接收伊犁參贊大臣升泰錫綸佐之語具收還伊犁篤劉錦棠真除

欽差大臣

八年春三月譚鍾麟劉錦棠奏設新疆郡縣先是左宗棠建議開設新疆行省

上可其奏至是譚鍾麟劉錦棠度地勢量廣狹物土宜備員品詳議具奏下吏部議行語具置省篇

九年四月劉錦棠譚鍾麟始委員試署南疆道廳州縣修城垣建
壇廟理塵市置倉厥通郵傳設塘站定賦則立學校語具置省及善
後篇於是百廢具舉民氣大和風塵永清磐石彌固矣

戡定新疆記卷四終

戡定新疆記卷五

糧餉篇

塞外用師籌餉難於籌兵籌糧難於籌餉路阻以遠勞費倍千百籌轉運更難於籌餉籌糧其大較也

國朝屢征西域皆豐亨豫大之時士飽馬騰師武臣力役不逾時而大功者定咸豐之季勢稍殊矣中原擾攘兼顧弗遑其時文麟成祿景廉榮全諸統帥各自爲軍亦各自爲餉紛紜俶擾無足紀錄自內患既平於是合天下之力濟絕幕之師中間海防并務籌濟益難語其度支則竭澤之漁也校其精銳則強弩之末也而聖謨堅定于上老成擊盡于下卒能殄殲大懟載纘

武功嗚呼偉哉謹采撫糧運方畧爲糧餉篇第一

同治十三年秋八月

上以大軍陸續出關派左宗棠督辦糧餉轉運以內閣學士袁葆恆爲幫辦移西征糧台於肅州令葆恆前往駐劄先是十二年秋白逆竄擾哈密

朝旨已命宗棠飭各屬籌辦軍糧在玉門安設轉運糧台宗棠旋請簡任戶部堂官總司其事有

詔不許是冬十二月又

詔宗棠統籌各軍所需糧餉軍火每月應用若干寬爲預備毋令稍缺如各軍逗遛不前罪在主將儻因糧乏貽誤惟左宗棠是問並飭查明關外運道繪圖呈覽宗棠奏言由肅州出嘉峪而西本漢唐行師大道使關內糧足供裹帶車馱馳隻足供周轉出關之兵何憚不

進然出關非難至由安西抵哈密計程十一站千里而遙經由戈壁無台站無水草砂礫縱橫人馬困躓中間僅安西城北四站馬蓮井尚可小憩過此又七站始抵哈密回城地賤而腴纏回聚居軍興以來音耗闊絕近被白逆股匪竄擾餘糧能否採買更無從知前與諸軍集議官軍分起次第前進必先將甘涼採買糧料運存肅州又由肅運至玉門然後頭起開拔至玉門又用私駝轉運玉門存糧赴安西騰出官駝官車轉二起軍糧而後第二起繼進餘均仿此比抵安西作一停頓又寒糧進哈密如此層遞銜接人畜得以稍舒而士氣常新可免意外之慮又言肅州安西共隸一道而產糧贏絀迥殊肅州高台腴地也安西玉門頗多沙磧而敦煌爲上腴軍興以來民困逆回擾掠復苦官軍攤捐久矣人民存者不過十之三四地畝荒廢

大半官軍借興屯之名先給子糧牛價抵算採買糧銀搜括抑勒戶口流亡自白逆竄出關外安敦玉彫邊之狀較勝從前臣在肅見難民絡繹入關恐轉徙日多荒地無人耕墾籌銀三萬兩分給三州縣並發寒衣萬襲賑之冀留此災黎盡力耕墾庶異時餘糧出糶關外各軍可就近採買然目前軍食不能取給安西甘涼肅素稱腴地頻年戎馬被害最酷自徐占彪偏師搗肅諸軍戡定河湟甘涼道路肅清農民得安耕穫兩年來尙供官軍採買然死亡既多川原耕種不過十之二旱地更無過問者臣由蘭到肅途間士民紛紛求免採買經臣再三開導除留民食及子糧外諭悉數出糶幸三郡民情樸愿知官軍誓滅此賊且能不擾遂得集有成數通計涼甘肅三郡定買市斗京糧十六萬三千餘石按照額徵倉斗則三十餘萬石幾敵通

省常年額賦雖優議價值每市斗一石重三百餘斤給銀四兩而民繳納不前市價驟長每石章至六七兩之多據甘州府縣稟報棍徒喬良廷李太和造謠煽惑阻納官糧以致市肆抬價貧民糴食無出軍民交困臣察訪得實立飭將喬良廷李太和杖斃並以署甘涼道蕭宗幹辦理顛預撤任查辦民間交糧乃漸踴躍然以定買糧料總數供金順張曜額爾慶額三軍食用及糧運車駝隻防營所需食用算至明歲六月新熟尙短糧料市斗二萬餘石現擬盡括額徵本色及各標營季糧陸續填補未知能否足敷且甘肅地氣高寒麥秋雖在六月而民間割麥完畢必堆積成垛俟稟糜結脫始便碾打上市臣此次七月由蘭啓行八月十二抵肅沿途村舍麥垛雖多而繳官上市者少明歲節候雖早計民間繳納新糧必俟八月陳糧尙應

寬籌兩月庶新熟之交得資接濟此籌糧艱苦之情形也就轉運言自涼州至肅九百里自肅至安西千四百餘里路多砂石用駝爲宜惟駝非豈所畜向來民間惟騾馬牛驢以供農事藉應差徭所有惟木輪大車不耐負重遠行頻年賊回擾掠牲畜極少差車無供上年成祿出關強拉差車數百輛甫至玉門車夫棄車而逃並騾馬亦拋置不顧無從措手臣派弁三路出口採馱三千值蒙古馱少價昂採不及半報到僅六百餘隻臣過甘郡道府請重價雇民車每運糧百斤行百里許給銀四錢其應出差車給銀二錢計四十餘日民車差車運糧料到局不滿三千石幸臣前調集各營官騾千有六百先後到齊勉資周轉而前用民價在蘭州平涼所雇商民車馱駝隻及袁葆恒在河南購辦車輛亦陸續搭運軍裝軍火抵甘於是轉運稍旺

肅州乃有存糧以後可不須重價雇民車然通計由涼甘採糧運肅
由肅駛運至安西合計民運車駝隻脚價及官車官驛官駝員弁
人夫薪糧牲畜口袋什物局費一切攤算每糧百斤需用銀十一兩
七錢內外勞費如此豈此時財力所堪若非預籌撙節動言用衆恐
官軍餉餽不繼精膏儲峙早空不但後來難保此不竭之源卽目前
出關之師且憂飢潰此轉運艱苦之情形也自古關塞用兵在精不
在多穆圖善步隊皆冗雜之軍不獨虛糜至艱之餉且恐有礙大局
請

飭其仍帶所部吉江馬隊駐安敦玉督辦轉運其步隊概予撤遣以
節虛糜得

旨允准宗棠又念裁撤步隊撙節雖多若出關糧價運脚均於正餉

劃扣士卒何以爲生復奏言各軍餼事本有一定數目以協解實數
按照員弁兵勇長夫均勻攤算計每名每年可得三十餘兩實銀除
備製造添補軍需軍裝購買駝隻之用別無餘贖至糧料牽算計每
人所食月須淨糧四十五斤馬隊一騎日需料五斤草十二斤兵勇
長夫兩名月需食糧九十斤照步隊攤算馬隊一營二百五十騎抵
步隊一營五百人長夫二百名之數料價稍減腳價則一運道近脚
價猶少運道遠脚價增多現籌出關轉運脚價多於糧價數倍者兵
燹後人物凋殘絲毫不能藉資民力與承平時迥異無論子遺之民
尙須官賑賑糧尙須官運也各軍馬步兵勇每月應得實銀三兩有
奇若按照食用糧料脚價攤扣則馬步兵勇即將所得實餉盡數賠
繳尙須找銀繳局萬無是理若不按名按騎攤扣則糧料價值轉運

脚費又將何出請

飭下戶部兵部會議出關各軍應得正餉每名每月若干兩戶部旋奏應由左宗棠查明出關軍營弁兵實數所需正餉糧料運脚等項按照例章並體察關外情形每月實需銀若干及出關各營原撥餉項分晰聲敘先行奏明宗棠上言張曜所部嵩武軍馬步十四營按人馬實數每月應支淨糧料四十三萬六千九百五十斤其管驃駝弁夫應支食糧驃駝應支食料尙不在內該軍由河南應餉每月應得正雜餉銀三萬六千二百八十餘兩若將糧料價值轉運各費攤扣不但全軍無餉且欠數甚鉅請將該軍糧運經費作正開銷宋慶所部毅軍步隊十四營又一旗馬隊一營又一起統計步勇七千二百名長夫千五百餘名馬勇四百名長夫百三十六名共計馬步勇

夫九千一百三十六名隨員差弁丁夫不計月需淨糧料四十九萬三千一百餘斤照河南餉章大建月支銀四萬二千餘兩小建月支四萬一千餘兩該軍暫駐涼州甯夏就近採運糧料供軍價平脚省尙毋庸議加現擬撥馬步勇丁千名馬百餘匹先進哈密放水灌池爲續進開墾計及將來出關所需糧運屆時必照張曜餽事議增得旨允行由是各營得正雜餼欸以資食用津貼軍情大愜惟部議宗棠原奏出關各軍運脚每糧百斤需銀十一兩七錢上下照定例按程核算數目懸殊宗棠復稱例載運脚係專指雇用車騾駝價而言原奏關內採運由涼州歷甘州肅州達安西計程千五百六十里每糧百斤需銀一十兩七錢上下係合糧價車騾駝隻脚價及員弁人夫薪糧牲畜草料口袋什物局費一切統算在內故與例載專係脚

價者不符若專就運脚言固不懸殊也且甘省新復人物凋殘絲毫不能藉資民力與從前承平日久地方完善情形判若霄壤未可按照成例致誤轉輸現時關內轉解糧餉軍裝軍火官運民運相輔而行民運脚價無論雇用車駝騾馬酌定百斤百里給銀四錢而額爾慶額出關雇用民駝自定百斤百里給脚價五錢關外食物昂於內地脚價較內地加增現辦情形已難一律也民運脚價外尙有民夫口食牲畜餵養及應用食物各項一有缺乏立形滯礙停待一日所費更多故必設官局隨時給領酌扣價銀始爲省便雖比民間買價津貼已多而費不容惜故關內民運百斤百里給脚價銀四錢合局用津貼實不止四錢關外民運百斤百里給脚銀五錢合局用津貼亦不止五錢也官運須分途採購車馱分幫派弁夫管理車軸鞍架

繩索口袋什物須隨時修整備辦牲畜須按站預備草料醫藥以資
餵養車輛損壞牲畜倒斃又須截併挑換隨時買補填槽所費極繁
而總分局員弁夫役護勇工匠薪糧局用正雜諸費尙未計及此項
費用指官民運脚而言自應攤入糧價併算約言之爲一端分言之
則款目瑣碎非俟轉運歲役專案據實開報請銷急難清理此時就
臣墊糧價實銀而言金順一軍領過糧料截至本年九月內共千二
百萬斤應攤合價銀六十六萬餘兩張曜一軍領過糧料截至本年
九月止共支四百七十萬零九百餘斤應攤合價銀二十五萬九千
餘兩此皆內軍未出關以前由甘肅州各局就近支領居多故攤
扣價銀每百斤合五兩五錢有奇若全隊出關後糧運仍由內地籌
供則由涼州遞運安西每糧百斤實需銀十一兩七錢有奇安西轉

解哈密又須從新起算程途遠近即脚價多寡所分路途少一站運費省一站故甘屬運脚省於涼肅屬運脚省於甘牽算分攤費自輕減並非以由涼州至安西十一兩七錢上下爲定也

諭旨飭移西征糧台駐肅州宗棠旋奏軍行糧隨設台必緊居前敵後乾隆中兩定伊犁官軍由烏里雅蘇台科布多入師行北路故糧台設於北路道光初用兵討張格爾時賊陷喀什噶爾繼陷烏什和闐葉爾羌官軍會師阿克蘇直指喀什噶爾師行南路故糧台設於肅州分設託克遜阿克蘇各城皆南路也現在局勢額金兩軍已由安西哈密前進北路巴古濟木薩之糧僅供主客兵民屯食應厚其儲峙備支應續進之軍西征糧台若移設肅州則偏於南路北拒古城二千九百六十里台司應支何由察諸軍羸縮而各協其宜東北

拒科布多四千三百餘里距烏里雅蘇台近六十里台辦採運何由
察價脚低昂遲速而盡得其實無論軍行北路糧台設南路事爲從
前所未有也茲查肅局所辦採糧轉運一切事宜已有頭緒可保無
悞是糧台毋庸移設肅州明矣袁葆恒擬購駝價銀已咨明劃解烏
城所購駝隻由北路巴里坤交收牧放備撥是北路轉運不患無駝
烏科雖非產糧之區然景廉十年十一月奏准口北運解軍糧不少
嗣因採駝二千五百隻無款停止僅咨蒙古遞運其到營不及十分
之一餘存烏台科城半多朽腐遂請停運是北路採辦不患無糧然
則糧台移設北路供支北路軍以今視昔其又奚疑台設北路景廉
遺存烏科之糧得資轉運所購駝隻噉口外鹼草壯健有力日間僅
餵鹽料較肅州餵飼須耗人食之糧又加節省譬如圍碁一著活而

滿盤俱活矣懇飭下袁葆恆毋庸拘照移台肅州駐紮之

諭飭於烏里雅蘇台科布多巴里坤擇一處移台兩處設立分台尅期集事庶明年駝隻歇廠前北路儲峙充裕先進之軍迅赴戎機續進之軍絡繹爭赴時局大有裨益經費大可節省

詔袁葆恆務與宗棠和衷商榷毋得各存意見葆恆奏巴里坤爲南北適中之地且緊接大軍後擬將糧台移改巴城并請商調舊部院軍數營前來護運

上飭宗棠酌度情形奏明辦理宗棠疏言袁葆恆稱糧台宜移設巴城是也巴里坤距各軍駐紮之古城濟木薩等處爲程七百里車馳暢行無阻台設巴里坤照料易周各軍赴台領運取攜甚便回亂以來城垣完好如常惟巴城產糧無多從前天時地利人和三廠屯田

久廢從新經理屯政暫無近功不得其人更滋虛耗袁葆恆所陳移
台巴里坤先買濟木薩糧次調運烏科糧次由南路調運臣思古城
之糧景廉既經訂買若訂買古濟糧運回巴里坤無論古濟未必尙
敷訂買且無此辦法南路涼甘肅安西新訂之糧十九萬石不爲不
多若復加價訂買則貧戶無糧買食維艱青黃不接時無從設措上
年散給子種外郡縣復廣設粥廠煮粥療飢洵非得已糧價愈增富
者未厭貧者愈苦揆之事理實不可行且新疆訂買已多民間搜括
殆遍袁葆恆以南路調運爲未著自有所見古濟糧既已採過涼甘
肅又難議增然則台移巴里坤其必仍於北路廣籌採運明矣近廣
加諮訪知歸化包頭至射台大巴一帶十數站大巴至巴里坤十六
站中間產糧處尙多其地雖無台站無一定地名然舊時商旅赴巴

古烏魯木齊取道於此以其有糧可購有駝可雇價均平減也湖茶私販由此路至古城銷售經歷任督臣奏明有案近日總兵鄧增隨金順到巴里坤稟稱巴城商賈不絕棉布糧價與內地相近皆由烏科一帶而來即指此路觀其市價平減知其路徑之捷腳價之省景廉前與金順書稱包頭運糧實亦不少非虛語也臣檄歸綏道崇繕詢訪確實具報一面委員攜銀二萬往歸化包頭試辦採運應否加銀增採容緩再議惟袁葆恆奏移台巴城雖以南路調運爲末而著意仍在肅州現在趕製大車已購車驟三千頭駸駸西向事難中止姑無論天山嶺脊石徑犖确重載糧車聯幫銜接較之單車空車尙可參用人力從容過險者艱阻特甚事必不行也即照袁葆恆辦法車糧由肅運巴艱阻不辭勞費不惜而肅運之糧亦必無顆粒到巴

何以言之自肅州安西越哈密二十四站計程雖止二千二百餘里而路多戈壁車馱駝隻均須就水草柴薪之便憇息牧飲不能按站而行中間人畜疲乏又須停住養息即催攢迫促非三十餘日不能到巴每騾一頭日瞰料八斤一車一夫日須口食兩斤蘭州以西料豆缺產餵養用青穎大麥穀充之畜食之料即人食之糧車行三十餘日計一車載糧多不過六百斤兩騾餵養耗去五百數十斤車夫口食亦須六七十斤而車糧已罄安有餘糧達巴里坤此不謂之虛糜不得也西北轉運駝隻爲宜爲其食少運重又能過險也駝行口內食料不過三斤晝牧夜行可省草束且一夫管牽五駝日需口食又省若行口外食草不食料如遇勞乏但餵料一升加鹽少許仍卽復故惟駝夫宜擇老成勤謹管夫之人宜擇耐勞善體恤者雖不歇

廠亦少倒斃故關內外諸軍均使駝不使車統領營官能者常留心
照料不盡委之廝養小卒也袁葆恆初議移台臣告以宜駝不宜車
天山無車路關內糧難踰天山購騾不如雇駝辦官車不如用民車
已辦之車只可酌改州縣台車以省餵養迄不見察臣無如何現在
製造車輛已成採買駝騾已到始籌及餵養維艱意欲仍駐肅州辦
理車運并奏陳西路用兵糧台均設肅州引岳鍾琪用兵車糧車黃
廷桂分車駛北過天山爲證不知岳鍾琪兵車後此會否停止其過
天山或士卒下車推挽以資輕便均無從詳考至糧車則於後起運
至玉門布隆吉咨止前進而由巴里坤派餘丁三千幫協轉運謂可
省車駛之煩并以節費當時原有紀錄其因天山非車路可知黃廷
桂用兵回部以軍騾駐哈密一半赴北路巴里坤裝糧運庫車重載

返時不逾天山一半徑由哈密運吐魯番本是向天山西南行更不
近天山也袁葆恆預存想當然之見求成必不行之事牽強往跡附
會其說臣實未喻就現在已成局勢言之袁葆恆必將各處糧路運
路周爰咨詢精心擇度以所購駝運北路糧達巴里坤迨巴里坤收
有成數袁葆恆赴巴城設台一面仍運北路糧一面用駝南來裝運
肅局糧屆時距秋穫不遠採糧較易可冀集事較之駐肅運巴里坤
終歸無濟大不侔也其已辦車驟虛耗餵養殊爲可惜擬以有驟無
車者分撥蘭州東路抵台車之用或加撥涼甘安肅各處備台車添
套及補里車放忙之缺容臣與袁葆恆商議由其自奏袁葆恆原奏
糧台移設須兵護運請商調數營查巴里坤原有領隊大臣及總兵
駐紮臣近因鎮標急須整理奏委記名提督王鳳鳴署理鍾篆已飭

隨帶饗銀先赴署任切實挑汰募袖翼可改觀台移同城可資照料糧台應有者護台兵勇夫役爲數不必過多設台後前敵諸軍餉需均赴台請領毋須由台運解自毋須弁兵押護哈密現有張曜全軍駐紮安肅甘涼蘭州平涼以至陝西節節駐有防營袁葆恆隨時咨行護運斷無違悞毋庸調撥馬步致涉虛糜又言從前用兵多設糧台而糧員以資緣進貪婪終者比比而是臣鑒於此每設局不設台區區愚衷竊以關外時勢應請緩設糧台仍照現章於哈密巴里坤各處設立糧局哈密局現委張季方經理咨張曜照料專司收糧轉運巴里坤局委現署總兵王鳳鳴經理由臣遴員幫辦專司收發臣雖遠距省城尙可以時勾稽加之督責務歸實濟以裕軍儲而護台兵丁可省糧台陋習可除一切經費可節矣三月

詔袁葆恆回京供職關外糧運准如左宗棠奏於哈密巴里坤等處各立糧局妥爲經理北路既有捷徑由歸化包頭而西達巴里坤自可從此籌辦以期便捷一切事宜悉由左宗棠酌度辦理其西征糧臺亦經宗棠奏准責令陝西藩司經理遇有應行奏催及各省咨行事件藩司即呈由陝撫覈辦時宗棠奉

命督辦新疆軍務金順爲幫辦順與景廉旋奏古城需糧至急請由關內籌運十萬石夏六月有

旨責成宗棠悉心經理宗棠奏師行北路宜用北路糧臣前疏已詳南路肅局既有規糧又車馱駝隻購雇稍多可以灌運自宜嚴切督催以廣儲峙北局設於歸化分局設於包頭飭升用知府陳瑞芝總兵蕭兆元司之雇民駝轉運計自三月杪至五月據報陸續運過四

十餘萬斤至巴里坤每百斤率合銀八兩內外袁葆恆前奏甯夏採
運臣飭署甯夏總兵譚拔萃甯夏知府李宗賓接辦現報雇駝數百
由察罕廟試行如此路通利再爲加辦漠北素產健駝又使水草惜
久未開運倉卒應募者少又駝戶以拉差爲苦臣飭巴里坤鎮迪道
嚴行示禁冀聞風踵至運道暢行庶餉饋可通亦收節省之益臣頃
晤俄國游歷官索思諾福斯齊與談近事索思諾福思齊稱俄國在
山諾爾產糧甚多駝隻亦健距中國古城不遠如中國需糧願代採
辦運送古城交收由俄起運需護運兵弁均由在山諾爾派撥其兵
費一併攤入糧腳價內每百斤需銀七兩五錢如年豐糧多駝價不
貴價尙有減比與定議立約計年內可運古城糧二百萬斤明年春
夏可運足三百萬斤索思諾福斯齊已專兵前告其地巡撫據稱斷

不致誤臣現委同知丁鶚等赴巴里坤又委甘肅道員陶兆熊等赴古城辦理採糧開墾及收支事宜此北路籌糧情形也南路肅局存糧三萬餘石安西局存糧百數十萬斤哈密局存糧百三十萬斤現正趕緊灌運據甘涼肅各廳州縣稟報今歲夏雨優渥冀獲豐稔將來糧價有減無增車駟受雇日多一日轉運較前稍易此南路籌糧情形也臣因歸包採糧運巴里坤較涼州甘肅運巴脚價大減糧則實裝實卸別無虛耗故決計於北路開一運道陸續撥兌實銀四十餘萬甯夏已發銀三萬計秋高駝集運數可增南路由甘運肅由肅運安西均用車駟由安西運哈密運巴里坤均用駟隻設廠局溶水泉刈草薪以利運道一切經費統於現辦採運項下開支計轉轉轉數運數可倍此合南北路運籌巴里坤之糧也俄國在山諾爾緊接

我布倫託海邊界距古城數百里俄人代採二百萬斤運送古城視
巴里坤運古城路程較近實獲之意外計需銀十五萬兩此於北路
之北籌古城之糧也是時各省關協餉積欠甚鉅本年截至六月僅
收銀八十餘萬宗棠奏狀且言臣前估計諸軍歲需實餉六百數十
萬外增出關採運出款二百餘萬以每年實到協餉約五百萬劃抵
出款八百餘萬已不敷實銀三百餘萬今則新疆兵餉糧運一切責
臣督辦局勢更寬就現辦情形非獨糧運斷非上屆二百餘萬實銀
所能敷衍卽現存馬步軍需正餉仍非六百數十萬不能支持其裁
併後積欠勇夫正餉七百餘萬又欠未發卹賞銀三十餘萬均須陸
續發給實銀而今年春夏協餉所入不及百萬所以勉強勻濟全賴
奏借洋款所有蘇浙粵三省協餉每年連息共應扣還銀百二十三

萬餘兩是常年協餉入款五百萬內又劃去銀百二十餘萬出入兩抵前奏每年不敷銀三百餘萬今實不敷銀四百數十萬如果各省關積欠甘餉能如上年奏准提解積欠之半應解協餉仍按月如數籌撥庶各路開辦採運不至停運待銀調派出關諸軍不致停兵待餉否則前進局勢難言矣尋又奏現在局勢洋防塞防並重人共知之而難易不能無辨洋防開辦一年經始之費可減塞上正值用兵諸須從新籌措如軍火器械海疆隨時隨地可辦塞上則須預爲籌計踰水陸萬里以達軍前一物之價加入運費已相倍蓰尙須先備採運實銀乃能應手不同一也海疆富饒各口通商又利源所在以釐稅言除兩江歲入千萬緡曾見章奏外粵浙閩所收較丁糧奚翅一倍所須防費已自綽然甘肅素稱荒瘠通省丁糧一歲僅二十餘

萬亂後併此亦難復按農民喘息僅屬尙須由官多方勸相始免槁
餓空山又地氣高寒物產本絕土俗不解經商服賈出外求贏貧乏
無聊坐以待困餅壘早罄挹注奚施不同二也東南澤國杭稻之鄉
舟楫轉輸一帆千里商之謀生易裕官之籌措非難甘肅糧食升斗
皆負戴而行數十百里之程非車馱莫致運脚每過糧價數倍且有
多十數倍者故東南各省糧與餉可合爲一西北則糧價脚價非另
籌津貼不可不同三也用兵既久官私耗竭有時需用孔急輒稱貸
於富室大商甘肅則本地無可商籌協款不到惟借用洋商巨款及
飭各台局向附近殷實商人議息籌借然借洋款必指省關還款以
印票爲憑借華款必飭台局於附近商賈薈萃之區籌辦以信約爲
憑近則陝鄂遠則上海相距遼闊不能尅期得銀而華款又零星湊

集爲數無多比借款至守候領催者環待已久一散卽盡旣非若海疆就近取資又不如洋商易集巨款可以久支如非計無復之何肯出此不同四也臣自出師江皖轉戰浙閩所歷皆兵燹之餘就地籌維未嘗奏請部款就浙餉討閩賊就閩浙之餉討粵賊事平欠餉一律清還蓋東南餉源可濬軍用易充轉運又便非若甘肅無可取資仰給各省協款如嬰孩性命寄於乳媪乳之則生斷哺則絕也乃各省皆以洋防爲急塞防爲緩致臣出款日增入款大減豈沿海防軍重於出塞征軍今日海防急於塞事乎竊維餉源只有此數此壅彼缺勢所固然疆臣各轄一方畛域攸分恆情不免部臣總司國計因時制用乃其所宜以欠餉言臣軍積欠二千六百餘萬所部除火食馬乾寒衣單衣外每年僅發一月滿餉尙須多方設措似此窘蹙何

可爲常各省但就本省應發餉需節縮一兩月勻濟甘肅是富者減一盂之食仍免啼飢貧人利壺殮之加即期宿飽不過通融挹注大局藉可維持此區區愚忱不得不披瀝陳之也會陝西巡撫譚鍾麟亦奏請指提西征年終一月滿餉并催各省奉撥出關糧運的餉暨催提金順等軍糧餉得

旨飭各直省督撫將原協添協西征各餉與分界南北洋海防各款一體兼顧毋稍偏重如再藉詞延欠卽由左宗棠譚鍾麟分別指名奏參而各省關終以洋防牽掣報解寥寥餉源涸竭冬十二月宗棠乃請續籌巨款言臣現整旅西征應用火器子藥皮棉衣褲氈包棚帳駝騾馬匹採買製造轉運諸費每款動需數萬十數萬出款之增一也汰遣弁丁應清欠餉添募精壯應增正餉出塞征夫除食糧照

章核扣正餉外餘餉均需現銀實發出款之增二也哈密巴里坤諸處餉項部臣責其核奏漸且改爲挪墊現銀出款之增三也南北各路糧運九月後愈加暢旺駝馬車騾人夫牲畜各數萬計腳價薪糧概須現發口袋氈條車駝酌帶什物須隨時添製預備所費倍加於前出款之增四也師出南路安西西迄古城屬之三個泉沿途戈壁相間人煙斷絕薪桂米珠軍糧須數百里割刈非預先發價飭各處印官局委設法購備不能過師巴古兵民屯墾委員設局者牛種農具採購製造動需鉅費出款之增五也俄人允爲承辦軍糧勞費雖省而腳價需現銀發給至遲不逾三月之限道遠運艱宜預籌解出款之增六也關內馬步百餘營鹽糧餉乾薪炭公費地方津貼諸款每月仍非數十萬不能點綴出款之增如此上年奏借洋款原擬湊

集現餉大加裁撤減一分積欠卽省一分出款乃洋款遲到除扣還前借商款外餘銀百七十餘萬先後到甘隨到隨罄欠發勇夫正餉八百餘萬上年已清釐二百餘萬今又漸增新欠現因年節屆時應發滿餉一月各營將弁兵勇盼望甚殷出關馬步各營已調赴涼州合隊待餉進發各路糧運價腳待銀應付稟牘紛來臣無以應也不得已飭辦理駐鄂後路糧台道員王加敏駐陝軍需局道員沈應奎籌借商款六十萬提前解甘由臣分別點綴權濟目前約定明年二三四月歸款屆期各省協款卽令旺解必陸續清還借款而臣軍已寅支卯糧協款一到卽盡仍屬無濟若不提還借款則失信商人此後并籌借之一綫生機亦塞矣竊維上年籌辦台防經今兩江督臣沈葆楨議借洋款一千萬兩按每年八釐行息分作十年籌還業與

洋商定約嗣台防事定減借二百萬兩仍分十年撥還在案應懇
天恩俯准援照台防成案允借洋款一千萬兩仍歸各省關於應協
西征軍餉分十年劃還如此則各省協餉藉資騰挪俾微臣亦得所
藉手迅赴戎機奉

諭准如所請著沈葆楨速議奏聞葆楨奏稱出關餉需礙難借用洋
款請

飭下部臣熟權緩急將有著之款移稍緩者於最急之區如江蘇協
甘內有一萬歸陝西陝西肅清多年不難自籌一萬此款應歸西征
江西派協雲貴兵餉勇餉爲數頗鉅雲貴較西征則緩江蘇月協八
萬自本年正月爲始督飭司關局力籌如數內劃出左宗棠還洋款
數目發交江海關餘盡解左宗棠後路糧台所有老湘營及關內外

各軍均由左宗棠統收分撥至年終一月滿餉五萬交冬仍極力籌解不入月餉湖北協濟江防未解十二萬湖南協濟江防未解八萬均請

飭各督撫移解左宗棠以赴西征之急是月宗棠自率馬步各營由蘭州赴肅計俄糧運古城截至四月可四百八十餘萬斤足敷金順軍食繼進各軍所需糧料除官私馱騾駝隻裝運軍士自行裹帶外截至四月巴里坤存糧可六百餘萬斤安西哈密糧運至古城可四百餘萬斤存儲待運者尙千萬斤惟洋款格於沈葆楨之議餉仍竭蹶左宗棠復請

敕下兩江督臣速代借洋款四百萬三月朔

上諭左宗棠業已督率馬步分起西進爲規復新疆各城計師出塞

外必須士飽馬騰左宗棠前議借洋款一千萬現請減借銀四百萬兩係爲節省經費顧全大局起見惟現當大舉深入酌發欠餉預備行糧需款甚鉅著加恩於戶部庫存四成洋稅項下撥給銀二百萬兩並准借用洋款五百萬兩各省應解西征協餉提前撥解三百萬兩以足一千萬兩之數國家經費有常似此竭力湊撥可一不可再洋款如何籌借著左宗棠自行酌度奏明辦理各省應解之三百萬兩著戶部酌量指提毋任延宕其餘應解西征協餉仍著該將軍督撫嚴飭各藩司監督儘力報解毋得八成自限閩粵欠解較多左宗棠請飭將本年應協甘款如數迅解著該督撫遵照辦理是月又諭各省提前趕解西征協餉三百萬現據戶部奏福建已提前湊解六十萬廣東本年應協甘餉計九十一萬已催令如數迅解內除應

還上屆洋款本息約共四十萬兩零仍餘銀五十萬閩粵共計已得銀百一十萬兩其餘百九十萬兩即照部議浙江四十五萬江西三十萬河南五萬湖北三十八萬湖南六萬山東六萬山西二十萬安徽十萬四川二十萬閩海關十萬共湊足三百萬兩均於本年應解西征協餉項下先行提齊統限三箇月掃數解交左宗棠應用各該將軍督撫務當遵照部提數目依限趕解不得稍有短欠致誤戎機部撥四成洋稅銀二百萬現議分四批由順天府遴員接續領解交西征糧台轉解左宗棠軍營此項庫款該部請於西征協餉內儘數解還各直省應解西征協餉除提前三百萬及兩次所借洋款劃還本利各銀外所餘不多若儘數解還部庫恐軍營餉需仍不敷周轉著改去歲議撥南北洋海防經費之四成洋稅內按年酌提一半將

此次部撥二百萬兩陸續扣還即著李鴻章沈葆楨遵照辦理各該將軍督撫倘不能將該省協餉解至八成以上仍著該部嚴叅懲辦夏四月宗棠奏言臣前請借洋款商之兩江窒礙不行復奉

諭准借五百萬兩令自行酌度敢不切實圖維竊計本年應得的餉除部款二百萬協款提前三百萬外各省尚有應解八成以上餘銀清還陝鄂滬新借各款尙可存留四百數十萬兩計連閏十箇月內餉需得資周轉是本年不借洋款尙無不可惟此後各省關協款衰旺未可預知而懸軍深入道遠費繁若無實銀接濟不堪設想近接上海轉運局道員胡光墉稟稱上年花旗普魯社兩國在海島開礦獲銀甚旺若與商借可期有成臣答以擬待來年始行議借一則遲借一年可省一年息耗一則明年議借隔年始還一期兩次彼時臣

前借三百萬本息已悉數還清界限分明各省關協款從後年撥還借款亦尙不至迫促也六月宗棠奏北路採運總局設歸化分局設包頭經奏委陳瑞芝蕭光元試辦年餘已據報採運五百餘萬斤合之甯夏採運幾七百餘萬斤陸續解巴里坤存儲近時大軍次第出關及金順借糧濟急均指此應之其甘州高台肅州安西哈密採運存儲之糧積至二千數百萬斤不爲不多惟此路經過戈壁天山艱阻異常駝馱車輛視爲畏途兵燹之餘勉籌轉饋勞費萬狀究於軍儲少益故自來西北用兵無轉關內之糧者上年試辦歸包轉運欲於北路別開新徑以裕軍儲事之濟否未可預知幸奉

諭准辦獲此鉅數非始願所及也近因南路糧多運絀而供劉錦棠徐占彪三十餘營糧料外尙須供金順分駐巴城數營又接濟金順

全軍軍食不得已飭加雇駝驢車輛轉肅州安西存糧越哈密巴里坤逕抵古城蓋勞費無以加矣而中途又時患車壞牲斃不能依限畢赴劉錦棠乃僦該軍所有驢駝車輛助運哈密存糧備四十五日之需節節短運四起四卸乃抵古城計閏五月抵古局存糧可得七百餘萬斤尙止抵歸包甯夏運巴之數而由肅徑運古城每糧百斤脚價十五兩有奇安西逕運古城脚價十一兩有奇較歸化包頭甯夏逕運巴里坤脚價每百斤祇八兩有奇所費又將過半由是觀之用兵西北宜採運西北糧斷可知也轉瞬新穀將登又須籌採必以甯夏歸化包頭爲大宗惟陳瑞芝蕭兆元竭力經營雖有成效而蒙部情形未悉加委西安協領記名副都統喜勝督同陳瑞芝蕭兆元辦理喜勝已於閏五月由西安馳赴歸化北路糧運可期推廣也未

幾官軍連克古牧地烏魯木齊而各省協餉仍延欠未解八月朔宗業奏臣緩借洋款原以各省八成以上協款可恃也溯自奉

旨日起截至六月底止西征糧台報收部款二百萬各省提前協餉二百四十餘萬其非提前協餉亦四十餘萬約收銀四百八九十萬兩該糧台收到後歸還上年息借商銀及留支應發各款存銀僅一百數十萬兩刻下烏垣各城以次克復遠征士卒轉戰勞苦則餉需不可缺新糧登場急宜收購則採買不可緩白露已過駱駝起廠則轉運不可歇各城新克百廢待興急須設官駐營舉行賑濟屯墾諸政賊踪聚南路又將移哈密巴里坤古城之師兼調馬步各營會勦亟須辦理軍火糧運局勢愈闕需用愈多通盤籌畫儘目前存項計之九月十月後餉事又當斷絕懇

飭部臣查明各省協餉已解未解成數分別嚴催時金順已奏收復瑪納斯北城進攻南城需餉甚急

上飭宗棠於西征軍餉內先行酌量通融光緒三年春三月宗棠奏出關餉需上年准發部款二百萬各省提前解三百萬均是的餉復蒙

諭飭各省協款以八成批解可資敷衍故上年不籌借洋款惟出師絕域距協餉各省在數千里萬里外而已到之餉止供九十月之需除奏請

飭部分別行催外擬即籌借洋款并先飭滬鄂陝各台局息借華商銀百一十萬一分二厘給息其洋款經上海轉運局胡光墉訂借限本年三月到甘不意被金順守領滬餉委員許厚如託詞朦借致啓

猜疑事復中變而進攻南路及規取吐魯番各軍已指春融爲師期
奏調填紮烏魯木齊卓勝馬步全軍與防護古城迤西及巴古一帶
運道馬步各軍業經資遣出關矣懸軍深入勢難停待洋款既不足
恃協款又無現成巨數何以進兵懇

飭各省關將本年應協西征軍餉提前速解四百萬兩餘均解八成
以上俾兵機順利得免意外之虞如一時未能驟集巨款卽照陝西
撫臣譚鍾麟前奏各省分向本地富商議息借湊先期解甘仍各按
每月應解之數分期劃還商款而息銀仍由西征餉內劃扣在各省
無洋款期迫之煩無墊息虛耗之累而臣軍得有實濟奉

旨悉如所請夏四月宗棠奏據胡光墉稟稱洋商已知詐厚如不足
信仍允訂借滙豐銀行五百萬彼國電報已以二百五十萬裝船餘

俟裝船有期再報惟洋商狙於同治十三年閩省借洋款先收爛番後還實銀故事計息雖少獲利轉饒固以比照閩案爲請胡光墉與再四斟酌彼借此還均用實銀按每月一分二釐五毫起息由浙海粵海江海江漢四關出票作七年勻還每年還兩次每次六個月爲期因思以七年計每歲還本銀不過七十餘萬每次尙只三十餘萬初年息微末年稍增以四省勻還初年每省不過二十餘萬而四省協濟甘餉浙江歲協百四十餘萬湖北江蘇廣東皆歲協九十餘萬內外從中割撥歸款既各省力所優爲時日又舒不以迫促爲苦臣軍得此巨款除還陝甘滬鄂借款尙不至束手無策坐失機宜遂飭其如議趕辦惟向章洋行付銀必由該國駐京公使總稅務司知會各關領事官稅務司又必以各關印票爲憑懇

恩飭總理衙門咨行廣東浙江江蘇湖北四省督撫暨監督關道分別出具關票加蓋督撫關道關防仍照會英國總稅務司轉飭四關稅司一律蓋印簽押交胡光墉妥速辦理庶銀可早提西事可早爲布置得

旨允行初山西自同治八年戶部奏定月協西征餉三萬又專協穆圖善餉月一萬米銀月一萬歷經西征糧臺開單咨部戶部按照核催上年十一月藩司林壽圖乘前撫候代滕詳按照同治六年前任晉撫趙長齡奏每月二萬核算置八年戶部核定月協五萬成案不顧且指八年奏定實餉爲虛數糧台開單戶部核催爲歧誤外錯宗棠遂劾林壽圖任意取巧紊亂餉章請

飭部議處以儆效尤嗣經部議將林壽圖請

旨褫職九月朔劉錦棠復喀喇沙爾後二日過喀爾哈阿滿溝擒賊
供秋糧甫穫白逆迫纏回悉搬入庫車是日錦棠至庫爾勒行糧已
罄令軍士覓掘窖糧得數十萬斤乃飛輓後路轉運接濟旋復庫車
其地糧料充足價買尙易未幾西四城均於冬間次第克復四年春
正月宗棠奏南疆尅期底定尙免老師糜餉之虞而官軍自復喀喇
沙爾後所歷均是腴疆各城米糧布疋銀錢及軍民所需日用百貨
價值與東南各省腹地相若且有較內地市價更平減者現飭古城
巴里坤哈密安西採運局減採停運並將各局分別撤留以示撙節
將來軍食就地取資全局既振制用自舒我
皇上保大定功規模宏遠上與

高宗拓地節餉之貽謀若合符節矣繼而行省肇建甘肅新疆餉額

經受代

欽差大臣劉錦棠依宗棠原議定爲歲協三百數十萬

戡定新疆記卷六

歸地篇

鄰敵乘釁盜踞邊城伊古以來往往而有其柔而服之則漢文之撫南越也戰而克之則唐宣之復河湟也新疆之亂伊犁久淪於回俄人假辭代收乘機奪取內貪腴壤而外市甘言夫固謂我鞭長難及莫之能禁也既而王師一奮堅巢迭摧雷厲風飛遐荒震疊俄人情見勢屈轉而要挾要挾不已繼以恫喝卒之甘心就款奉地來歸嚮非

聖主抗威布德兼漢文唐宣而用之其效固不臻此於戲自強之道馭遠之方可以觀矣謹采撫納土分界事宜爲歸地篇第二

伊犁爲西北總要重鎮與俄羅斯南界初不毘連康熙間俄之察罕

汗始與中國通盟聘而先後誘脅伊犁西南哈薩克布魯特各部爲其屬藩又并入浩罕三部由是俄疆日拓遂與伊犁壤相錯市相通矣然自乾隆二十二年

王師再定伊犁滅準部俄人亦震我兵威故百餘年來通商會盟未嘗啟邊釁同治初回逆夷酋相繼亂南北兩路并失伊犁亦陷其時中國方用兵未遑遠略俄羅斯利伊犁土沃物產豐饒旋於九年夏以兵制土回乘隙踞之嗣左宗棠金順榮全等疊奉

密旨籌議榮全旋攝伊犁將軍事駐軍塔爾巴哈台俄人欲設計陷之藉圖要挾約往阿雅古斯會議交還全廉知其詐不果往光緒四年全疆戡定夏六月金順遵

旨派提督殷華廷等赴俄國古鏡台與俄官固必納吐爾喀爾伯科

斯克依議及伊犁稱事體重大難以擅專俟咨商土爾齊斯坦總督高伏滿再行定議但近年案件甚繁非在總理衙門商辦議論多而難成且哈薩克布魯特耳目衆多恐此議一出人心動搖華廷往復詰辨卒無成議而還旋譯高伏滿回文言此事應由貴上司與我駐京使臣議辦並以中俄案件未結爲言其狡展如此是年九月上派吏部侍郎崇厚爲欽差全權大臣赴俄欵議俄人陽爲好語還我伊犁崇厚遽許其通商分界償兵費而伊犁叛回前爲俄人縱庇恐交還被誅多逃俄境俄官布策首以

恩赦請崇厚亦許之遂咨總理衙門奏派接收分界大臣俟定約時尅期舉辦恭親王等奏伊犁一事議論數年彼國無非支吾延宕今據崇厚先後電信其外部尙無推諉之詞似於交還一層微有端緒

然兵費數目通商分界各節尙未明言洋人惟利是視或別存覬覦或仍懷虛詐正未可知而目下事機彼既近情我未便先存逆億惟交收關係甚重非熟悉邊情平時聲望素爲俄人信服者不足勝此鉅任請於西北邊界大臣中

簡派一人就近籌辦以專責成

上派錫綸先與宗棠金順會商即馳往妥議伊犁從賊回人惟著名首要各逆查明懲治其餘脅從情尙可原概從寬免予以自新令宗棠明白曉示並飭帶兵員弁不得妄行誅戮宗棠旋奏俄國請將回人赦免准其回籍一節不可准行伊犁居人除旂綠各營及各省漢回商民遣犯外一爲纏回由南疆轉徙而來一爲本地土回乃各城舊有種族一爲陝回係官軍克復各城後畏勦逃避俄官置之緩定

城者俄人之請似專指陝回而言曩與漢民仇怨既深萬難復歸故土故歷辦撫局概將陝回安插甘境其甘回之就撫者亦令遷移甘轄郡縣與漢民異處日久相安茲若准回陝歸籍恐回漢尋仇於關隴大局有礙其洗心遷善情有可原者現已示諭分別辦理并咨行軍營文武凡驗繳馬械傾誠就撫者入關安插收城之日不准妄行誅戮及搜求財物致起事端金順亦以俄人反覆爲慮其照覆俄國必俟交收伊犁方准通商弛禁俄人欲先弛禁而後交收議未決忽俄國七河巡撫來文稱俄商前往石河爲中國官禁阻喀什噶爾驅逐寄居俄民三百餘戶住俄回民欲乘和闐有亂入喀什滋事奉國君面諭告知中國速弛邊禁等語五年夏六月恭親王等上言崇厚與俄國格爾斯布策等商議通商分界償款各事均爲收還伊犁張本

該處通商章程尙未定約喀什噶爾等處地界并未盡分兵費亦未指有確數今伊城未交俄國請先弛禁是否心存叵測尙未可知布策與崇厚面談時雖有並非因利求索一語設我將通商分界各事允其開辦彼又得步進步肆意要求中國則事難中止俄人仍藉口展延而於伊犁交還終屬有名無實應將通商分界償款三端盡行議妥即將伊犁收還兩事辦理不分先後庶無疏虞請

飭崇厚左宗棠等通盤籌算照此收還伊犁或與未收同或不如不收之爲愈再行詳細妥商以昭慎重疏入

上飭崇厚力持定見務將通商分界償款三端議定後與交還伊犁同時並舉或所議各節利害相權得不償失自應另籌辦法著崇厚左宗棠金順錫綸通盤籌畫詳晰奏陳俄人稱喀什噶爾寄住屬民

驅逐出境各節均令查明具奏宗棠奏言伊犁本我舊土猝淪於逆回俄人乘釁以代我收復爲名人踞要區亦知所爲本冒不韙佯言俟官軍克復烏魯木齊瑪納斯即行交還更無異說迨官軍已克烏瑪兩城而俄踞伊犁自若也官軍踰嶺而南拔吐魯番連下八城安集延逆酋既伏其辜賊渠白彥虎等竄入俄地俄納之屢索不交而踞伊犁自若既而竄俄諸逆領取俄票假貿易三次窺邊爲官軍摻獲俄官誘爲不知而踞伊犁仍自若也

朝廷重念邦交特命崇厚出使修約睦鄰於交還伊犁外並議及界務商務以商務論布策前在京師雖以嘉峪關爲意總理衙門未嘗許之此次崇厚議允其設立領事已過所望若於嘉峪關內再允推廣則有關

國家疆圉華民生計者甚大查嘉峪關設領事通商其由俄入中國境如古城巴里坤哈密安西玉門等處皆必出之途由古城經過者有官有驛足資照料惟旁境可通車駝者尙多似應分設塘汛嘉峪關城極褊狹俄設領事於此勢多不便或於肅州城內外由官度地建置俄官租賃而居按月薄取佃值并無不合俄之官商不得私向民間購基造屋致滋論端其由肅州經甘涼兩郡達甘省由蘭州南路達漢中或由東路達陝省西安達漢中均指漢口爲銷貨置貨之地由俄至漢水陸萬里而遙歷新疆陝甘河南湖北轄境陸程居大半至龍駒寨荆紫關各處始有小船可售餘皆車駝曳負道路修阻俄商零星裝運時虞疏失如聯幫行走尖站過載主客相參易滋口舌俄人性儉計較最工內地無賴之徒從而簸弄構釀生端官司不

能議禁倘有抵觸輒干吏議各省大吏相距太遠事關中外交涉察
辦需時兩造各執一詞難於究詰案懸莫結動經數年而疏漏冒濫
獄市多擾姑勿具論此患之中於官者也甘肅地瘠民貧罔知服賈
土物行銷外省者煙葉藥材而外別無大宗民間車輛多用無鐵高
輪牛馬駕曳負重不能行遠馱貨用驢於農隙受僱以供喂養而利
其羨餘陝西駕車驟馬并用馱祇用驟驪產河南嵩洛間非陝所出
陝民業車馱者購驟於豫攬載通行運銷百貨公私均取給焉軍興
日久牲畜疲乏倒弊本多加以陝豫游饑宰食不少於是車馱價重
貨運維艱窮民私畜牛驢於農隙短運取值以資過度若允俄商入
內銷貨置貨則車馱僱價益昂民間短運將廢生機頓塞殊非所宜
此患之中於農者也商貨行銷茶爲大宗茶之所產以楚爲盛甘肅

茶商舊設官引從前私茶充斥官引不行軍興以來茶務倒歇奏請改引爲票招販承銷裁革陋規聽民自便於是茶販踵至迨官軍復地漸廣可冀暢銷而私茶又由山西包頭藉售發蒙古繞道草地侵銷新疆北路間有倒灌南疆者雖巴里坤古城印委各員實力查禁而偷越仍難杜絕南疆吐魯番八城纏回見磚茶則喜謂即承平時湖茶非私販筒子茶可比惟地方新復官茶屯滯者多而票販成本息耗愈久愈虧正思減價出售以清夙累若允俄商入內置貨勢必侵佔引地票販虧累無從取償此患之中於商者也經商之事必先計成本合貨價運脚盤攪三者估之攤入貨色爲成本再計市值之高低爲利息之贏縮大抵皆然泰西各國之通商者均由海道入長江抵漢口雖遠逾數萬里皆一水可通貨價雖同而運脚較陸程減

少不止十倍洋商初入長江見漢口爲百貨滙萃埠頭爭相購地修造洋行又於江西之九江購修如式乃不數年生計蕭素洋行且欲求售水路經商尙如此之艱也茲俄商懋遷務遠欲與海國競利前車既覆後轍方適加以陸運脚價行棧盤攪合計成本較各國商人奚啻十倍縱善於營運而折閱必隨之折閱不甘又將顧而之他爲求贏計於是電線鐵路諸事議論紛紜殆有應接不暇者斯時偶與通融異日即多煩惱再圖補救悔之已遲此患之中於國計者也再四思維非賴使臣堅持定見剴切言之俾決計阻止不可至喀什噶爾寄居俄國屬民驅逐出境各節南路文報絡繹從無隻字道及未知俄人何以云然惟近接道員羅長祐緘謂英國駐土爾基領事欲來喀什噶爾會晤措詞甚恭又漏逸賊酋愛克木汗條勒阿布都勒

其定著專言 卷二
哈瑪寄居烏魯克恰提近甫渡河而南招致回部游手意在窺邊羅
長祐已調馬隊兩旂赴烏帕爾築壘駐防餘均照常安謐奏入得
旨所陳妨民病國各條洵屬老成之見特崇厚現已定議畫押事機
已誤惟有亟籌補救設法挽回著左宗棠妥議具奏未幾崇厚電報
約章皆已定議擬於八月八日赴黑海畫押後由南洋回京覆命並
將所擬條約十八款摘要知照經總署詳加覆核償費一節尙不過
多通商則事多轉轄分界則弊難枚舉奏請

飭下疆臣覈議迅圖補救

上閱條約第七款稱中國接收伊犁後陬爾果斯河西及伊犁山南
之帖克斯河歸俄屬第八款稱塔城界址擬稍改是於同治三年議
定界內劃去西南地段不少伊犁勢成孤立控制彌難況山南要道

可達南疆尤關全局第十款於舊約喀什噶爾庫倫設領事官外增
出嘉峪關烏里雅蘇台科布多哈密吐魯番烏魯木齊古城七處亦
欵酌設領事第十四款並有俄商運俄貨走張家口嘉峪關赴天津
漢口過通州西安漢中運土貨回國同路之語口岸過多有碍華商
生計允行則實受其害先允後翻則出仍在我左宗棠於新疆情形
瞭如指掌金順錫倫久在西北諳習邊情李鴻章沈葆楨素顧大局
著一幷核議密速具奏宗棠覆陳俄人自佔據伊犁藉稱代我收復
爲要素計幷照其國法按竈科賦以充兵費亦稱鑿足矣光緒三年
西洋新聞紙載俄國謬願得俄元二百五十萬交還伊犁海上傳播
未必無因此次償款忽議增五百萬元其挾詐相償已可概見上冬
今春陝回及布魯特汗安集延條勒入犯時官軍獲賊搜有俄票昨

次布魯特安集延諸賊由俄境阿來地方出竄經官軍勦洗漏網數十人仍遁俄境據活賊口供均由俄官驅遣四次縱賊犯邊官軍追勦未越俄境一步我之守約如此彼之違約如此尙何信義可言當崇厚議收伊犁時俄官首以

恩敕爲請金順即派殷華廷賚示赴伊張貼俄官七河巡撫擋之殷華廷二次往探不准復入似此任意把持不獨違慢

朝旨并置其君與外部諸臣成議於不顧其悖謬又如此俄之踞伊犁也將大城西北三城毀其廬舍進東清水河塔爾奇綏定三城居以漢回蘆葦溝城盤子等處均棄而不守惟取各城堡木料於金頂寺營造市廛幾二十里察俄人用心蓋欲踞伊犁爲外府我收舊土俄即索鉅資伊犁一片荒郊北境一二百里閒皆俄屬部孤注萬里

何以圖存况崇厚所議第七款接收伊犁後陜爾果斯河及伊犁山
南之帖克斯河歸俄屬無論兩處地名中國圖說所無但就方向而
言是劃伊犁西南地歸俄也武事不競之秋割地求和者有之茲一
矢未聞加遺乃遽議捐棄要地鑿其所欲譬猶投犬以骨骨盡而噬
仍不止此可爲歎息痛恨者矣金順錫綸之擬緩收伊犁而以沿邊
喀什噶爾烏什精河塔爾巴哈台四城宜足兵力濬餉源廣屯田堅
城堡先實邊備自非無見惟伊犁現無定議謀新疆者非合南北兩
路通籌不可現在伊犁劃界未定則收還一節自可從緩喀什噶爾
烏什規畫已周毋庸再議其塔爾巴哈台精河急宜加意綢繆應由
金順錫綸自行陳奏請

旨所有崇厚定議畫押十八款除經總理衙門指駁各條外第二款

中國允即赦免伊民被俄官截阻齎示委員不准張貼第三款伊民
遷俄入籍者准照俄人看待意在誘民歸俄而以空城貽我與截阻
齎示委員同一用心第四款俄人在伊犁准照舊管業中外商民雜
處無界限可分是包藏禍心豫謀再踞商務多設口岸既奪華商生
計且啟蠶食之機俄商貿易本無異圖俄官則欲藉此爲通西於中
之計非僅若西洋各國祇爭口岸可比且俄之初意注在嘉峪此次
乃議及關內及秦蜀楚各處非不知脚價繁重無利可營蓋欲藉通
商深入腹地縱橫自恣使我無從禁制耳嘉峪關設領事容尙可行
至喀什噶爾通商一節同治三年定議迄未舉行此次劃界未定姑
從緩議而烏里雅蘇台科布多哈密吐魯番烏魯木齊古城等處廣
設領事欲因商務蔓延地方化中爲俄斷不可許此商務之宜設法

挽回者也俄人容納叛逆白彥虎一節崇厚曾否與之理論應俟其覆命時請

旨確詢以憑核議俄人始以官軍勢弱欲誑榮全入伊犁陷之以爲質繼見官軍勢強難容久踞乃藉詞各案未結以緩之此次崇厚全權出使而布策先以巽詞餽之枝詞惑之復多方迫促以要之意以備於中國未嘗肇起釁端可開執中國主戰者之口當此時事紛紜主憂臣辱苟心知其危而復依違其間欺幽獨以負

朝廷就便安而誤大局具有天良者豈宜出此就事勢次第而言先之以議論委婉而用機決之以戰陳堅忍而求勝烏里雅蘇台科布多邊務應請

飭下該將軍大臣豫籌布置以臻妥慎若新疆南北兩路業已調齊

將領分布各處以厚兵力矣金順覆陳細閱條款所載其必不可允者有七一則伊犁民人遷俄入籍者准照俄人看待通商以來奸民久倚外國爲逋逃蔽况新疆夙鮮居民自大兵勘定後強者誅夷悍者走險今寄居伊犁者非懦弱良民即漏網逆回也若復允其所請勢將舉伊犁而空之且逆回驕悍性成必倚俄人滋事彼將暗縱之使擾我邊鄙顯問之則佯爲不知如去歲所收陝回之竄擾其明徵也一則俄人在伊犁置產准照舊管業彼自踞伊犁九城內孰非其有興修創造莫敢誰何若如第四款所議伊犁豈復有駐足之所且或於形勢要區彼皆豫爲佔據詭託置產將驅而去之耶抑忍而受之耶驅而去之是謂背約忍而受之是謂養癰此自困之道也一則據收伊犁後陞爾果斯河及山南之帖克斯河歸俄屬并塔城界址

擬稍改查陬爾果斯河即霍爾果斯河帖克斯河即特克斯河自同治三年定約藩籬之地盡爲俄有哈薩克遂爲俄民致塔城一隅去俄鎮僅三十里洵所謂聚鐵九州鑄此大錯若如左宗棠之議作爲甌脫彼此不居尙可挽回於萬一必如俄人之請則霍爾果斯河距伊犁大城僅九十餘里特克斯河可通南路塔城尤當共衝一日割割隸俄弱已強敵彼直扼我吭而撫我背矣此界務之必不可允者也至如第十款准嘉峪關烏科哈密吐魯番烏魯木齊古城酌設領事第十三款設領事處及張家口并準設棧第十四款俄商運俄貨走張家口嘉峪關赴天津漢口過通州西安漢中運土貨回國同路自古馭外之法不貴乎我之能征而貴乎彼之不能入我之所以重伊犁者以其爲中土屏蔽也俄人於中國常存耿耿逐逐之心所以

遲遲而發者誠以言語不通警幣不達恐取之而不守耳若如通商各議則民之情僞彼得而知之地之險要彼得而據之逆回之反側彼得而煽之奸民之蠢動彼得而乘之種種弊端難以枚舉是我得一彈丸不守之地蕩然自隳其中外之防直不啻舉全土而昇之矣其有病於華商生計猶後也此又商務之必不可允者也總之代收代守交還從古無此事理彼非有大欲存乎其中必不肯輕以相就前措之不敢濂議減兵者以此屢以餉絀爲慮者亦以此就目下兵力而論置邊防則兵分而力弱取伊犁則兵合而勢強爲今之計惟有詞嚴義正覆以另議之文令總理衙門或由左宗棠反覆與之辨論并於喀什噶爾烏什精河塔爾巴哈台分設重兵嚴密戒備其烏科兩城亦應及時籌辦以防不虞如能就我範圍交還伊犁固可相

安無事否則相機而動補牢猶未晚耳大學士李鴻章亦言約章第四款俄人在伊犁准照舊管業第十款於喀庫二城設領事外准添設嘉峪關等七處領事官第十二款俄國在蒙古天山南北路貿易均不納稅第十三款設領事處及張家口准設棧第十四款俄商運俄貨走張家口嘉峪關赴天津漢口過通州西安漢中運土貨回國同路凡此俄商所沾之利不如是不足慊其志而伊犁亦不肯還然彼此民人雜處界限仍未分明添設口岸太多辦理易生枝節其餘奪華商之生計侵官茶之引地在彼獲益不少在我耗損已多至分界之事第八款塔城界址擬稍改現尙未知其詳第七款陬爾果斯河及山南帖克斯河歸俄屬就總理衙門寄到分界圖說核之伊犁西界劃去數百里患猶淺南界劃去亦數百里跨踞天山之脊隔我

南八城往來要路細揣俄人用意一則哈薩克布魯特游牧諸部新附俄邦今復遮其四境絕彼嚮化之途一則扼我咽喉使新疆北聲氣中梗心殊叵測夫中國之必收伊犁以其居高臨下足以控制南八城談形勢者謂欲守回疆必守伊犁也今三面臨敵將成孤注自守不遑豈足控制南路現修俄約有批准後通行之語原可置而不行第此次崇厚全權出使不可謂無立約定議之權若先允後翻其曲在我既失伊犁而復居不直之名爲各國所訕笑所失更多且彼必仍以分界修約爲辭時相促迫迫不已必生兵端中俄接壤之處約萬餘里防不勝防邊衅一開恐僅照現議亦不可得況日本探聽伊犁消息以爲詘伸進止若聞俄事不諧或將俟隙而動即英德各國修約恐亦因而生心是崇厚所定俄約行之必有後患若不

允行後患更亟中國必自度果能始終堅持不至受人擠逼且必自度邊備完固軍餉充裕足資控禦乃可毅然爲之否則躊躇審顧祇能隨宜設法徐圖補救商務補救之方一曰立法一曰用人中俄舊約原許俄商順便往蒙古各處貿易今既擴充甚多宜審各處民情地勢俾當事督同地方官妥議章程由總理衙門核定劃一暫爲試辦再籌經久之道其張家口嘉峪關爲東西兩路入內要地尤宜嚴密稽查凡沿途抽換私賣逃稅等弊分別照約罰辦勿稍含混如沿途不得銷售包攬則於無限制之中稍有限制此立法之要也商務既舉將來陸路通商益廣交涉益繁更制必益多其安肅及張家口監督兩缺宜與海關道員並重新疆各城如郡縣暫難改設或擇要添設道員遴選洋務人材設法調劑以期辦理妥洽至各路將軍大

臣持節臨邊責任艱鉅必得熟諳時務威惠交孚乃有裨益似應不拘資格滿漢文武並用以重邊防而資整理此用人之要也以上兩端或稍可補救萬一云已而崇厚率行盡押擅自回京

上怒其貽誤君國六年正月革職拿問交刑部治罪閏二月

特旨現改派曾紀澤前往再議惟彼國不遂所欲恐伺隙啟衅必須有備無患以折狡謀左宗棠熟習邊情老於軍事著將南北兩路邊防通盤籌畫務臻周密劉錦棠金順兩軍均在前敵尤爲喫重錫倫現駐塔城兵力太單且與俄人逼處如能就地選募邊人招徠藩屬亦可壯我聲威著與左宗棠商酌辦理棍噶札拉參久在邊疆聞爲俄人所憚著錫倫傳

旨令其銷假赴營統帶所部以爲犄角左宗棠前有移營哈密之奏

究竟移紮彼處能否聯絡聲勢有裨前敵是否後路不至懸隔可以兼顧務即妥籌情形斟酌進止所有一切機宜着迅速具奏以慰

廩系宗棠奏言現擬規復伊犁東路宜嚴兵精河一帶扼其紛竄伊犁將軍金順主之中路由阿克蘇冰嶺之東沿特克斯河逕趨伊犁計程千二百五十里本商貨往來之道廣東陸路提督張曜主之西路取道烏什由冰嶺之西經布魯特遊牧地約七站抵伊犁計程千二百五十里此路久經封禁道光初那彥成德音阿指爲換防官兵往來捷徑者也通政使司劉錦棠主之三路兵力本不爲單然踞伊犁之俄兵往來靡常未知確數此外旂營存者寥寥而錫伯一旂雖尙有八九千之多心懷兩端非但難期得力並須防其內訌是三路之軍戰守相資非厚積其勢不可也劉錦棠一軍前飭譚上連選募

舊部七百餘名並統楊昌濬挑選三營餘丁百數十名赴該營補額五月可到喀什噶爾至檄調之譚拔萃等五營已催其迅速成行俟到齊後劉錦棠始可分軍出烏什以圖進取張曜一軍擬增募皖北步隊千名挑選舊土爾扈特馬隊數百騎同進再撥步隊四營馬隊一營歸其節制並擬令易開俊率所部馬隊填防後路金順一軍擬分撥皖軍卓勝營馬步聽其調度並飭金運昌分所部馬隊五百步隊千五百助之塔爾巴哈台地界窮邊與俄逼處錫綸兵力既單擬調烏魯木齊等處土勇千一百餘名前往助之此規復伊犁三路布置大畧情形也就現在局勢言之金軍扼守精河一帶遏其紛竄不必以深入爲功中路阿克蘇之軍直搗伊犁大城斷金頂寺歸路劉錦棠由烏什冰嶺西路逕指伊城則俄援伊犁來路可斷如此路難

行則屯兵喀什噶爾外卡遙張深入俄境之勢亦使知內患堪虞時
勤狼顧不敢復爲豨突矣時金順亦以伊犁接壤之地路路可通派
曹正興張長安李發各營駐大河沿王鳳鳴方春發張懷玉各營駐
精河伊里布所部移紮博羅塔拉馬玉崑所部移紮固爾圖精河迤
東托多克有沙克都林札布之馬隊托多克迤東塌橋有蘇隆額之
官兵四顆樹有雙全之吉林馬隊首尾一氣聲息相通金順自督親
兵禮字各營駐紮庫爾喀喇烏蘇鎮靜訓練以備緩急五月宗棠自
赴哈密熟察形勢即於科城安設坐探科通古城八台外復設漢三
台以速郵傳古城西路及巴里坤木壘河均增屯馬步各營並調提
督蕭章開率兩營駐紮西州瞭望梭巡以資防護秋七月因西事孔
亟

詔宗棠來京陛見以備顧問適聞俄羅斯揚言兵船二十三隻由黑
海阿非利加駛至中國洋面圖封遼海意在脅和以索兵費宗棠奏
言俄人是否虛聲吶喝其先肇衅端已屢有目共覩以兵論之彼自
蹈不韙於我何尤以勢論之彼兵船二十三隻尙不敵福建船政一
局所造之多以人數言之輪船至大配裝人數多不過千小者僅容
數百以器械言之彼國製造向不甚精自爲土耳其敗後向德國購
製大小鎗礮歷時未久存儲必不裕其敢肆披猖者不過以西俄腴
地爲質舉國債五千二百萬兩濟惡有資耳而實則剗肉醫瘡久之
瘡未斂口肉已垂盡亦何能救其傾危中國自平髮捻回逆以來制
兵雖未足額而習戰之勇丁驍壯之將領隨地選募尙易成軍礮械
雖未充盈而製造之匠師採購之洋製專供調發尙無短絀故從前

諸役自用兵以至底定先後各十數年當兇燄倏張其勢力十倍俄國究之禽獮草薙種滅無遺則

廟謨素裕天定人和之效固昭然可觀也惟俄夷既肆鳴張近畿重地似須增調久練兵勇以壯聲勢資調援烏里雅蘇台近報有俄兵陸續到界伊犁阿克蘇喀什噶爾外卡屯駐之俄兵據報逐漸撤減或係改趨東北亦未可知已飭營務處王詩正等率所部親軍及旌善馬隊五起馬步共二千餘名徑赴張家口駐紮以備調遣未幾俄人知勢有不敵又經曾紀澤曉以大義折其狡謀改從另議曾紀澤將新約奏陳奉

旨准其畫押其接收分界事宜

諭旨仍派錫綸會商金順並著升泰一同前往按照曾紀澤新訂條

約妥慎辦理不得稍涉輕心伊犁收還時金順自應率部駐紮申明紀律務令秋毫無犯將來善後諸事宜即由金順遴員設局隨時商辦伊犁居民其願遷俄者既照約聽其自便尤須嚴禁擾累善爲撫輯至從前被賊迫脅情有可原之民教人等應由金順按照新約第二條出示曉諭以廣

皇仁先是錦棠得總署函知和議已成惟白逆等未聞議交恐貽將來之患請

飭總理衙門與彼國駐京公使執約理論或令曾紀澤向俄言明務將白彥虎等解回或就近押交新疆軍營懲辦以彰國法快人心又以新約第五條督辦交收伊犁之陝甘總督派員往塔什干城知照土爾齊斯坦總督局勢變遷未使拘泥請即由金順會同錫綸升泰

就近派員以期便捷

上以白彥虎一事會紀澤當能相機籌辦陝甘總督曾國荃病未到任令金順督辦交收錫綸作爲特派大臣由金順派員往俄照約妥辦時錫綸奏塔城參贊未可久懸

上改命升泰爲特派大臣七年秋升泰至伊犁與俄使遵約會辦卽派員知照俄總督限三個月辦竣該處居民均免究治有願居原處爲中國民或願遷入俄國者均聽其便自交收日起限一年遷定俄國從同治十年代收代守所需兵費及補卹各款共慮布九百萬圓自換約日起作二年歸付金順旋於八年春率軍鎮守珠崖從此舊疆收復絕塞九城安於磐石矣

分界

光緒七年夏五月

上諭接收伊犁及分界事宜前派錫綸會商金順相機籌辦現在會紀澤與俄國新定約章業經批准一俟互換後俄國派有大員約定何處交收卽著錫綸馳往會晤并著升泰一同前往按照會紀澤新訂條約及所繪界圖妥慎辦理錫綸旋奏准不赴

詔金順督辦升泰爲特派大臣八年秋七月金順請敕科布多幫辦大臣額爾慶額就近會同俄官將西北邊界薩烏爾嶺奎峒山等處詳細履勘照約畫分以昭妥協科布多參贊大臣清安旋會奏科境游牧沃壤前已分讓俄人十分之六蒙民僅存烏梁海所屬哈巴河阿勒泰山一帶就牧營生復有哈薩克人衆擁擠生計日蹙若將哈巴河再行分割則蒙哈部落必至無可容身蒙民現聞勘改之議人

心驚惶不肯遷讓誠恐釀成事端查新約並無科城名目且前定之界已建牌博豈宜另有勘改金順寄到地圖所繪奎峒山黑伊爾特什河薩烏爾嶺等處與新舊圖說核對不符其名曰奎峒山者或係科屬阿勒泰山此山綿亘數千里形勢巍然科塔兩城倚爲屏障俄人巧爲含混意圖據高臨下扼我要區名曰黑伊爾特什河者或係科屬額爾吉斯河此河順流而下逕逼俄境且達黑龍江彼若佔據以通運道最爲便捷一有緩急兵可衝波而至名曰薩烏爾嶺者或係塔屬霍博克賽里山此山爲塔城門戶與科界唇齒相依若分割歸俄不惟科塔隔絕必有覬覦瑪納斯古城之勢彼若聯絡吐魯番與南八城首尾相應卽伊犁烏魯木齊東路亦斷矣況哈巴河及布隆托海分屬俄界彼必就地開墾屯兵屯糧無往不利假使修鐵路

以駕火車溶水道而行舟楫四通八達任其縱橫則俄勢愈不可遏
竊恐地利一失後患無窮請

敕下廷臣妥議得

旨該處界務崇厚貽誤於前會紀澤力爭於後既定新約祇可就原
圖應勘分處力與指辨酌定新界至圖中黃綫以西蒙民哈夷約有
若干應如何擇地安插籌款撫恤并著清安額爾慶額會商金順升
泰悉心妥籌具奏惟分界期迫一時恐難就緒應由金順升泰知照
俄官量議推展並由總理衙門知照會紀澤轉咨辦理總署旋接會
紀澤覆稱俄於塔界力求妥速倘因緩分別生枝節似屬未便且勢
難再改緩辦無益可否九十月另擇一期請

旨飭辦恭親王等奏此次劃界約分三段西北科塔爲一段伊犁爲

一段迤南直至喀什噶爾爲一段定約時伊犁一段爭論最久故界址釐然按圖可稽喀什噶爾一段言明以兩國現有之地勘分亦尙直截惟科塔一段約內聲明應自奎峒山過黑伊爾特什河至薩烏爾嶺畫一直綫由分界大臣就此直綫於舊界間酌定新界是此段界址顯有出入之處履勘議分關係非淺若不詳慎從事誠有如清安所稱失地利而貽後患者請

敕分界大臣迅速履勘酌中定議

上令升泰馳赴科布多與清安額爾慶額會商金順辦理并將蒙民哈薩克等妥爲安插毋任滋事時升泰會金順錫綸勘分塔城西南界段因哈薩克游牧地節節逼近俄疆恐俄繞越與俄使斐里德訂明牌博并派員會同俄官噶必丹鐵開米諾伏由南山伊犁交界之

喀拉達坂土斯賽溝口起北至布爾漢布拉克接哈巴爾蘇舊界止計千一百餘里共建牌博二十一處仍於要處暗埋鐵牌復飭委員劉肇瑞逐一查對均與新約相符圖呈

御覽清安額爾慶額派協領貴詳等馳至烏梁海開導蒙民并將安撫

恩旨剴切宣布人心稍定清安等隨傳左右兩翼散秩大臣及哈薩克各頭目詢明黃綫以西蒙民男婦約計七千餘名哈民向隸塔城現居科界者約計二萬餘人均在烏梁海西北境內游牧散居懇求收撫清安念彼族甚蕃本非科轄既不歸塔科必有以撫之否則終歸於俄恐貽邊患奏請先將東面蒙哈游牧地段節次騰移始能均勻安插倘狹隘不敷棲止容再設法辦理得

旨允行惟科塔之界原繪圖綫出入甚大升泰等前乘俄使未到將山川形勢預爲查明旋與額爾慶額面晤俄官巴布闊福撤伏策幅等悉心商酌俄人欲照圖中直綫以哈巴河劃界哈巴河地居上游爲科塔蕩籬若劃分歸俄不惟原住哈部蒙民無地安插卽科屬烏梁海塔屬吐爾扈特各處游牧亦俱逼狹釁端必多升泰等乃爲指辯相持十餘日無成議嗣將原約第八條內載同治三年科塔界約所定齋桑湖東界查有不妥之處應由兩國特派大臣會同勘改兩國所屬哈薩克並須分別清楚至分界辦法應自奎峒山過黑伊爾特什河至薩烏爾嶺劃一直綫就舊界間酌定新界等語細譯理論俄使理屈詞窮始允退離哈巴河迤西約八十餘里至畢里克河定界畢里克係小河原圖并未繪列若照此劃分則俄佔哈巴河上游

約二百餘里我僅三分之一道里遠近仍失其平即與原約悖復商
就俄國按西洋算法計之由舊界至哈巴河直綫止共二百八十餘
里折中議分以昭公允相持久之至七月初復允退出五十里議定
以阿拉喀別克河爲界距哈巴河至直綫共百三十餘里即原圖黃
綫旁所開小河也餘仿此酌依黃綫所指方位劃分或依山或傍水
就形勢爲新界其有碍道路及水源不便處商准公用不得截阻并
與俄使撤伏策幅照圖丈量由奎峒西至新界計離百四十餘里又
由新界北首起順至西南薩烏爾嶺穆斯烏爾嶺共長五百八十餘
里均核與圖綫相符升泰遂於七月中旬起程過額爾濟斯河南勘
分塔界額爾慶額亦徑赴科屬新界會同俄官撤斐索富由阿拉克
別克河口之喀拉素畢業格庫瑪小山梁上立牌博一處北至喀拉

圖柏山梁名阿克塔斯立牌博一處東至克忒阿什齊山梁立牌博一處東北至塔木塔克薩斯立牌博一處遇有河渠河心爲界或山嶺叢雜道路分歧商同俄官丈量覈計里數於適中地循照新定綫道劃分將地名逐細詳註以杜越佔與原定圖約黃綫部位大致相符其豎立牌博處兼埋諸記令久遠有考復同俄官書立科界條約鈐印互換以昭信守惟阿克哈巴河源乃此次新定界尾與舊界烏魯魯卡倫接壤新約註明河源爲界豎牌博埋暗記均派兵駐守旋便道察看舊界牌博細勘奎峒山地據形勝與阿勒泰山腹背相連爲中外關鍵力與指辯得移至阿克哈巴河源爲界奎峒山仍歸中土扼其險要誠邊圉之幸也俄官撤斐索富旋折回額爾濟斯河南會同升泰勘分塔界原約第八條內有將兩國所屬哈薩克分別清

楚一節前議新約時俄使初言人隨地轉繼議新界內外哈民各以
氈房四百頂定其去留不得逾數升泰答以歸中歸俄祇隨民志俄
使乃改議其原住新定界外哈民予限一年由兩國邊界官自行安
插嗣與俄官勘分新界即傳諭各哈目願歸俄者並不留難願歸中
者擇地安插不令一夫失所哈目堆森伯特噶子圖列願具結歸中
指示哈民以奎峒山左右及哈巴河源畢里子克河源等處爲夏季
游牧以阿拉克別克河東及畢里子克河哈巴河阿拉克台等處爲
冬季游牧并飭卡倫侍衛富保妥爲照料旋繞北山出大彥淖爾酌
量安插烏梁海兩翼蒙部以和里木圖河雅瑪圖約洛圖西里不拉
克爲夏季游牧以罕達蓋圖河塔里雅慶格里河烏隆古河爲冬季
游牧哈目章噶爾吉勒哈什克伯什等各蘇木以奎峒山東之忽木

斯山松達拉克哈納斯淖爾等處爲夏季游牧以大彥淖爾薩克賽河德里滾河等處爲冬季游牧均毋攙越以啟爭端哈密幫辦大臣長順派勘中段分至哈布塔蓋沁達蘭而止塔城西南阿魯沁達蘭一段未分金順函囑升泰將科界勘畢先知照俄官斐里德勘定此界時升泰勘辦科屬哈巴河阿勒泰山奎峒山等處前進即布隆托海霍北克賽里爲塔屬東北界直達塔城乃順道前往會同俄使派員嚮導一律劃清于是西北科塔之界定長順勘分伊犁中段本年七月初馳會俄官佛哩德自伊犁西南天山北麓那林喀勒噶山口起至伊境東北喀拉達坂止沿邊履勘逐段建立界博已於九月中旬一律完竣惟距那林東北百餘里格登山有

高宗純皇帝乾隆二十年剿平準夷銘勳碑記深懼淪胥考核新圖

未載山名檢查同治三年俄人輿圖此山已劃歸俄壤遂結營山下與俄官往復力商始允自特克斯河劃格登山一隅仍屬中土長約五六十里寬稍殺當即會立界博復查新約第七條載烏宗島山距廊里札特村約五十餘里烏宗島東北爲錫伯營屯田水源俱在上游西南多係纏回圩子均有關係俄官欲由烏宗島劃分與之反覆辯論即由廊里札特村東杜拉圖村西中間小山分界會立鄂博並由金順逐段安設卡倫派撥弁兵護守西北過伊犁河入霍爾果斯河悉遵總署頒行約圖逐一詳勘劃定自那林至哈拉達坂止共立牌博三十三長約千三百餘里將設立牌博地名數目及山川起止界綫形勢互換約記載明那林哈勒噶山口建第一牌博山水北流水東爲中地水西爲俄地出山順水東北建第二牌博東北至草野

建第三牌博又北至草野建第四牌博北至諾海托勒蓋山在山上
建第五牌博北至特克斯河南沿建第六牌博過特克斯河東北格
登山所出蘇木拜水流入特克斯河南爲中地北爲俄地自蘇木拜
水逆流至格登山口建第七牌博東北至沙爾套山西南斷處建第
八牌博東南爲中地西北爲俄地沙爾套山東北斷處地名康哈其
水東南流在水西沿建第九牌博東沿建第十牌博東北至喀爾套
山之達巴罕建第十一牌博山梁西北至山高處逐段建第十二至
十五牌博西北至沙爾諾海小山北岸建第十六牌博北至沙爾諾
海別德圖二小山斷處建第十七牌博北至特奇勒干小山建第
十八牌博西北至伊犁河南沿霍爾果斯河水流滙處草野建第十
九至二十五牌博北至別珍套山又西轉至康哈達巴罕建第二十

六牌博西北至庫克烏蘇山建第二十七牌博西至平高德木克達
坂建第二十八牌博東北由阿拉套山之達巴罕至薩爾坎斯克山
中巴散斯克山庫克托木索達坂喀爾達坂建第二十九至三十三
各牌博以阿拉套山東南爲中地西北爲俄地其霍爾果斯河東西
兩沿居民准以河水爲兩國公水河中有洲處爲兩國公地分界後
限三年每至六月兩國各派二員隨帶兵丁一自那林哈勒起至伊
犁河南沿止一自別珍套山起至喀爾達坂止將所立牌博會察一
次如有損壞仍照舊章補修載入條約永爲例子是伊犁中段之界
亦定巴里坤領隊大臣沙克都林札布勘分南段俄人狡詐必欲以
薩瓦巴齊爲界薩瓦巴齊在天山之陽距山梁尙遠俄人設卡據守
毫無隔閡華民舉步有越境之嫌與俄官咩登斯格詳指形勢再三

辯論自拉林哈勒哈河起過穆爾特達坂迤西罕騰格爾頂上接薩瓦巴齊至喀什車庫庫爾圖克爲界中間各達坂險峻難登未建牌博均指天山中梁爲界及勘至別疊里達坂即於南面陡崖兩邊相距二十二丈五尺建立牌博西北屬俄東南屬中凡天山斷處由西北流過河水照約不許改截源流復從別疊里山逐段履勘行抵烏什之烏奇寒氣逼人俄官堅請停勘約十月初齊赴喀什噶爾面商幫辦軍務張曜與俄官互換文約議定明年五月再行會勘南界薩瓦巴齊一段幸力與爭辨得指定天山中梁劃分不失屏障經金順縷晰奏明當劃分時督辦軍務劉錦棠深慮俄人侵占險要奏言伊犁通南捷徑有四一自那喇特卡倫經珠勒土斯察罕通格兩山以達喀喇沙爾一由穆素爾達巴罕渡特克斯河踰冰嶺以達阿

克蘇之札木台一出伊克哈布哈克卡越貢古魯克達巴罕以達烏
什一出鄂爾果珠勒卡倫踰善塔斯巴爾琿兩山渡納林河以達喀
什噶爾然阿克蘇冰嶺台路艱阻萬狀夏月冰渙四山坼裂溢流峭
壁林立莫能飛渡亂後台站盡替現存阿屬七台照舊安設其喀喇
沙爾一路曠廢已屆百年陵谷變遷道路通塞水草有無均難懸揣
疊經行察鮮據昨已函致金順請將山北情形確實查覆再議疏通
其納林達道早非我有自可毋庸議及獨烏什貢古魯克一路地界
八城之中爲南北相通第一津要遠在界綫東南新舊條約

皇朝輿地圖志班班可考也按塔城舊約所載伊犁南界過那林哈
勒噶山特穆爾圖淖爾南之罕騰格爾薩瓦巴齊貢古魯克喀克善
等山統曰天山之頂行至忽嶺倚浩罕爲界是那林迤南約載之貢

古魯克明與罕騰格爾諸山連類而及且申言天山之頂其確指貢古魯克山頂爲言非指烏什之貢古魯克山麓爲言義至明也本年八月中旬沙克都林札布帶同俄使自阿克蘇行抵烏什由貢古魯克雅滿素各卡倫繞貢古魯克山麓至別疊里達坂共立界牌二處俄使各埋銅牌一面所過山峽卡隘城堡逐一繪圖并將烏什城垣丈量規計繞出布魯特牧場周迴游歷延展四十餘日至九月杪始出烏境十月初沙克都林札布同俄使密登斯開行抵喀什噶爾詢知阿烏邊界從罕騰格里至別疊里山已立牌博其奇恰爾達坂迤西現已積雪難行擬俟來年五月再行勘辦并鈔寄喀什噶爾互換界約逐細覈閱如第一條由那林哈勒噶河起過穆師爾特達坂嚮西罕騰格爾頂上接薩瓦巴齊又從薩瓦巴齊山口卡子以至貢古

魯克山口繞至天山均因達坂高險人難越過通指天山中梁爲界東南屬中西北屬俄凡天山斷處屬西北流河水不許改截源流尙與塔城舊約相符似俄使亦知約不可背者何以貢古魯克山口至別疊之達坂路兩邊相距二十二丈五尺又復埋立中俄兩國牌博耶所稱別疊里卽畢底爾向西北流河水當卽阿克蘇上流之畢底爾河山口達坂路當卽烏什出貢古魯克卡以達伊犁之路也今所換界約凡貢古魯克以上各山通指天山中梁爲界乃復於貢古魯克山口及別疊里之達坂路相距二十三丈五尺埋立中俄兩國界牌侵占鄂博至畢底爾河源且將烏什城垣丈量就其約章按其舉動實屬支離刺謬自相矛盾居心叵測已可概見失今不言後將髮指此次會勘新界爲定界乃於俄界外中界內駐兵設卡任意作難

忍之則有積薪厝火之憂發之則有投鼠忌器之慮如北路哈巴河
故事其明徵也迄今科界黃綫迤西蒙民暨哈薩克三萬餘衆撫綏
安插重煩

宸廑將來作何了局尙難懸擬若貢古魯克至別登里山南達坂路
所立俄界兩處不趁劃分未定按約索還則現隸烏什之奇里克胡
什齊兩布魯特部落勢必自撤藩籬終歸俄有而貢古魯克通伊犁
捷徑非我所能問津南北隔絕卽入城東西亦多梗阻伊犁勢成孤
注雖得特克斯猶之未得矣微論有事而徵兵饋餉窒碍不行卽平
時文報往來必須繞越隔閼孰甚焉請

飭總理衙門向俄國駐京公使據理按約與之辨論所有伊犁南界
應照此次中界所定格登山紅綫循格根河順喀什噶爾西邊行至

葱嶺倚浩罕界爲界中間應行勘分處支節繁多務須責成分界大臣恪遵

諭旨力與指辨酌定新界勿稍遷就然後由烏什貢古魯克出卡以達伊犁之路足可索還不致別生梗阻所立貢古魯克及別疊里達坂路兩處界牌應一律拔除凡新約越佔處悉予更正并懇

諭令會紀澤與俄國原派大臣原始要終以重邦交而清邊界必兩昭明信而後已九年春正月

上添派長順會同沙克都林札布查照錦棠所奏妥慎辦理長順旋奏張曜沈毅有謀又最留心邊事彼處形勢洞悉無遺請

敕就近會勘詳慎討論庶免疏虞至貢古魯克山口及別疊里達坂如果侵佔至畢底爾河源致南北隔絕就新定圖約力與指辨應可

據理索還但界博已立界約已換俄人素性狡黠若未奉該國重勘
明文必藉詞推諉懇

飭總理衙門先向俄國駐京公使辨論明晰並請

諭令會紀澤與俄國外部大臣反覆詳說切指此處界牌誤立使轉
飭分界俄官照約更正似覺較易春三月

上諭長順前勘中段地界頗合機宜現在南段界牌雖立尙未定局
張曜於該處地勢較熟惟帶兵駐紮防所未便遠離毋庸添派會勘
仍著將一切情形與長順沙克都林札布詳細籌商妥爲辦理至會
紀澤所定界綫本自分明全在分界大臣於履勘時據約力爭以期
設法挽回毋得意存諉卸劉錦棠金順如有所見亦著隨時知照長
順等斟酌妥辦五月初長順行抵烏什察閱沙克都林札布咨送勘

分界圖與總署原頒圖約及烏什局員周應棻所呈圖說均與紅綫相符旋與原立界牌委員分道覆勘尙無錯誤覆奏劉錦棠原奏別齊里即畢底爾山口達坂路當即烏什之貢古魯克卡由於圖載地名互異語言不同以致誤會至貢古魯克可達伊犁之路懸崖峭壁險阻異常承平時偶有土人行走亂後路爲賊毀人迹罕到即歸我有無裨大局矧在天山之陰紅綫之外彼族譎詐安肯聽從按新疆形勢僅冰嶺一路可通南北往來梗阻堪虞且密邇俄境終難進退自如欲求大局全歸版圖必須循格根河由喀喇廊勒順納林大道至喀什噶爾方無隔閼但兩次所載條約均須更換揆諸時事終非易易則貢古魯克界外屬俄之路似不必遽起爭端徒失和議沙克都林札布與俄使咩登斯格辦理妥協不若仍由一手經理以免紛

歧再查喀喇沙爾由草達坂珠勒土斯山直達伊犁路可行車前此俄人設卡防守原屬伊犁腹地居南北之中亟應疏通以期便捷現派員確察情形令逕稟劉錦棠等酌商辦理得

旨允行於是沙克都林札布仍會咩登斯格從烏什別疊里山迤西之喀克善山接續分起至喀什噶爾所屬之烏魯一帶逐段履勘由蘇約克山轉向喀什噶爾之西按照圖約分立牌博而張曜復奏依爾克池他木與現管地方舛錯太甚考塔城舊約載明行至葱嶺靠浩罕界爲界俄官欲照圖綫在依爾克池他木立界該處天山以內地勢平衍既不沿葱嶺亦不靠浩罕實與條約不符現管之帖列克達灣係葱嶺正幹與西南現管之界同一山梁山陰皆浩罕舊地爲今俄國費爾干省之界中間廓克蘇至伊爾克池他木一帶係喀屬

岳瓦什布魯特牧地水草既饒道路又近部衆賴以資生比會同沙克都林札布按約力爭俄官旋因病回國當經咨商劉錦棠金順轉向俄國外部商權俟議定在帖列克達灣設立牌博再行換約奉旨著總理衙門覈議具奏時長順接張曜先後咨送輿圖均於總署所頒官圖紅綫外添畫一綫稱係現管地方必須爭回即會商沙克都林札布由別疊里山順中梁察明紅綫並照現管勘至帖列克屯木倫一帶俄官不肯於此處畫分堅請按照紅綫在伊爾克什唐立界指辯多日迄無轉機察現管之界有三一喀喇多拜在帖列克提達板迤北綫外約八十餘里係天山之陰一帖列克達灣在喀境西綫外約二百餘里一屯木倫在帖列克達灣東南綫外約百餘里皆距紅綫甚遠勢難力爭若不趕分換約恐又別生枝節覈實奏陳而

沙克都林札布仍同俄使照官圖紅綫逐段履勘自喀克善山分起此山險峻難越不能窅立牌博同指山梁爲界由此向西南至庫嘎爾特山梁立牌博一處西南至奇哈爾立牌博一處西南至烏魯立牌博一處西南至巴圖瑪納克立牌博一處西南至庫倫杜立牌博一處西至和堅特立牌博一處西南至博孜咬克爾立牌博一處西南至黑皮恰克立牌博一處西至帖列克提達板立牌博一處西至倭圖魯立牌博一處西至黑子庫爾立牌博一處西至圖魯阿提即圖魯嘎特立牌博一處北至蘇約克立牌博一處西南至庫嘎爾塔立牌博一處西至伊提木阿蘇險峻如前同指山梁爲界西南至吐子阿蘇即阿來庫里立牌博一處西南至喀喇瑪阿蘇險峻如前同指山梁爲界西南至塔拉格依立牌博一處西南至色丹險峻如前

同指山梁爲界西南至薩瓦雅爾得立牌博一處西南至塔拉庫勒
立牌博一處西南至克斯達爾險峻如前同指山梁爲界西南至恰
拉卡拉立牌博一處西至東格爾瑪即喀喇別里立牌博一處西南
至以克則克即伊特特克立牌博一處南至伊爾克什唐立牌博一
處西南有瑪里他巴爾山烏斯別里山緊靠浩罕均係應立牌博地
方因山高雪積攀越維艱同指山梁至綫外之喀音噶里山爲界計
自喀克善山起至烏斯別里山止共立牌博二十二處指山爲界者
七詳考官圖紅綫均屬相符並於牌博下暗識銅牌當與俄使議換
圖約俄使因張曜咨商伊犁將軍行文往返需時稱病回國沙克都
林札布亦卽馳回喀什噶爾旋派員赴俄國窩什換回圖約考證無
訛時總理衙門遵

旨覆陳據張曜所奏尙須爭回帖列克達灣一帶地方而長順奏已照紅綫劃分定界兩人各行所見辦法亦涉兩歧且長順覆奏內稱依爾克池他木卽新約後載議准俄商出入卡倫山口之伊爾克什唐亦卽圖中之依爾克池他木河其處綫外並無游牧間有子遺布民均住卡倫附近地大抵力言張曜指爭地段非盡實情現將張曜長順各呈地圖與新舊紅綫洋圖詳細對核大致均屬明晰惟地名詳畧互異譯音各判方位亦未能一一相符按喀喇多拜一處新舊圖俱未載既據現來各圖在喀城之北紅綫外無可與爭應無庸議依爾克池他木河舊圖不載新圖正依紅綫界限長順所奏不誤其帖列克一處張曜所謂帖列克達灣者在喀城極西新圖列在紅綫外其屯木倫一處卽在帖列克南新圖未載舊圖則兩處地名皆無

惟載迤西喀喇庫里湖與各圖同却在紅綫之內新舊紅綫不符若此揣會紀澤定約時或因新圖不無縮入又知左宗棠咨報克復喀城有佔得安集延遺地邊界展寬之說故約內添西邊以現管爲界一語以預留地步既以現管爲界卽可不拘定紅綫此二處確在塔城之西原可力爭張曜所陳不爲無見但查新約卡倫單確有伊爾克什唐名目既指爲入口之路於此分界理亦甚長竊意俄官必明知地圖稍有展進之處故不肯現管爲界而堅以紅綫爲憑爭之誠恐不易長順所慮遲不換約恐俄人別生枝節亦係實情惟帖列克達灣是否係西邊要隘岳瓦什種人是否別無牧場請

敕劉錦棠金順就近熟籌利害確切查明金順旋接沙克都林札布咨稱帖列克達灣在喀城極西距依爾克池他木紅綫二百餘里地

勢孤懸一隅實非要隘而伊爾克什唐載在新約卡倫單設卡置兵以護出入依此立界險要固未失也岳瓦什部衆均住紅綫內之烏魯克恰提游牧距帖列克達灣迤東三百餘里地勢寬闊水草裕饒履勘時并無岳瓦什人在彼住牧會招其部長蘇唐伯克隨行如果係該部牧場自必明指地段求爲爭回乃追隨日久從未言及則帖列克達灣非該部民牧地可知又接劉錦棠函稱該處布魯特部落游牧爲生春東夏西迄無定所且人數甚少而牧地袤延依爾克池他木等處尙非要隘且沙克都林札布與俄官爭辦堅執不從實已心力交瘁似不必以區區一隅致碍邦交金順亦以南段疆界經特派大臣會同勘分幾費唇舌始得照圖綫定議邊隅片壤未便再招俄使重勘徒費周章轉致有碍大體奏奉

俞旨于是南段喀什噶爾之界亦定焉

通商

中俄通商先年因故禁阻伊犁交還仍弛禁開辦新訂約章載有通商數條并附陸路通商十七條伊犁塔爾巴哈台喀什噶爾庫倫四處俄國照約設領事官餘如科布多烏里雅蘇台哈密烏魯木齊古城等處由兩國陸續議商俄民在天山南北兩地各城貿易暫不納稅俟將來商務興旺再議徵收錦棠奏新疆各城久已設局抽收釐稅商貨必須查驗始准售銷今俄商運貨進卡如至新疆有局地方應請查驗蓋用戳記方可行銷如未銷完運赴他處亦應將銷過貨物開單呈驗蓋戳放行續至有釐稅處亦如之倘貨照不符送交俄官區處以杜包庇販運情弊約章載有專條在中國順事就施不過

畧增繁費而俄人甫經入市詎必盡悉約章不如由俄官早自傳文使各懷成範踵而行之無所疑阻則稱便矣條約又載俄商辦運中國土貨由恰克圖及新疆回國特將回國二字標明在中國途間只當逐查驗以防夾帶私貨原無准其銷售之理就令已運出卡亦不得由陸路復運進卡詳考舊章有由海口辦運中國土貨復運內地銷售之說從無自俄販運中國土貨由陸路復進口內銷賣明文凡新約所未改者皆仍照舊行俄商皆不知此往往將中國土貨復運進口雖經在事各員頻令折回似仍於義未曉華商完釐次數多而成本重俄商完釐次數少而成本輕詎可任其運銷以防華商生計俄官應將和約宣告該國官商辦貨時加意斟酌幸勿再誤反致折耗請

飭總理衙門照會駐京俄使一體照辦八年夏總理衙門有新疆開辦商務請暫免釐稅之奏

上諭新疆設卡徵釐藉資軍食現在俄貨暫不納稅而各部落人及內地華商仍令照章完納未免苦樂不均且恐弊竇叢生有名無實況沿邊人衆尤宜廣其生路以示招徠所有進出卡倫貨物往來新疆各城貿易者著概行暫免釐稅俟商務興旺照約議立稅則再復舊章錦棠遂將原設局卡概行裁撤惟本地土產如金銅牲畜等項課額仍飭赴各廳州縣暨各善後局照常交納十一年行省既開商務漸旺布政使魏光燾詳請興復稅務始設局哈密古城抽收百貨入稅十三年添設省城及南北兩路總分各局久之復請

飭總理衙門照會駐京俄使議定稅則一律開辦以昭平允不果行

戡定新疆記卷七

置省篇

新疆周二萬里形勢居西北上游幅員視中土倍數省地大物產五金并產五穀莫不生材木老山谷蔬滿畦圃疋棉皮幣屯都市牛羊馬駝之遂其孳生虎兕麋鹿之供其射獵固隱然一都會也然漢書稱三十六國分立其王爲五十五國種類屬雜風氣阻殊自漢武通西域後僅領以都護校尉猶興廢不常唐代置官亦祇伊州西州庭州諸屬其他無聞焉

國朝康熙雍正力征經營之至

高宗先平準部次定回部於是居國行國悉震聲靈考其設官凡四百餘員養兵萬有九千餘名武功之盛遠軼漢唐顧當日因時制宜

其隸版章屬司牧者惟鎮西迪化吐魯番未嘗胥全疆而郡縣之也
同治回逆之亂西域殆絕大難甫夷即稟

聖謨恢長策變更戎索襲以華風斯一統之宏規亦千古之創局也
是役也大學士左宗棠首建大策巡撫劉錦棠斟酌損益規模大備
布政使魏光燾贊左右之迨光燾護理巡撫益權衡時勢規畫久遠
乃克竟其功云謹采摭建置規模爲置省篇第三

光緒三年春二月官軍克吐魯番奏入

上詔宗棠統籌全局具陳措置之宜宗棠覆陳立國有疆古今通義
規模存乎建置建置因平時勢今欲省費節勞畫新疆長治之策紓
朝廷西顧之憂則設行省改郡縣事有不容已者請飭戶部兵部檢
發咸豐初年陝甘新疆報銷卷冊及新疆額徵俸薪餉需兵制各卷

宗俾得稽考舊章按照時勢從長計議四年春南北兩路悉平宗棠以創置行省繫天下全局請

飭廷臣會議

上不許仍飭宗棠酌議奏聞候

旨定奪

上又念郡縣以民爲本亂後人物凋殘其商戶回戶纏民見存幾何今設郡縣有無可治之民倘置省非宜此外有無良策并

飭通籌具奏宗棠奏言新疆之變起於北路迪化失守所屬相繼淪陷戶口傷亡最多漢民被禍尤酷頃大軍進剿連拔堅城而昌吉呼圖壁綏來回民又因畏剿逃奔南路煙戶頓減克復以來招徠耕墾戶口漸增迪化州舊額四千二百有奇現報承墾者已三千六百餘

戶昌吉舊共三千九百有奇今存四百數十戶阜康舊戶三千九十餘今存二百一十餘戶綏來舊戶三千七百餘今存八百五十餘戶奇台舊戶四千三百六十有奇今存五百七十餘戶濟木薩縣丞所屬民戶二千八百有奇今存三百五十餘戶呼圖壁巡檢所屬舊戶千七百三十有奇今存二百八十餘戶庫爾喀喇烏蘇舊僅八十戶有奇今存數十戶精河舊僅四十戶有奇今有百餘戶鎮西廳戶口無考舊種地六萬畝今報民墾三萬六千餘畝兵墾四千餘畝土客漸臻此北路民戶現存實數也鎮迪道屬自木壘河抵精河地多腴區土客民人及潰散勇丁領地耕種逐漸加增卽以目前論之亦非無可治之民也吐魯番舊隸鎮迪道荒地尙少糶石租稅現已逾舊額之半南八城除英吉沙爾壤地褊小烏什土性瘠薄餘均較吐魯

番爲饒而喀什噶爾和闐葉爾羌阿克蘇庶而且富物產豐盈又較各城爲盛劉錦棠張曜悉心經理開河引渠清丈地畝修築城堡塘站百廢肇興具有端緒較之北路尤易爲功是南北開設行省天時人事均有可乘之機失今不圖未免可惜此新疆之應改行省者也北路得之準部南路得之回部皆因俗施治未能與內地一道同風久已概爲邊地伊犁設將軍又設參贊大臣烏魯木齊設都統又設提督塔爾巴哈台葉爾羌均設參贊大臣喀什噶爾阿克蘇庫車和闐喀喇沙爾均設辦事大臣伊犁等處設領隊大臣五員塔爾巴哈台烏魯木齊庫爾哈喇烏蘇古城巴里坤吐魯番烏什英吉沙爾均設領隊大臣哈密設辦事大臣協辦大臣各一員葉爾羌設兼管和闐事務協辦大臣一員烏什設幫辦大臣一員喀什噶爾又設換

防總兵是邊地腹地皆一律視之無甚區別與經野馭邊之義不符將軍都統與參贊辦事大臣協辦與領隊大臣職分等夷或皆出自禁闈或久握兵符民隱未能周知吏事素少歷練一旦持節臨邊各不相下稽察督責有所難行地周二萬里治兵之官多治民之官少而望其政教旁敷遠民被澤不亦難哉北路糧員但管徵收而承催則責之頭目南路徵收均由回目阿奇木伯克等交官官民隔絕民之畏官不如畏所管頭目官之不肖者狎玩其民輒以犬羊視之凡有徵索頭目人等輒以官意傳取倚勢作威民知怨官不知怨所管頭目也內地徵收常制地丁合而爲一按畝出賦故無無賦之地亦無無地之賦新疆則按丁索賦富戶丁少賦役或輕貧戶丁多賦役反重事理失平莫甚於此貨幣之制子母不能相權爭訟之事曲直

不能盡達官與民語言不通文字不曉全恃通事居間傳述顛倒混淆時所不免此非官與民親通其情去其蔽不可惟廣制義塾先教以漢文俾略識字義徵收所用券票其戶名數目漢文居中旁注回字令戶民易曉遇有舛錯隨時更正責成各廳州縣而道府察之則綱目具而事易舉頭目人等之權殺官司之令行民之情僞易知政事之修廢易見長治久安之效實基於此新疆之應改行省二也查詢甘肅新疆餉數僉稱承平時每歲約銀五百餘萬兩自變亂以來冊籍散失難以覆按考道光二十七年甘肅口內外駐防滿洲蒙古旗綠官兵應需俸餉紅白賞卹等項四百一十五萬二千三百五十五兩內先一年預撥銀百四十萬兩外銀二百七十餘萬由部臣照依估撥預撥完數以此準之甘肅新疆實餉五百餘萬之數雖無可

考而一歲之中預撥正撥四百一十五萬兩有奇則有數可稽也竊
度南北兩路如行清丈之法就畝徵賦仿什一之制而從寬定額民
取十數官徵其一以給軍食尙可有餘修渠導流以備旱潦改鑄制
錢以便民用設局徵釐以裕課稅次第經理已有端緒此外南北兩
路物產尙有藥材皮張吐魯番之棉花和闐之玉庫車之金銅鉛鐵
均應設籌及之是新疆利源非無可開也從前額兵之多者一則轄
疆與蒙部回番雜處兵少恐啓戎心一則新疆須由內地撥兵換防
兵少難敷調派若以現在局勢而言蒙部回番已就鈐束防營可以
漸減前奏改行餉爲坐糧爲復甘肅制兵之漸新疆南北如置行省
換防之制可以永停又擬節制兵之餉以紓各省協款之力也竊計
甘肅新疆承平時預撥估撥餉銀四百數十萬兩俟伊犁收還每省

約可節省百數十萬兩後此利源日開餉更可減每年以三百數十萬兩爲度自無不可

上是其議

諭以伊犁見未收還建置事宜尙難遽定其南北各城應先次第籌辦旋因西四城漏逸賊酋糾衆寇邊宗棠以政教未行愚民信奉其汗比條勒已成錮習非革除舊俗漸以華風難冀久安長治五年秋九月奏奉

諭旨著妥籌具奏宗棠按新疆形勢北路則烏魯木齊南路則阿克蘇地居天山南北之脊居高臨下足以控制全疆擬設新疆總督治烏魯木齊設新疆巡撫治阿克蘇將軍率旗營駐伊犁塔爾巴哈台改設都統并統旗綠各營于伊犁增設兵備道塔爾巴哈台設同知

北路鎮迪道仍其舊升迪化直隸州爲府附郭置迪化縣并舊設之
奇台昌吉阜康綏來四縣隸焉升呼圖壁巡檢爲圖壁縣濟木薩縣
承爲濟木縣改鎮西廳同知爲直隸州知州仍復原設宜禾縣改哈
密通判爲直隸廳同知于吐魯番增設廣安道改土魯番同知爲廣
安直隸州知州升闕展巡檢爲闕展縣增置托遜縣南路阿克蘇增
設分巡道阿克蘇卽古溫宿國設溫宿府治之附郭置溫宿縣於尹
阿瓦提置尹阿縣於拜城置拜城縣均隸溫宿府庫車卽古龜茲國
設鳩茲府治之附郭置鳩茲縣於沙雅爾置沙雅縣均隸鳩茲府喀
喇沙爾卽古焉耆國設焉耆直隸州治之於庫爾勒置庫勒縣隸焉
烏什卽古尉頭國於其地設尉頭同知凡二府所屬統轄于阿克蘇
道喀什噶爾增設兵備道喀什噶爾卽古疏勒國設疏勒府治之于

漢城置疏勒縣回城置疏附縣隸焉葉爾羌卽古莎車國設莎車府治之于漢城置莎車縣回城置莎附縣隸焉和闐卽古於闐國設於闐直隸州治之并置於闐縣隸焉英吉沙爾卽古依耐國於其地設依耐直隸同知凡二府所屬統轄於喀什噶爾兵備道至義塾甫興學政及各府廳州縣校官應緩議設其丞倅佐雜應俟分設郡縣後再分別陳請新疆各員按照邊俸遷轉暫亦緩議各城安設台站驛遞增設提鎮副叅游都守千把外額大小武職及額兵俸廉餉乾本折應俟新設督撫會同議擬藩臬大員均隨督撫駐紮六年冬十月宗棠奉旨入覲

詔通政使劉錦棠署理欽差大臣未幾伊犁款議成八年春三月

上諭譚鍾麟奏請酌度七城情形設立道府丞倅牧令各員著劉錦棠體察情形會商該督籌議具奏錦棠在南路久其地之廣狹瘠肥物產之豐嗇皆親歷周知秋七月遂就宗棠原奏而變通之回疆東四城擬設分巡兵備道駐阿克蘇喀喇沙爾與土爾扈特和碩特游牧珠勒土斯犬牙相錯擬設直隸廳理事撫民同知治喀喇沙爾城庫車擬設直隸廳撫民同知治庫車城阿克蘇擬設溫宿直隸州知州治阿克蘇城設拜城知縣治拜城隸溫宿直隸州烏什緊鄰布魯特部落爲極邊衝要擬設直隸廳撫彝同知治烏什城以上統歸東四城巡道管轄西四城擬設分巡兵備道住喀什噶爾回城兼管通商事喀什噶爾擬設疏勒直隸州知州治漢城設疏附知縣治回城隸疏勒直隸州英吉沙爾緊隣布魯特情形與烏什略同擬設直隸

廳無彝同知治英吉沙爾城葉爾羌擬設莎車直隸州知州治漢城
設葉城知縣治回城隸莎車直隸州葉爾羌所屬瑪納巴什爲回疆
東西咽喉地積年河水爲患擬設直隸廳水利撫民通判治瑪納巴
什城和闐擬設直隸州知州治和闐城設於闐縣治哈拉哈什隸和
闐直隸州以上統歸西四城巡道管轄各城向有阿奇木伯克悉撤
之由地方官酌定頭目額數選充舊設各塾亦由各廳州縣延師訓
課分別請獎教職等官暫可不設惟新疆與甘肅形同唇齒凡籌兵
籌餉製辦轉運諸務皆以關內爲根本若將關內外劃爲兩省以二
十餘州縣孤懸絕域勢難自存且後路製運必與甘肅分門別戶眉
目始清則經費更繁尤難爲繼請將哈密鎮通道等處暨擬設南路
各廳州縣併歸甘肅爲一省仿照江蘇建置大略添設甘肅巡撫駐

烏魯木齊并請加兵部尙書銜俾統轄全疆官兵督辦防務設布政使一員隨巡撫駐劄舊有鎮迪道員請照福建台灣例加按察使銜令兼管全疆刑名驛傳改迪化直隸州爲迪化縣添設迪化府治迪化城管轄迪化及舊設昌吉綏來阜康奇台五縣移奇台縣於古城遷古城巡檢於舊治而典史隨印官移駐此外鎮西吐魯番兩廳撫民同知暨鎮西廳照磨訓導吐魯番所屬回城關展兩巡檢哈密廳監督通判哈密巡檢昌吉屬之呼圖壁巡檢阜康屬之濟木薩縣丞均仍其舊惟哈密纏回舊受治於辦事大臣應照宗棠原奏歸哈密廳管理九年春請增設阿克蘇喀什噶爾道庫大使各一員溫宿疏勒莎車和闐四直隸州各設吏目一員烏什庫車喀喇沙爾英吉沙爾四同知瑪納爾巴什通判各設照磨一員拜城葉城疏附於闐四

縣各設典史一員莎車州回城喀喇沙爾所屬布古爾各設巡檢一員十一年秋請增設布政使經歷庫大使各一員鎮迪道增設道庫大使一員兼司獄迪化州舊有巡檢改設迪化府經歷兼司獄舊有州吏目改設迪化縣典史原設學正改升迪化府教授仍兼管各屬縣學事庫爾喀喇烏蘇縣丞改同知又改糧員是年冬請改設撫民直隸廳同知加理事銜兼管土爾扈特部衆隸鎮迪道精河舊設典史後改糧員請改設驛糧巡檢屬庫爾喀喇烏蘇廳同知次年復增設照磨兼司獄十年冬錦棠

簡授新疆巡撫十一年夏魏光燾調任新疆布政使復相與籌商先後奏經部議得

旨允行伊犁者西北之奧區中外之關鍵近鄰俄羅斯及喀薩克布

魯特蒙古諸部遼闊衝擾控馭綦難當日東西建城有九碁布星羅形勢完壯自回逆陷之俄人據之夷城郭汗田里滿漢兵民殺戮之餘重遭迫脅故伊犁收還後舉屬荒郊將軍金順進駐數年籌辦善後諸務費帑七十餘萬而民未加多地未加墾工程未竣役會有

詔內召興復未遑也十三年春三月魏光燾詳悉規畫謂西六城以綏定爲扼要擬裁撫民同知升伊犁廳爲府治綏定城附府設綏定知縣并廣仁瞻德拱宸塔勒奇四城隸之將軍舊住惠遠以城垣頽廢寄居綏定應以惠遠新城爲滿城仍移將軍駐之仿內地駐防之制東三城以甯遠爲扼要擬設甯遠知縣治甯遠城屬伊犁府并以惠遠熙春兩城隸之設伊塔分巡兵備道兼管通商事駐甯遠與知縣同城霍爾果斯卽拱宸城緊連俄界舊屯索倫各旗擬裁原設巡

檢置伊犁府分防通判管理旗務精河爲入伊要道西南出東樓斯口距甯遠最近上年改設巡檢隸庫城同知擬改設精河直隸廳撫民同知隸伊塔道博羅塔拉爲伊塔適中地西臨俄境田地亦多擬移精河巡檢駐之隸精河同知廣仁城爲伊犁通衢擬裁惠甯城巡檢改設于此隸綏定縣改惠遠城巡檢爲伊犁府經歷兼司獄綏定城巡檢爲綏定縣典史甯遠城巡檢爲甯遠縣典史并增設伊塔道庫大使精河同知照磨仍留舊設伊犁理事同知隨將軍移駐辦理旗務改塔爾巴哈台理事通判爲塔城直隸廳撫民同知兼理事銜管理民屯旗務仍設同知照磨兼司獄均屬伊塔道至新疆各屬部文件往來時有繙譯應援山西成例添設巡撫衙門筆帖式二員錦棠均奏請飭部覆准至關外武職舊制自綠營標兵換防番戍兵外

類屬旗員旗兵養兵既多需餼甚鉅宗棠原奏設省後餼可日減且約定成數十年春二月劉錦棠金順張曜譚鍾麟按照部議各節悉心區畫將款項之應用應抵兵勇之應留應汰就左宗棠原議三百數十萬之餉量入爲出以昭覈實錦棠旋條陳數事一曰留兵勇以定餉數承平時新疆旗綠各營數逾四萬協餉係與甘肅併估一歲之中預撥正撥四百一十五萬兩有奇常例分半提用從前額兵職官北路獨多今則兩路并重南路形勝以喀什噶爾爲最阿克蘇烏什次之現擬酌定全疆旗綠以三萬一千人爲準如部臣所議將舊有之烏魯木齊巴里坤古城庫爾喀喇烏蘇吐魯番各處旗丁歸併伊犁卽以伊犁將軍與塔爾巴哈台參贊爲駐防旗制合馬步勇營共足萬人餘以六千三百人歸喀什噶爾道屬以四千五百人歸阿

克蘇道屬以六千四百人歸鎮迪道屬其巴里坤則定三千八百人全疆餉項除已改之坐糧標勇士勇外餘存之營尙須照支行餉統計關外各營餉需及添製軍裝器械并善後經費銀已需三百四十萬兩合關內餉銀百二十萬兩現尙需的餉四百六十萬兩較回額僅多費銀四十餘萬若奮勇裁畢統改坐糧新疆每年可省兵餉八十餘萬兩其善後三十萬兩三年後均可停止則每年合關內外止須協餉三百數十萬兩與左宗棠奏定之數適符一日改營制以歸實用向來駐防旗營例分前鋒領催馬甲步甲及養育兵月餉季糧各有等第綠營分馬步守三項今於伊塔兩處分兵一萬擬伊犁分七千人塔爾巴哈台分三千人伊犁即就現存錫伯索倫察哈爾厄魯特及擬移烏魯木齊各城旗丁內挑選三千人作旗兵再於金順

所部勇營挑留四千人作馬步游擊兵應如何歸舊設伊犁總兵等官統馭卽由將軍轄制酌定塔城挑留旗兵千人再於錫綸所部勇營挑留二千人作馬步游擊兵該處亦有綠營官弁應由參贊酌度其三道所屬共二萬一千人馬步分編擇駐險要除酌派各處分汛外餘兵隨所隸之將軍參贊巡撫提鎮駐紮練習俾成勁旅一曰定官制以一事權關外向止鎮迪一道今則南路添設兩道并畫哈密通判以隸新疆計廳州縣官二十餘員回疆始有治民之官旗丁概歸伊犁駐防擬請除留伊犁將軍塔爾巴哈台兩處旗營外其餘兩路之都統參贊辦事協辦領隊各官概予裁撤移烏魯木齊提督於喀什噶爾移喀什噶爾換防總兵於阿克蘇其所屬各營旗分防城隘應更勘明定議鎮迪道屬之兵卽作撫標每年協餉仍歸陝甘總

督統佔按數分起撥解又配造子藥所需物料應歸總督飭甘肅新疆總糧台分別購造撥解應用年終由應分協餉內劃抵歸款旗營各員參用勇營之章便於訓練如副將作營旗官即以中軍都司爲總哨千把經制外委爲正副哨長參將游擊作營旗官即以中軍守備爲總哨千把經制外委爲正副哨長都司守備作營旗官即以中軍千總爲總哨千把總經制外委爲正副哨長兵署卽同行營營息聯爲一氣治兵之官不似往者之冗而事權可一至文報尤關緊要南北兩路通改台爲驛分隸各廳州縣管轄以專責成其人役薪糧一律從新釐定自此郵政肅而擾累除矣奏入均

報可惟前疏請裁旌員而伊犁參贊一缺塔爾巴哈台領隊二缺未經議及旋奉

論核議十一年夏五月錦棠覆陳伊犁請改設副都統二員塔爾巴哈台請裁滿洲領隊而留厄魯特領隊并添設副將一員悉蒙

俞允先是八年秋錦棠請將烏魯木齊古城巴里坤所餘旗丁併遷伊犁滿營故前奏有伊犁卽就現存錫伯索倫察哈爾厄魯特及擬移烏魯木齊各城旗丁內挑選三千人之語嗣金順奏伊犁旗丁尙多挑補足額請改遷塔城又經護巴里坤領隊金貴咨稱塔城毘連俄界恐凋敝之餘難資禦侮於是遷伊遷塔久無定議十一年夏錦棠復議歸併古城新築滿城安插請照甘肅莊浪滿營例改設城守尉以資鈴束十三年春請照河南山西城守尉例歸新疆巡撫兼轄明年三月新授城守尉德勝莅任古城錦棠委道員英林會同將三處員弁兵丁擬定旗分造冊呈核實存協領三佐領防禦驍騎校各

十筆帖式二委筆帖式三又雲騎尉五恩騎尉三各兵丁九百九十
八名外閑散幼丁六十一名按照旗制僅敷六旗之數是年八月奏
請總計六旗共設佐領六員防禦六員驍騎校六員部缺筆帖式一
員委筆帖式二員催總領催三十六員前鋒如之馬兵七百二十有
八名職手匠役各十二名步甲百一十六名養育兵六十名總設官
二十有一兵共千名照現存官兵數目應裁協領三佐領防禦驍騎
校各四部缺筆帖式委筆帖式各一尙應補兵二名其官俸兵餉均
照滿營承平舊制分別定支得

旨允准十二年冬十月錦棠與魏光燾遂將南北兩路巡撫提鎮各
標額餉兵制妥籌議奏向章勇丁一營自營官總哨至正副哨長共
官弁十員標營擬每營旂祇以副叅游都守作營旂官而量設千把

爲哨長經制外委爲巡查其總哨副哨長概從裁省又勇丁營制步隊一營火勇占額四十餘名一旂占額三十餘名馬隊火勇向在額外標營則向無火勇茲既照勇營之制火勇自難裁減擬改步隊以四百九十八人爲營三百六十七人爲旂官弁火勇在內馬隊以二百五十人爲營百二十六人爲旂官弁在內火勇在外而議設標營則不計火勇以足原議鎮迪道屬屬設兵六千四百名撫標擬以舊有提標中左右三營改設內設中軍叅將一員游擊二員并中軍守備以下等官共四十餘員勇二千餘名省城重地合舊有之迪化鞏甯二營設城守協副將一員并中軍都司以下等官以舊有喀喇巴爾噶遜營隸之瑪納斯濟木薩庫爾喀喇烏蘇營皆依舊制略爲增減精河舊設都司地當伊犁衝要擬設叅將以資控制吐魯番昔爲

換防兵地屬鎮迪道擬就道屬兵數內增設游擊一員駐之以上均隸巡撫兼轄計設副將二參將三遊擊四都司四守備十有三千總十有九把總五十有二經制外委三十有四共官百三十一員步隊八營三旗馬隊十五旗除火勇共正勇六千四百四名餉照坐糧稍爲變通每營歲需二萬四千餘兩嗣復添設撫標開花礮隊一哨十三年冬十月又奏設喀什噶爾提標中前左右四營參將一員遊擊三員守備七員千總把總經制外委四十有五員步隊四營馬隊七旗城守營游擊一員守備二員千總把總經制外委十員步隊一營馬隊一旗開花礮隊一哨回城設副將一員都司守備各一員千總把總經制外委十有二員步隊一營馬隊一旗英吉沙爾設參將一員守備一員千總把總經制外委九員步隊一營馬隊一旗葉爾羌

設副將一員都司一員守備二員千總把總經制外委十有五員步隊一營馬隊三旂其所屬葉城縣卽由所設馬隊內分右旂駐防瑪納巴什設游擊一員守備一員千總把總經制外委七員馬步隊各一旂和闐州設叅將一員守備一員千總把總經制外委九員步隊一營馬隊一旂其所屬於闐縣卽由所設步隊內分左哨駐防喀什噶爾與各部毘連文報必須繙譯中營另設蒙古把總二缺以上各營歸提督管轄計設副將二叅將三遊擊五都司二守備十有五千總十有九把總五十有五經制外委三十有五并提督共官百三十七員步隊九營一旂馬隊十六旂開花礮隊一哨除火勇共正勇六千三百九十七名阿克蘇鎮標設中左右三營遊擊三員守備六員千總把總經制外委三十有六員步隊三營馬隊六旂并抽右營馬

隊一旂分駐拜城縣城守營設都司一員守備一員千總把總經制
外委五員步隊一旂開花礮隊一哨烏什設副將二員都司二員守
備一員千總把總經制外委十有六員步隊一營一旂馬隊二旂喀
喇沙爾設叅將一員守備一員千總把總經制外委九員步隊一營
馬隊一旂庫車所屬沙雅爾設游擊一員守備一員千總把總經制
外委七員馬步隊各一旂中營另設蒙古把總二缺以上各營均歸
總兵管轄計設副將一叅將一游擊四都司三守備十千總十有三
把總三十有九經制外委二十有三并總兵共官九十五員步隊五
營三旗馬隊十旂開花礮隊一哨除火勇共正勇四千五百三十三
名巴里坤鐘標設中左右三營游擊三員守備三員千總把總經制
外委二十有七員步隊三營馬隊三旂城守營設都司一員千總把

總經制外委四員步隊一旅哈密協營設副將一員都司一員守備一員千總把總經制外委十有二員步隊一營馬隊二旅哈密協屬塔爾納沁設守備一員把總一員步隊一哨古城營設遊擊一員守備一員千總把總經制外委九員步隊一營馬隊一旅木壘營設守備一員把總經制外委三員馬隊一旅中營另設蒙古把總二缺以上各營均歸總兵管轄計設副將一游擊四都司二守備七千總十有一把總二十有九經制外委十有八并總兵共官七十三員步隊五營一旂一哨馬隊七旂除火勇共正勇三千五百十七名兩路提鎮標營官俸兵餉概照撫標章程統由巡撫節制章下悉經兵部覆准文武員缺請照吉林例由外補署一次撫藩以下廉俸工食升調遷補各事宜均請參酌例章變通辦理南路各塾纏童暫行的獎份

生以資觀感鎮迪道屬歲科兩考改歸巡撫屬試修復各廳州縣文廟武廟文昌廟社稷神祇先農壇龍神祠府治及各直隸州廳添設昭忠祠其山川方鎮如阜康之博克達山喀喇沙爾之博爾圖達坂阿克蘇之索木爾嶺春秋致祭一遵舊制而博克達山尤幽邃禱雨無不應復添建博嶽廟以順民望禮靈祇于是武功大定文治聿昭人物繁熙比于中土諸行省焉

戡定新疆記卷七終

戡定新疆記卷八

善後篇

自逆回搆變醜虜交訐草木蕩爲腥膻民物淪於灰燼平定後外籌邊防內謀生聚督師左宗棠劉錦棠雖拮据戎馬閒罔弗竭慮殫精隨時措置陝甘總督楊昌濬山東巡撫張曜奉

命幫辦悉心籌贊規模益宏逮行省初開今撮巡撫魏光燾適移藩出塞益爲廣所未備慎圖厥終於是荒復之區兵燹之後百廢具舉蒸蒸稱上理焉謹采撫撫字事蹟爲善後篇第四

光緒四年夏五月

詔楊昌濬幫辦甘肅新疆善後事宜昌濬自宗棠初出即佐理營務累功擢浙江巡撫嗣因案罷職家居是年四月幫辦陝甘軍務通政

使劉典得請終養宗棠以新疆善後方亟疏請起用六年春正月
飭通政使司劉錦棠幫辦新疆軍務先是上年冬宗棠奏錦棠出關
以來克復各城勳績不著現辦善後各事因地施治寬猛得宜洵一
時傑出之材俄人因憚生忌動思搖撼握兵日久疑誘易滋請
優賞欽差銜幫辦新疆北路軍務俾得盡其力用以甦疲民故有是
命秋七月

特諭左宗棠見飭來京陛見接替需才著慎舉賢員奏明請

旨其帶兵各員有材畧過人堪膺艱鉅秉性忠勇緩急足恃者並著
臚列保荐用備任使宗棠奏劉錦棠志在匡時才能應變隴中關外
夙著勳勤近辦新疆善後事宜威惠並行邊民咸服如蒙

恩命督辦關外一切事宜必能勝任並言安肅道員駐肅州地在關

內兼轄關外玉門安西鎮迪道駐迪化州兼轄鎮西廳地在關外哈密廳介居其中向歸陝甘總督統屬茲擬督辦關外軍務應請劃哈密鎮西迪化並歸新疆且以督辦新疆軍務署銜不用關外二字更覺分明陝甘督篆可否卽交楊昌濬接署在事人員疊蒙

天恩洵擢提鎮其人之才否又爲劉錦棠楊昌濬所深知斷不至曲抑人才臣既遵

旨交卸未宜保荐市恩得

旨劉錦棠威望素著辦理新疆善後事宜諸臻妥協著署理欽差大臣督辦新疆軍務俟劉錦棠到哈密後左宗棠卽將欽差大臣關防交給祇領所有新疆一切布置並著詳細告知妥爲籌辦卽行迅速北上所請派署陝甘總督篆務著聽候

諭旨喀什噶爾逼近俄境亦關緊要劉錦棠起程後須派得力將領認真防守以昭慎重冬十月宗棠奏請以張曜暫辦曜原官河南布政使爲御史劉毓楠劾改武職四年西四城告捷宗棠附奏始與張曜共事知其能軍不知其饒有吏幹嗣率所部駐哈密大興屯田具有條理前後書牘繕至文理斐然其論列兵事及南疆地勢賊情所言多中疆域日闢邊才甚難如張曜之文武兼資實不數觀懇仍復文職原疏留中繼有是請得

旨允行宗棠旋奏報劉錦棠是月初六日行抵哈密十二日移交

欽符卽起程入關

上諭西陲軍事緊要劉錦棠務當按照左宗棠成規與金順張曜和衷籌辦至哈密及鎮迪道所屬文武地方官均著照所請暫歸劉錦

棠統轄錦棠旋緘商張曜率所部嵩武軍並新募生力軍千餘人移防喀什噶爾英吉沙爾兩城總辦西四城邊防善後暨中外交涉諸事宜飭統領董字軍步隊三營董福祥併統張俊定遠軍步隊三營夏辛酉張宗本恪靖馬隊兩營移駐葉爾羌和闐各城飭喀什噶爾防營步隊一旗纏回布魯特馬隊各一旗仍屯喀什噶爾共馬步十一營旂纒歸張曜節制嵩武軍開拔後東四城防務飭總理營務羅長祐將所部老湘右軍五營中軍右營一營併爲四營另撥譚慎典陳建厚白旂壽字馬隊各一營隸之共馬步六營移防阿克蘇瑪納爾巴什一帶飭譚上連率所部恪靖馬隊三營並將老湘左軍步隊五營併爲三營共馬步六營移防烏什譚拔萃譚和義新由湖南募步隊二千餘人西來錦棠以哈密舊屯親軍步隊暨旂善馬隊經宗棠飭

赴張家口駐紮即提拔萃等新勇兩營並調原駐喀城親兵併充親軍其餘新勇飭譚和義率一營暨駐吐魯番譚拔萃率一營進駐庫車併統庫車喀喇沙爾兩城防營七年春二月張曜率諸軍赴喀什噶爾督同喀英善後局道員張宗翰次第部署悉如錦棠議秋八月授錦棠爲欽差大臣督辦新疆軍務疏辭不許初錦棠先後規復南北兩路曾請隨時裁撤各營至是奉

旨飭錦棠與譚鍾麟楊昌濬會商裁減以節餉需八年春三月錦棠覆奏伊犁甫經收回金順移軍前進地面愈闊種類愈繁必須加意鎮撫張曜所部豫軍馬步僅十四營駐防喀英等城昆連夷境方慮兵單是金張兩軍目前未能遽裁此外湘楚卓勝各軍除左宗棠檄調親軍并旌善馬隊各起帶赴直隸暨上年先後裁去弁勇六千三

百餘名現祇馬步六十營旂約二萬五千餘人上年曾函商烏魯木齊提臣金運昌擬將所部卓勝軍先裁步勇四營馬勇兩營並就湘楚各軍兵力畧厚者先撤馬隊四營步隊兩營計每撤一營需銀四萬餘兩謹將籌辦之法詳晰縷陳一餉項急需接濟查上年裁去弁勇計散放餉銀六十餘萬兩今續議減竈出款正繁難資周轉且撤者應清積欠留者月需薪糧應請

勅下戶部咨行各省關迅將西征協餉籌解大批以濟要需一裁營必按次第新疆各軍強悍性成離家甚遠一旦遣撤既恐逗留關外又慮滋事沿途上年所遣各營將口糧數目攤勻由後路台局節次給發飭該管將弁申明紀律分起成行非如內地散軍刻期戡事此次擬仍照上年辦法庶無他虞一邊防宜策長久謹按乾隆年間戡

定新疆移滿洲蒙古東三省索倫錫伯等兵暨陝甘兩省綠營兵或
構眷駐防或按期換守其見諸載籍者數逾四萬此時現有防營僅
足相抵若干關外所裁營勇中選其精壯耐勞不願回籍者俟往代
屯田法編成額兵并將烏魯木齊提標兵額飭金運昌就所裁卓勝
軍認真挑選俾復步兵舊額之半均改行餉爲坐糧以省餽運營伍
易實邊患可消假勇得所於新疆大局寔有裨益得

旨所籌尙屬周妥著戶部咨行各督撫將軍監督迅籌大批濟用勿
誤要需至所擬挑選現裁營勇編成額兵各節著會商譚鍾麟悉心
妥籌奏明辦理鍾麟自奉前

旨即函商改勇爲兵會錦棠有是奏意見適合金運昌前以關內現
行制兵額餉太薄招募維艱請照土勇章程辦理遂於裁撤卓勝軍

馬步各營後募鎮迪各屬漢民與遺勇不願回籍者編成土勇六旗改併土勇一旗計二千五百九十餘名已符提標兵額之半錦棠統湘楚各營遺勇照坐糧編馬隊一旗備改標兵徐復舊額其未裁各營仍奏請支給行餉以重防務九年秋七月戶兵兩部咨令核查兵勇數目防境地段奏明報部錦棠以哈密爲南北路總匯大營駐此期于呼吸相通南路自吐魯番至和闐等處纏回新撫毗連外部以喀什噶爾爲邊要張曜行營駐之北路自巴里坤至精河等處山嶺紛歧近接蒙壤以伊犁爲邊要金順之軍府在焉咨商金運昌先將卓勝軍馬步五營分起遣撤又酌裁羅長祐所統湘軍步隊兩營統共開除員弁勇夫四千六百六十一員名額馬五百四匹湘楚蜀各軍並提標土勇僅存馬步五十一營旂開花礮隊三哨小馬隊五哨

共額設弁勇二萬五百一十七名額外營哨官弁各夫役萬有七百
十四員名額馬三千七百八十二匹此錦棠所部諸軍截至九年十
二月現存寔數也嗣於行糧馬隊內飭將蜀軍呼敦左右二營楚軍
定遠一營湘軍定遠小馬隊一哨裁併改爲定遠行糧馬隊一旂呼
敦行糧馬隊二旂定邊坐糧馬隊二旂又於行糧步隊內裁撤湘軍
定遠中營一營并將董字左右二營定遠左右二營蜀軍正副二營
楚軍安遠左右二營裁併均改爲左右二旂更改建威一營爲安遠
前旂照章共留員弁勇夫五千九百十五員名額馬六百三十五匹
共開除員弁勇夫二千九百六十三員名額馬百二十一匹喀喇沙
爾地方險要照土勇馬隊餉挑駐蒙古馬隊一旂阿克蘇道標挑募
土勇一旂合湘楚蜀軍並烏魯木齊提標共五十四營旂開花礮隊

三哨小馬隊四哨共額設弁勇萬九千一百六十三員名額外營哨官百有二夫役九千六百二名額馬三千七百八十八匹此錦棠所部諸軍截至十年三月現存實數也是年九月張曜率嵩武軍遵旨入衛錦棠飭統領董宇定遠軍董福祥率所部七營旂接防喀什噶爾並令總統恪靖西征馬隊分防各城抽湯彥和所統湘軍步隊一營駐瑪拉巴什又由哈密新募漢回馬隊二百五十人照坐糧編爲兩旂飭令赴喀酌留嵩武軍步隊二旂亦照坐糧支給并歸福祥節制另募行糧步隊一旂並將哈密協標步兵二百七十餘人添足一旂改支土勇口糧騰出哈密烏魯木齊之靖遠綏定馬步四營旂填駐庫車暨喀喇沙爾既而金順以伊犁甫經接收人民未附擬將全部拔赴以資鎮撫其原駐大河沿至安集海各處咨請錦棠撥營

填防錦棠念所部營數與金軍相等防境遼闊則數倍之現奉裁營節餉之

旨萬難展延且中俄業已通和防軍但備彈壓何必臨以大兵致生疑懼請

敕金順留營分防准如所奏時戶部兩次疏陳新疆防務已鬆科布多所設蒙軍應卽裁遣節費清安以科城密邇俄疆兼爲伊塔兩城運道且隣境劫殺案件層見叠出難保不乘間潛入貽害地方防營兵力較單鞭長莫及奏請暫留蒙軍適金順所部綏定城強勇馬隊暨親軍步隊於十一年二月倉猝潰變劫南關舖戶竄而東裏脅至五百餘騎錦棠飭統領親軍譚上連率各防營疾趨奎屯相機攔截已而叛卒竄至精河被官軍截阻聲言乞降旋復闖越東奔統領卓

勝軍馬玉崑統領英字營提督徐得標揮隊堵剿生擒匪首何偏頸等三名陣斃甚衆宥其脅從乞撫者餘黨二百餘騎竄走西湖馬玉崑等追及東井子夜殲之僅數十騎遁去錦棠奏奉

諭旨嚴緝餘匪以盡根株并飭各營員弁毋得侵尅糧餉致釀事端而烏魯木齊精騎後營哨弁趙良敬亦脅衆譁潰戕營官王玉林旋弋獲良敬磔于市斬其黨王世田史金山劉正乾等及陣擒綏定亂兵數十人未幾伊犁鎮總兵劉宏發所部禮字後營復鬧餉譁潰五月朔戕營官段雲陽宏發督隊剿捕被鎗傷叛勇竄果子溝其地毗連大西溝林深路歧久爲匪首李皮帽所踞遂相糾合焚四台營壘殺數人而去途遇大河沿營官張長安護餉歸復傷斃哨弁孫姓勇丁六名六月朔統領綏靖營劉文和自綏來募新勇二百人返塔城

夜抵庫爾喀喇烏蘇頭台焚掠居民竄由沙拉烏蘇驛渡河欲投李皮帽奎屯防營截勦之譚鍾麟奏言防營潰變如此游匪猖狂如彼新疆北路尙復成何景象欲求弭亂之策在籌款清欠餉擇人整營規以金軍各營人數計之得銀三十萬卽可了結然必得威望素著之員核實查點將勇丁入營久暫欠餉多少分成勻給願去者聽願留者須守營規將缺額歸併成營按月發餉營哨官貪劣尤著者誅一二人以振軍威庶人心可定游匪亦當斂跡然此恐非金順所能爲蓋金順性本忠厚馭下太寬左右官弁多方朦蔽統領營官相率侵欺存營之勇不及一半每月給七日半口糧冬夏棉單衣各一套其糧官採買定官價給以期稟有無不可知勇丁領糧較民價爲貴兵民怨望而金順不知也二月之變以護衛親兵尙欲謀害主將士

卒心離恩威兩無所用何怪各營之紛紛效尤如吉江馬隊從征十餘年存者十之六七類多疲弱既不及早遣撤又不加恩撫綏致令時赴烏城求路票索川資以圖歸情已渙散留之何益金順久居於此害何可言爲今之計措置不可緩操持又不宜急蓋兩次譴潰皆以欠餉爲名倘聞主帥移易羣起索餉倉卒無以應則不測之禍起於俄頃事變將不知所終伏懇

皇上俯念金順馳驅廿餘載屢著功績近雖爲人所蔽而心本無他爲功臣保全終始另

簡素性忠直熟悉關外情形之員以督辦新疆北路屯墾爲名馳赴伊犁計其將至然後調金順回京轉移於無形弭患於先事則兩得之矣旋奉

上諭金順著來京陛見並令錫倫署理伊犁將軍其塔爾巴哈台叅贊大臣派明春馳往署理伊犁兵勇屢次譁變亟應清理欠餉著戶部撥銀三十萬兩解交甘省未到以前譚鍾麟無論何項先行如數籌措迅速解交劉錦棠酌帶隊伍馳赴伊犁會同錫倫將金順所部各營欠餉覈實勻給并將勇丁應去應留查明歸併嚴整營規其貧劣素著之營哨官嚴辦一二以警其餘務將積習湔除免貽後患譚鍾麟卽籌解前款冬十月錦棠至伊犁飭將領造實勇冊核計馬步二十八營旂員弁勇丁共萬有五百餘名內吉江馬隊祇千六百有奇中有上年新募入伍者多招之市井飭於伊犁應分月餉內酌發滿餉一關裁去新勇二千餘名實存七千餘名挑留精壯改爲馬勇九旂步隊十三旂委馬玉崑李考祥綏定鎮總兵鄧增統帶另照楚

軍口糧按月起支各營餉銀每月向照七日半發給此次定以入營
在一年內者發存餉銀四兩一年外每歲酌加二兩按年遞增至十
年者發銀二十二兩以十年爲斷哨官每員發銀六十兩統領營官
酌發薪水公費幫辦募友薪水各自清理所裁回籍弁勇視留營應
領數各倍之約需銀萬餘兩願落業者准撥地安插照回籍弁勇酌
減四分之一約共需銀二十一萬五六千兩下存八萬餘兩爲吉江
馬隊遣撤回旂費伊犁勇營前請以四千人爲率茲裁去新勇老弱
近五千按原册人數僅存其半矣從伊犁至大河沿由錫倫派隊駐
紮精河東接西湖由錦棠抽調馬步六營旂委漢中鎮總兵戴宏勝
統帶填防旣而喀什噶爾匪徒勾結定遠右旂勇丁爲亂董福祥捕
斬首犯張大發顧得喜事平十二年春巴燕岱領隊大臣長庚奏陳

阿勒泰山宜早防守伊犁邊防宜籌布置躔金等處宜開屯田漠北
草地宜善撫綏及哈薩克應仿例編爲佐領等數事

上飭劉錦棠等體查情形妥議具奏十三年夏六月錦棠復奏哈巴
河以達承化寺在塔城迤東布倫托海迤北阿勒泰山在其東北緊
接俄國七河斜米兩省南據古城上游地勢已爲扼要況哈巴河一
帶又在布倫托海西北尤屬中外咽喉其地向歸科布多管轄然距
科甚遠自回逆變亂棍噶札拉參率其徒衆借居耕種營生當時籌
辦安插事宜曾經烏里雅蘇台將軍額勒和布等奏請就近改隸塔
城是哈巴河之於塔城猶門戶之於堂奧非防塔城新疆北路無屏
蔽非防哈巴河一帶塔城東北無憑依也請將原借之地劃歸塔城
管轄是月塔城綏靖三營勇潰殺中營營官陳明德右營營官劉宏

發錦棠飛檄統領庫精等營湯彥和馳往防剿飭營務道員袁鴻祐會查情形旋查明各營副無短缺惟營官間有貨物抵折挪用拖延致軍心懷恨陳明德性情嚴急會鞭撻什長馬士勳垂死復甦衆尤不服其黨遂造謠激變右營亦嚮應而起搶劫軍裝思竄伊犁爲南湖馬隊所扼捕誅首犯馬士勳張玉春周國棟魏生林王得勝陳萬明等西湖續獲張玉成杜天成等亦分別懲辦錦棠奏請

諭飭將軍參贊嗣後弁勇久役者當酌假期清存餉每歲以二成爲率仍隨時募補操防庶張弛得宜軍心亦定此南北邊防大畧也邊疆藩服翊戴輸誠休養歷數世如土耳其扈特和碩特兩蒙部乾隆間來歸游牧喀喇沙耳之珠勒土斯久稱繁盛自逆回叛亂兩部蒙民蕩析離居存者無幾札薩克頭等台吉札希德勒克招集餘戶避居

博爾土山子遺賴以自存光緒三年官軍復托克遜札希德勒克來
謁卽隨同錦棠馳驅鄉導偵探頗資其力逾開都河遂遷其部落防
河東宗棠上其勞績奉

旨賞花翎時土耳其扈特人衆寄住庫爾喀喇烏蘇情形困苦福晉恩
克巴圖魯呈請帶領伊子布彥綽克圖并屬下阿拉巴圖赴喀喇沙
爾收集逃亡仍歸珠勒土斯照舊遊牧金順以聞四年春正月

上飭順與宗棠設法安插毋令失所是年九月相率歸附者計大小
男婦共七千八百餘名口就開都河兩岸安插遊牧能自食者三千
餘丁餘均嗷嗷待哺喀喇沙爾善後知州黃丙焜盡力撫卹令安居
復業福晉旋以安插竣事自西湖率餘衆同歸宗棠金順奏奉

恩旨賞給銀四萬兩丙焜酌給貧戶并換置帳房購買羊種自四年

至六年秋陸續照發如數嗣伊犁續歸該部難民三百三十餘丁口至控吉斯河被俄屬哈薩克劫去馱馬百八十餘匹其冬大疫牛畜多死舊時宅第水渠亦未修復恩克巴圖仍乞賑恤丙焜爲轉請錦棠奏給渠宅經費新歸丁口仍由善後局給賑今生齒漸繁畜牧日富始復其舊惟塞外素有痘疫染者多不治蒙部暨纏民苦之丙焜募痘師試種牛痘應手輒效當時嘉之通飭南北兩路仿行全活無算遂令擇回童如法教授以廣流傳已而西土爾扈特亦發使請痘醫由丙焜始也初棍噶札拉參領蒙兵僧衆扼防阿勒泰山俄人不敵遲上年奉

旨令其銷假赴邊亡何清安等奏棍噶札拉參在科屬烏梁海稱奉錫綸差遣帶兵勇喇嘛多名收撫哈克薩攬將科伯史之子阿斯拉

布克斬梟并向頭目勒索致哈部相率奔逃七年秋七月

上以該呼圖克圖任性妄爲著錫綸確查參奏請安復奏此項哈薩克原隸塔城避棍噶札拉參之虐移踞烏梁海侵占蒙民牧場恐釀事變得

旨着錫綸設法調回塔城妥爲安置此綏緝藩部大畧也

大兵之後民物凋殘水利農田悉成荒廢左宗棠受任督師首以招復流亡爲重嘗言地荒民流軍餉何出奏報中數數及之時張曜屯哈密躬率所部經營屯墾不遺餘力哈密土質善滲治以土工石工及毛氈包裹各工凡墾地二萬畝歲獲數千石以濟軍旣而防營總兵黃本富易玉林相繼疏導石城子等渠哈密水利遂爲各路最統領蜀軍徐占彪屯鎮西修復大泉東渠迪化永豐太平二渠綏來一

渠由官借給銀糧督民修理福裕修安順渠劉嘉德修奇台諸渠吐魯番官渠坎井則善後局道員雷聲遠防營提督羅瑞秋等修之庫爾勒官民二渠則防營都司鄒今柄修之庫爾楚河道長四十里委防營副將王玉林庫車阿柯寺塘塞馬里柯兩渠長六十里橫貫戈壁委統領安遠軍提督易開俊督兵民修之均添修支渠民賴其利回疆西四城水道以葱嶺南北兩河爲最著烏蘭烏蘇河由喀什噶爾城南折而東北經牌素巴特龍口橋以達瑪喇爾巴什又數百里入噶巴克阿爾集大河爲葱嶺北河今所謂紅水河也葉爾羌托克布隆河與雜布河合流於城東之英克里莊東北行經愛吉特虎各軍台繞城東至噶巴克阿爾集與烏蘭烏蘇河會爲葱嶺南河今所謂玉河也玉河之西自愛吉特虎台至阿克薩克台河水潰決汎濫

由瑪城徑趨烏蘭烏蘇河數百里間用廬漂沒驛程梗阻城堡傾頽而瑪城爲東西咽喉竟成澤國委余虎恩湯彥和陶生林劉福田李克常楊德俊各帶部勇益以民夫堵築挑濬河復舊道瑪城地多膏腴自河水爲災渠堤盡毀陶生林方友生萬勝常知縣文培夏等修復大小各渠添開支渠招徠流亡散給子種農具民漸復業烏蘭烏蘇河龍口橋上游決口直注玉帶里克各台湍悍特甚湯彥和楊金龍督兵民開支河以殺水勢董福祥張俊開濬渠道給民牛種龍口橋以上如英阿瓦提牌素巴特和碩阿瓦大阿爾圖什黑子爾普巴依托海雅賈雅七克托蘇灣浪浪水各河渠委羅長祐侯名貴王維國等次第修濬又喀喇沙爾之開都河隄葉爾羌之圖木舒克各台渠壩亦勘估修築于是水利大興屯墾益廣鎮西廳屬兵民報墾五

萬餘畝奇台報墾民戶九百有餘軍營新墾六千六百餘畝迪化前後報墾二千餘戶昌吉前後墾戶千三百有奇綏來九百餘戶吐魯番及南疆八城除沙磧外草萊日闢光緒四年官爲清丈分九等科賦旋改爲上中下三等徵收以趨簡易六年丈量事竣按畝科賦多寡始歸一律云 右農田水利

邊圉初定防戍星羅軍食所資屯田爲重十一年夏四月劉錦棠疏言伊犁地處極邊屯墾當興而防務尤要謹按嘉慶九年增置伊犁旂兵屯田當時

諭旨新疆重地武備最爲緊要此項地畝只可交閒散餘丁耕種不當令官兵躬親力作有防操練今則與俄逼處邊事日多附近喀薩克時有勾結遊匪搶劫殺人之案是欲興屯以足食必先設險以衛

民該處勇營已與錫綸會商裁併汰弱留強誠使各將領認真訓練自可漸成勁旅此後應如何策勵俾免疏虞是在錫綸隨時體察妥慎商辦十二年冬譚鍾麟奏伊犁防營陸續舉行屯務而迄無成效者營官以屯務非專責勇丁以墾種爲當差鹵莽滅裂利於何有墾地專恃渠水而溝洫未盡闢卽偶有來源必俟兵屯灌足而後波及民田小民治地數十畝終歲勤動獲利無幾所收糧食又爲糧員定價採買發給期票有無不可知故往往棄地遠徙熟而復荒更何望成聚成邑之效是非另派大員督辦地方官分理其事不可精河庫爾喀喇烏蘇舊設糧員兩缺似可改爲撫民同知兼管屯田水利伊犁理事同知亦加屯田水利字樣均歸督辦管轄先派營勇分疏渠道畫分兵民經界水澤均沾兵屯三年內所收糧石分年繳還牛種

資本餘糧官爲收買給價持平民間請領牛種亦分年繳還三年後再定租賦庶兵民樂利無疆惟休得

旨著劉錦棠錫綸一併妥籌具奏十三年夏錦棠復陳伊犁土膏沃衍承平時分置旂屯兵屯民屯回屯各資耕種利莫厚焉亂後地畝荒蕪耕者不及十分之二且聽兵民自佔舊時經界無可遵循譚鍾麟原奏請將各路同知均歸督辦管轄究係權宜之計新疆北路向設有道廳州縣現在全疆設省南路經營建置成效可觀伊犁及塔城等處擬請照鎮迪道之制增置伊塔道駐伊犁兼管塔城事務改伊犁撫民廳爲府改塔城通判爲撫民同知加理事銜兼管屯田水利庶官事相聯屯政亦因之具舉經部議覆准先是部臣奏准將各省減等人犯發遣新疆屯墾藉實邊陲厥後陝甘山西直隸山東河

南七省遺犯到配魏光燾照民屯詳定章程每二人爲一戶撥上地六十畝給農具銀六兩房屋銀八兩耕牛二頭價銀二十四兩子種三石月給食麵九十斤鹽菜銀一兩八錢自春耕至秋穫按八個月計算子種照時價扣合共需銀七十三兩有奇由公借發初年繳半次年全還遇歉酌緩額糧則自第三年始初年徵半次年全徵仍仿營田制十戶派一屯長月給口糧銀二兩五十戶舉一屯正月給口糧銀四兩亦以八個月爲斷均免扣還每屯正五名復派員管理遞相鈐制各莊渠道給款公修其老弱不能力耕者各署分派役使或給本貿易營生迪化縣安插三百戶奇台阜康昌吉綏來四縣各百戶濟木薩呼圖壁並鎮西庫爾喀喇烏蘇精河各處稱是惟各省咨報解犯千五百餘名攜帶妻帑者不過十之一二與部臣實邊之意

相左錦棠仍請

飭下直隸各省凡發遣新疆人犯有室家者務令僉同起解既足以繫各犯之心而生息可蕃屯務益增斯兩得之術也從之

右屯田

軍興以來賦稅有無不常多寡不一自全疆底定屯墾日增以光緒四年計之鎮迪一道徵京斗糧六千九百四十一石房租銀六千壹百餘兩吐魯番徵糧萬四千二百餘石地課銀二千一百餘兩喀什噶爾徵糧料六萬五百餘石英吉沙爾徵二萬六百餘石葉爾羌徵七萬九千四百餘石和闐三萬六千八百七十餘石折色銀五千餘兩課銀四百六十餘兩阿克蘇徵糧萬四千二百餘石折色銀三千三百餘兩銅鉛磺鐵照額交納烏什徵糧八千三百餘石折色錢五百餘緡庫車徵糧萬二千八百餘石折色銀五千餘兩紅銅綿花徵

如舊額喀喇沙爾因久罹兵燹流亡未復四年無徵五年徵糧六千五百餘石計南北兩路已徵糧二十六萬一千九百餘石卽南路較部案額徵十三萬石已增十萬六千五百石有奇北路續增及開渠成熟地畝尙不在內其釐稅自四年秋冬至五年夏徵銀十八萬有奇伊犁定後商貨暢行來源益旺矣

右賦稅

蠶桑之利埒于農田而收效倍速新疆南北路並產桑土人取甚代糶蠶織未廣乃通飭各局檢校境內桑株委員就應募浙人熟悉蠶務者六十名携蠶種器具教民栽桑接枝壓條種椹浴蠶飼蠶煮繭繰絲織造諸法自哈密吐魯番庫車阿克蘇各令設局授徒以南疆產桑最多事半功倍漸推之西四城以及北路俾邊氓耕織相資

生計日廣

右蠶桑

回民市易舊用制錢自阿古柏創鑄天罡賸色低減物價翔貴乃改
造銀錢平市價杜私贖宗棠飭蘭州製銅模付張曜試辦枚重一錢
大小厚薄如一與制錢相權銀爲母銅爲子一律通用商民便之

貨幣

自逆酋盜踞各城官軍力攻而克之鯨鯢既殲城垣多毀喀什噶爾
葉爾羌英吉沙爾和闐漢回諸城最甚瑪喇爾巴什迪化綏來精河
鎮西次之錦棠通飭修補并添建倉廩塔爾巴哈台舊有廢城西距
巴克圖山俄界僅四十里錫綸擬照英廉原奏擇適中地建城控制
以額勒勒河多爾博勒津北與齊桑西與葦塘子俄官駐處遠近相
等且南通老風口東接布倫托海形勢扼要議於其地建城垣修文
武各署局暨校場屯堡兼修葺祀典各廟添置渡船橋梁統估銀四

十萬奏請

飭戶部如數撥解南路城工東則庫車烏什西則喀英葉瑪暨疏附縣飭因舊城繕完至喀喇沙爾阿克蘇拜城和闐于葉兩縣均擇基改建通估八城東西兩道最要者九並修建衙署共估銀三十七萬四千迪化州城改爲新疆省治剷除漢城東北使門滿城南右門由滿城東南展築城基其舊城增高培厚合兩城爲一估銀六萬三千二百餘創建巡撫署估銀二萬九千藩司署二萬五千古城毗連外部東通歸化包頭商賈所趨人煙輻輳移奇台縣治於此估建城銀二萬九千又修城守尉署一所佐領防尉驍騎校署十八所兵房五百間堆房六所糧倉火器步軍營總學堂各一併葺治官廟估銀八萬八千有奇哈密者南北通衢也舊城規模狹小擴充之估銀二萬

八千有奇吐魯番爲南北咽喉綏來爲省西門戶城垣多圯葺治之吐魯番估銀萬五千六百有奇綏來七千一百九十有奇錦棠先後請

飭部核准亂後人稀工值踊昂諸興作多以營工佐之約節省銀五十餘萬已而魏光燾復飭城昌吉阜康十五年冬十二月奏報工竣得邀

獎叙自是名城大都絡繹相望鎖鑰倍嚴矣

石城工

驛路自三年冬官軍窮追陝回安逆賊多掘水斷橋師行所至大率泅水踐冰重以南北兩河水患濱河各站悉爲巨浸驛遞遲滯轉運尤艱乃飭各營將領督勇建大小橋梁六十餘平治道途各台站添造官店備差弁往來棲止由哈密以達吐魯番自瞭墩至七克騰木

四驛分南北兩路南路妖風時作沙石飛騰人馬或捲去無踪俗稱風戈壁者也錦棠規知北有小路可避飭防營總兵夏奉朝移台站就北以免此患托克遜至喀喇沙爾中隔阿哈布拉積石峻嶒崎嶇萬狀車馬恆數日不得逾黃丙焜與防營總兵劉見榮盡力開通化險爲夷清水河西巖灘五六里泥淖縱橫過者常苦陷沒黃長周鄒今柄會營修治往來無阻咸稱快焉皆酌撥荒絕地畝招佃承租爲

歲修經費右驛路

邊方積習官民隔閡政令難施一切條教均藉回目傳宣壅蔽既深時虞矯僞乃飭各局多設義塾令回童讀書識字以期化被殊俗同我華風斯皆經營諦構建始之宏規也自餘因地因時補偏救弊者難以枚舉不具著右義塾

卷八終